

অচলায়তন

রবীন্দ্রনাথ ঠাকুর



বিশ্বভারতী গ্রন্থালয়
২ বঙ্গম চাটুজ্জে স্ট্রীট, কলিকাতা

প্রকাশ ১৩১৮
পুনমুদ্রণ মাঘ ১৩৩৪, আষাঢ় ১৩৪৬,
পৌষ ১৩৫৬

প্রকাশক শ্রীপুলিনবিহারী সেন
বিশ্বভারতী, ৬১০ দ্বারকানাথ ঠাকুর লেন, কলিকাতা।
মুদ্রাকর শ্রীপ্রভাতকুমার মুখোপাধ্যায়
শাস্ত্রনিকেতন প্রেস, শাস্ত্রনিকেতন, বীরভূম

আন্তরিক শৰ্কার নির্দেশনস্বরূপে
এই অচলায়তন নাটকখানি
অধ্যাপক শ্রীযুক্ত যত্ননাথ সরকার মহাশয়ের নামে
উৎসর্গ করিলাম

১৫ আষাঢ় ১৩১৮
শিলাইদহ

শ্রীরবীন্দ্রনাথ ঠাকুর

অচলায়তন

STATE CENTRAL LIBRARY,
WEST BENGAL
CALCUTTA

১

আচলায়তনের গৃহ

পঞ্চক

পঞ্চক ।

গান

তুমি ডাক দিয়েছ কোন্ সকালে
কেউ তা জানে না,
আমার মন যে কাদে আপন মনে
কেউ তা মানে না ।
ফিরি আমি উদাস প্রাণে,
তাকাই সবার মুখের পানে,
তোমার মতন এমন টানে
কেউ তো টানে না ।

মহাপঞ্চকের প্রবেশ

মহাপঞ্চক । গান ! আবার গান !

পঞ্চক । দাদা, তুমি তো দেখলে—তোমাদের এখানকার মন্ত্রতন্ত্র
আচার-আচমন সূত্র-বৃত্তি কিছুই পারলুম না ।

মহাপঞ্চক । সে তো দেখতে বাকি নেই—কিন্তু সেটা কি খুব আনন্দ
করবার বিষয় ? তাই নিয়ে কি গলা ছেড়ে গান গাইতে হবে ?

পঞ্চক । একমাত্র ওইটেই যে পারি ।

মহাপঞ্চক। পারি! ভারি অহংকার। গান তো পাখিও গাইতে পারে। সেই যে বজ্রবিদ্বারণ মন্ত্রটা আজ সাত দিন ধরে তোমার মুখস্থ হল না আজ তার কৌ করলে ?

পঞ্চক। সাত দিন যেমন হয়েছে অষ্টম দিনেও অনেকটা সেইরকম। বরঞ্চ একটু খারাপ।

মহাপঞ্চক। খারাপ! তাঁর মানে কৌ হল।

পঞ্চক। জিনিসটা যতই পুরোনো হচ্ছে মন ততই লাগছে না, ভুল ততই করছি—ভুল যতই বেশিবার করছি ততই সেইটেই পাকা হয়ে যাচ্ছে। তাই, গোড়ায় তোমরা যেটা বলে দিয়েছিলে আর আজ আমি যেটা আওড়াচ্ছি দুটোর মধ্যে অনেকটা তফাত হয়ে গেছে। চেনা শক্ত।

মহাপঞ্চক। সেই তফাতটা ঘোচাতে হবে, নির্বোধ।

পঞ্চক। সহজেই ঘোচে, যদি তোমাদেরটাকেই আমার মতো করে নাও! নইলে, আমি তো পারব না।

মহাপঞ্চক। পারবে না কৌ। পারতেই হবে।

পঞ্চক। তাহলে আর-একবার সেই গোড়া থেকে চেষ্টা করে দেখি—একবার মন্ত্রটা আউড়ে দিয়ে যাও।

মহাপঞ্চক। আচ্ছা, বেশ, আমার সঙ্গে আবৃত্তি করে যাও। ওঁ তট তট তোতয় তোতয় স্ফট স্ফট স্ফোটয় স্ফোটয় ঘুণ ঘুণ ঘুণাপয় ঘুণাপয় স্বর বসন্তানি। চুপ করে রইলে যে!

পঞ্চক। ওঁ তট তট তোতয় তোতয়—আচ্ছা দাদা।

মহাপঞ্চক। আবার দাদা! মন্ত্রটা শেষ করো বলছি।

পঞ্চক। একটা কথা জিজ্ঞাসা করি—এ মন্ত্রটার ফল কৌ।

মহাপঞ্চক। এ মন্ত্র প্রত্যহ সূর্যোদয়-সূর্যাস্তে উন্মত্তর বার করে জপ করলে নববই বৎসর পরমায় হয়।

পঞ্চক। রক্ষা করো দাদা। এটা জপ করতে গিয়ে আমার একবেলাকেই নবহই বছৰ মনে হয়—দ্বিতীয় বেলায় মনে হয় মরেই গেছি।

মহাপঞ্চক। আমার তাই হয়েও তোমার এই দশা! তোমার জন্মে আমাদের এই অচলায়তনের সকলের কাছে কি আমার কম লজ্জা।

পঞ্চক। লজ্জার তো কোনো কারণ নেই দাদা।

মহাপঞ্চক। কারণ নেই?

পঞ্চক। না। তোমার পাণ্ডিত্যে সকলে আশ্চর্য হয়ে যায়। কিন্তু তার চেয়ে টের বেশি আশ্চর্য হয় তুমি আমারই দাদা বলে।

মহাপঞ্চক। এই বানরটার উপর রাগ করাও শক্ত। দেখো পঞ্চক তুমি তো আর বালক নও—তোমার এখন বিচার করে দেখবার বয়স হয়েছে।

পঞ্চক। তাই তো বিপদে পড়েছি। আমি যা বিচার করি তোমাদের বিচার একেবারে তার উলটো দিকে চলে, অথচ তার জন্মে যা দণ্ড সে আমাকে একলাই ভোগ করতে হয়।

মহাপঞ্চক। পিতার মৃত্যুন পর কৌদরিদ্র হয়ে, সকলের কৌ অবজ্ঞা নিয়েই এই আয়তনে আমরা প্রবেশ করেছিলুম, আর আজ কেবল নিজের শক্তিতে সেই অবজ্ঞা কাটিয়ে কত উপরে উঠেছি, আমার এই দৃষ্টান্তও কি তোমাকে একটু সচেষ্ট করে না।

পঞ্চক। সচেষ্ট করবার তো কথা নয়। তুমি যে নিজগুণেই দৃষ্টান্ত হয়ে বসে আছ, ওর মধ্যে আমার চেষ্টার তো কিছু মাত্র দরকার হয় না। তাই নিশ্চিন্ত আছি।

মহাপঞ্চক। ওই শঙ্খ বাজল। এখন আমার সপ্তকুমারিকাগাথা পাঠের সময়। কিন্তু বলে যাচ্ছি সময় নষ্ট ক'রো না।

প্রস্তান

পঞ্চক ।

গান

বেজে ওঠে পঞ্চমে স্বর,
 কেঁপে ওঠে বন্ধ এ ঘর,
 বাহির হতে দুয়ারে কর
 কেউ তো হানে না ।

আকাশে কার ব্যাকুলতা,
 বাতাস বহে কার বারতা,
 এ পথে সেই গোপন কথা
 কেউ তো আনে না ।

তুমি ডাক দিয়েছ কোন্ সকালে
 কেউ তা জানে না ।

ছাত্রদলের প্রবেশ

প্রথম ছাত্র । ওহে পঞ্চক ।

পঞ্চক । না ভাই, আমাকে বিরক্ত ক'রো না ।

দ্বিতীয় ছাত্র । কেন । হ্ল কী তোমার ।

পঞ্চক । ওঁ তট তট তোতয় তোতয়—

তৃতীয় ছাত্র । এখনও তট তট তোতয় যুচল না ? ও যে
 আমাদের কোন্কালে শেষ হয়ে গেছে তা মনেও আনতে পারিনে ।

প্রথম ছাত্র । না ভাই, পঞ্চককে একটু পড়তে দাও ; নইলে ওর
 কী গতি হবে । এখনও ও বেচারা তট তট করে যুরছে—আমাদের যে
 খজাগ্রকেয়ুরী পর্যন্ত শেষ হয়ে গেছে !

দ্বিতীয় ছাত্র । আচ্ছা পঞ্চক, এখনও তুমি চক্রেশমন্ত্র শেখনি ?

পঞ্চক । না ।

তৃতীয় ছাত্র। মরীচি ?

পঞ্চক। না।

প্রথম ছাত্র। মহামরীচি ?

পঞ্চক। না।

দ্বিতীয় ছাত্র। পর্ণশবরী ?

পঞ্চক। না।

দ্বিতীয় ছাত্র। আচ্ছা বলো দেখি হরেত পক্ষীর নখাগ্রে যে-
পরিমাণ ধূলিকণা লাগে সেই পরিমাণ যদি—

পঞ্চক। আরে ভাই হরেত পক্ষীই কোনোজন্মে দেখিনি তো তার
নখাগ্রের ধূলিকণা।

প্রথম ছাত্র। হরেত পক্ষী তো আমরাও কেউ দেখিনি—শুনেছি সে
দধিসমুদ্রের পারে মহাজন্মুদ্বীপে বাস করে—কিন্ত এ-সমস্ত তো জানা চাই,
নিতান্ত মূর্খ হয়ে জীবনটাকে মাটি করলে তো চলবে না।

দ্বিতীয় ছাত্র। পঞ্চক, তুমি আর বুঝ সময় নষ্ট ক'রো না। তোমার
কাছে তো কেউ বেশি আশা করে না। অস্তত শৃঙ্গভেরিত্রত,
কাকচঙ্গপরীক্ষা, ছাগলোমশোধন, দ্বাবিংশপিশাচভয়ভঙ্গন—এগুলো তো
জানা চাইই—নইলে তুমি অচলায়তনের ছাত্র বলে লোকসমাজে পরিচয়
দেবে কোন্ত লজ্জায় ?

তৃতীয় ছাত্র। চলো বিশ্বস্তর। আমরা যাই, ও একটু পড়ুক।

[গমনোদ্ধত

পঞ্চক। ওহে বিশ্বস্তর। তট তট তোতয় তোতয়—

বিশ্বস্তর। কেন? আবার ডাক কেন?

পঞ্চক। সঞ্জীব, জয়োত্তম। তট তট তোতয় তোতয়—

সঞ্জীব। কী হয়েছে। পড়ো না।

পঞ্চক। দোহাই তোমাদের, একেবারে চলে যেয়ো না। ওই
শব্দগুলো আওড়াতে আওড়াতে মাঝে মাঝে বুদ্ধিমান জীবের মুখ দেখলে
তবু আশ্বাস হয় যে জগৎটা বিধাতা পুরুষের প্রলাপ নয়। -

জয়েত্তম। না হে, মহাপঞ্চক বড়ো রাগ করেন। তিনি মনে
করেন, তোমার যে কিছু হচ্ছে না তার কারণ আমরা।

পঞ্চক। আমি যে কারও কোনো সাহায্য না নিয়ে কেবলমাত্র
নিজগুণেই অকৃতার্থ হতে পারি দাদা আমার এটুকু ক্ষমতাও স্বীকার
করেন না এতেই আমি বড়ো দুঃখিত হই। আচ্ছা ভাই তোমরা
ওইথানে একটু তফাতে বসে কথাবার্তা কও। যদি দেখ একটু অনুমনক্ষ
হয়েছি আমাকে সতর্ক করে দিয়ো। স্ফট স্ফট স্ফোটয় স্ফোটয়—

জয়েত্তম। আচ্ছা বেশ, এইথানে আমরা বসছি।

সঞ্চীব। বিশ্বস্তর, তুমি যে বললে এবার আমাদের আয়তনে গুরু
আসবেন সেটা শুনলে কার কাছ থেকে?

বিশ্বস্তর। কী জানি, কারা সব বলাকওয়া করছিল। কেমন করে
চারিদিকেই রটে গিয়েছে যে চাতুর্মাস্যের সময় গুরু আসবেন।

পঞ্চক। ওহে বিশ্বস্তর, বল কী? আমাদের গুরু আসবেন
নাকি?

সঞ্চীব। আবার পঞ্চক! তোমার কাজ তুমি করো না!

পঞ্চক। ঘুণ ঘুণ ঘুণাপয় ঘুণাপয়—

জয়েত্তম। কিন্তু অধ্যাপকদের কারও কাছে শুনেছ কি? মহাপঞ্চক
কী বলেন?

বিশ্বস্তর। তাঁকে জিজ্ঞাসা করাই বুঝ। মহাপঞ্চক কারও প্রশ্নের
উত্তর দিয়ে সময় নষ্ট করেন না। আজকাল তিনি আর্যঅষ্টোত্তরশত নিয়ে
পড়েছেন—তাঁর কাছে দেঁষে কে।

পঞ্চক। চলো না ভাই, আচার্যদেবের কাছে যাই—তাঁকে জিজ্ঞাসা
করলেই—

জয়েত্তম। আবার! ফের!

পঞ্চক। ঘুণ ঘুণ ঘুণাপয় ঘুণাপয়—

জয়েত্তম। আমার তো উনিশ বছর বয়স হল—এর মধ্যে একবারও
আমাদের গুরু এ আয়তনে আসেননি। আজ তিনি হঠাতে আসতে
যাবেন এটা বিশ্বাস করতে পারিনে।

সঞ্জীব। তোমার তর্কটা কেমনতরো হল হে, জয়েত্তম? উনিশ
বছর আসেননি বলে বিশ বছরে আসাটা অসম্ভব হল কোন্
যুক্তিতে?

বিশ্বস্তুর। তাহলে অঙ্কশাস্ত্রটাই অপ্রমাণ হয়ে যায়! তবে তো
উনিশ পর্যন্ত বিশ নেই বলে উনিশের পরেও বিশ থাকতে পারে না।

সঞ্জীব। শুধু অঙ্ক কেন, বিশ্বব্রহ্মাণ্ডটাও টেকে না। কারণ যা
এ-মুহূর্তে ঘটেনি তা ও-মুহূর্তেই বা ঘটে কী করে?

জয়েত্তম। আরে। ওইটেই তো আমার তর্ক। কে বললে
ঘটে? যা পূর্বে ঘটেনি তা কিছুতেই পরে ঘটতে পারে না। আচ্ছা,
এসো, কিছু যে ঘটে সেইটে প্রমাণ করে দাও।

পঞ্চক। (জয়েত্তমের কাঁধে চড়িয়া) প্রমাণ? এই দেখো প্রমাণ।
ঘুণ ঘুণ ঘুণাপয় ঘুণাপয়—

জয়েত্তম। আঃ পঞ্চক! কর কী। নাবো বলছি। আঃ
নাবো।

পঞ্চক। আমি যে তোমার কাঁধে চড়েছি সেটা প্রমাণ না করে দিলে
আমি কিছুতেই নাবছিনে। ঘুণ ঘুণ ঘুণাপয় ঘুণাপয়—

মহাপঞ্চকের প্রবেশ

মহাপঞ্চক। পঞ্চক। তুমি বড়ো উৎপাত করছ।

পঞ্চক। দাদা, এরাই গোল করছিল। আমি আরও থামিয়ে দেবার জন্যেই এসেছি। তট তট তোতয় তোতয় স্ফট স্ফট—

মহাপঞ্চক। তোমার নিজের কাজ অবহেলা করবার একটা উপলক্ষ্য জুটলেই তোমাকে সংবরণ করা অসম্ভব।

• বিশ্বস্তর। দেখুন, একটা জনশ্রুতি শুনতে পাচ্ছি, বর্ষার আরম্ভে আমাদের গুরু নাকি এখানে আসবেন।

মহাপঞ্চক। আসবেন কিনা তা নিয়ে আন্দোলন না করে যদিই আসেন তার জন্যে প্রস্তুত হও।

পঞ্চক। তিনি যদি আসেন তিনিই প্রস্তুত হবেন। এদিক থেকে আবার আমরাও প্রস্তুত হতে গেলে হয়তো মিথ্যে একটা গোলমাল হবে।

মহাপঞ্চক। ভারি বুদ্ধিমানের মতোই কথা বললে।

পঞ্চক। অন্নের গ্রাস যখন মুখের কাছে এগোয় তখন মুখ স্থির হয়ে সেটা গ্রহণ করে—এ তো সোজা কথা। আমার ভয় হয় গুরু এসে হয়তো দেখবেন আমরা যেদিক দিয়ে প্রস্তুত হতে গিয়েছি সেদিকটা উলটো। সেইজন্যে আমি কিছু করিনে।

মহাপঞ্চক। পঞ্চক, আবার তর্ক?

পঞ্চক। তর্ক করতে পারিনে বলে রাগ কর, আবার দেখি পারলেও রাগ?

মহাপঞ্চক। যাও তুমি।

পঞ্চক। যাচ্ছি, কিন্তু বলো না গুরু কি সত্যাই আসবেন?

মহাপঞ্চক। তাঁর সময় হলেই তিনি আসবেন।

প্রস্থান

সঞ্জীব। মহাপঞ্চক কোনো কথার শেষ উত্তর দিয়েছেন এমন
কথনোই শুনিনি।

জয়োত্তম। কোনো কথার শেষ উত্তর নেই বলেই দেন না।
মূর্খ যারা তারাই প্রশ্ন জিজ্ঞাসা করে, যারা অল্প জানে তারাই জবাব
দেয়, আর যারা বেশি জানে তারা জানে যে জবাব দেওয়া যায় না।

পঞ্চক। সেইজন্তেই উপাধ্যায়মণ্ডায় যখন শাস্ত্র থেকে প্রশ্ন করেন
তোমরা জবাব দাও কিন্তু আমি একেবারে মুক হয়ে থাকি।

জয়োত্তম। কিন্তু প্রশ্ন না করতেই যে কথাগুলো বল, তাতেই—

পঞ্চক। হা, তাতেই আমার খ্যাতি রঞ্চে গেছে, নইলে কেউ
আমাকে চিনতেই পারত না।

বিশ্বস্তর। দেখো পঞ্চক, যদি গুরু আসেন তাহলে তোমার জন্তে
আমাদের সকলকেই লজ্জা পেতে হবে।

সঞ্জীব। আটান্ন প্রকার আচমনবিধির মধ্যে পঞ্চক বড়োজোর পাঁচটা
প্রকরণ এতদিনে শিখেছে।

পঞ্চক। সঞ্জীব, আমার মনে আঘাত দিয়ো না। অত্যুক্তি করছ।

সঞ্জীব। অত্যুক্তি!

পঞ্চক। অত্যুক্তি'নয় তো কী। তুমি বলছ পাঁচটা শিখেছি।
আমি ছুটোর বেশি একটাও শিখিনি। তৃতীয় প্রকরণে মধ্যমাঙ্গুলির
কোন পর্ণটা কতবার কতখানি জলে ডুবোতে হবে সেটা ঠিক করতে
গিয়ে অন্ত আঙুলের অস্তিত্বই ভুলে যাই। কেবল একমাত্র বৃন্দাঙ্গুষ্ঠটা
আমার খুব অভ্যাস হয়ে গেছে। হাসছ কেন? বিশ্বাস করছ না
বুঝি?

জয়োত্তম। বিশ্বাস করা শক্ত।

পঞ্চক। সেদিন উপাধ্যায়মণ্ডায় যখন পরীক্ষা করতে এলেন তখন-

তাকে ওই বৃদ্ধাঙ্গুষ্ঠ পর্যন্ত দেখিয়ে বিশ্বিত করবার চেষ্টায় ছিলুম কিন্তু তিনি চোখ পাকিয়ে তর্জনী তুললেন, আমার আর এগোল না।

বিশ্বস্তর। না, পঞ্চক, এবার গুরু আসার জন্যে তোমাকে প্রস্তুত হতে হবে।

পঞ্চক। পঞ্চক পৃথিবীতে যেমন অপ্রস্তুত হয়ে জন্মেছে তেমনি অপ্রস্তুত হয়েই মরবে। ওর ওই একটি মহৎজ্ঞণ আছে, ওর কখনো বদল হয় না।

সঞ্চীব। তোমার সেই গুণে উপাধ্যায়মশায়কে যে মুঝ করতে পেরেছে তা তো বোধ হয় না।

পঞ্চক। আমি তাকে কত বোঝাবার চেষ্টা করি যে বিদ্যাসম্বন্ধে আমার একটুও নড়চড় নেই—ওই যাকে বলে ক্রবনক্ষত্র—তাতে স্ববিধা এই যে এখানকার ছাত্রবাচক কে কতদূর এগোল তা আমার সঙ্গে তুলনা করলেই বোঝা যাবে।

জয়েত্তম। তোমার আশ্চর্য এই স্বযুক্তিতে উপাধ্যায়মশায়ের বোধ হয়—

পঞ্চক। না, কিছু না—তাঁর মনে কিছুমাত্র বিকার ঘটল না। আমার সম্বন্ধে পূর্বে তাঁর যে-ধারণা ছিল সেইটেই দেখলুম আরও পাকা হল।

সঞ্চীব। আমরা যদি উপাধ্যায়মশায়কে তোমার মতন অমন যা-তা বলতুম তাহলে রক্ষা থাকত না। কিন্তু পঞ্চকের বেলায়—

পঞ্চক। তার মানে আছে। কুতক্টা আমার পক্ষে এমনি সুন্দর স্বাভাবিক যে সেটা আমার মুখে ভাবি মিষ্টি শোনায়। সকলেই খুশি হয়ে বলে, ঠিক হয়েছে, পঞ্চকের মতোই কথা হয়েছে। কিন্তু ঘোরতর বুদ্ধির পরিচয় না দিতে পারলে তোমাদের আদর নেই। এমনি তোমরা হতভাগ্য।

জয়েত্তম । যাও ভাই পঞ্চক, আর ব'কো না । আমরা চললুম ।
 তুমি একটু মন দিয়ে পড়ো । তিনজনের প্রস্তান
 পঞ্চক । হবে না, আমার কিছুই হবে না । এখানকার একটা মন্ত্রও
 আমার থাটল না ।

গান

দূরে কোথায় দূরে দূরে
 মন বেড়ায় গো ঘুরে ঘুরে ।
 যে বাঁশিতে বাতাস কাদে
 সেই বাঁশিটির স্বরে স্বরে ।
 যে-পথ সকল দেশ পারায়ে
 উদাস হয়ে যায় হারায়ে,
 সে-পথ বেয়ে কাঙাল পরান
 যেতে চায় কোন্ অচিন পুরে ।

ও কী ও ! কান্না শুনি যে । এ নিশ্চয়ই স্বভদ্র । আমাদের এই
 আয়তনে ওর চোখের জল আর শুকোল না । ওর কান্না আমি সইতে
 পারিনে । প্রস্তান

বালক স্বভদ্রকে লইয়া পঞ্চকের পুনঃপ্রবেশ

পঞ্চক । তোর কোনো ভয় নেই ভাই, কোনো ভয় নেই । তুই
 আমার কাছে বল—কী হয়েছে বল ।
 স্বভদ্র । আমি পাপ করেছি ।
 পঞ্চক । পাপ করেছিস ? কী পাপ ?
 স্বভদ্র । সে আমি বলতে পারব না ! ভয়ানক পাপ । আমার কী
 হবে ।

পঞ্চক। তোর সব পাপ আমি কেড়ে নেব, তুই বল।

সুভদ্র। আমি আমাদের আয়তনের উত্তর দিকের—

পঞ্চক। উত্তর দিকের ?

সুভদ্র। হঁা, উত্তর দিকের জানলা খুলে—

পঞ্চক। জানলা খুলে কী করলি ?

সুভদ্র। বাইরেটা দেখে ফেলেছি।

পঞ্চক। দেখে ফেলেছিস ? শুনে লোভ হচ্ছে যে।

সুভদ্র। হঁা পঞ্চকদাদা। কিন্তু বেশিক্ষণ না—একবার দেখেই তখনই বন্ধ করে ফেলেছি। কোন্ প্রায়শিত্ত করলে আমার পাপ যাবে ?

পঞ্চক। ভুলে গেছি ভাই। প্রায়শিত্ত বিশ-পঁচিশ হাজার রুম্য আছে ;—আমি যদি এই আয়তনে না আসতুম তাহলে তার বাবো আনাই কেবল পুঁথিতে লেখা থাকত—আমি আসার পর প্রায় তার সব-কটাই ব্যবহারে লাগাতে পেরেছি, কিন্তু মনে রাখতে পারিনি।

বালকদলের প্রবেশ

প্রথম বালক। অঁ্যা, সুভদ্র। তুমি বুঝি এখানে।

দ্বিতীয় বালক। জান পঞ্চকদাদা, সুভদ্র কী ভয়ানক পাপ করেছে।

পঞ্চক। চুপ চুপ। ভয় নেই সুভদ্র, কাদছিস কেন ভাই। প্রায়শিত্ত করতে হয়তো করবি। প্রায়শিত্ত করতে ভাবি মজা। এখানে রোজই একঘেয়ে রকমের দিন কাটে, প্রায়শিত্ত না থাকলে তো মানুষ টিকতেই পারত না।

প্রথম বালক। (চুপি চুপি) জান পঞ্চকদাদা, সুভদ্র উত্তর দিকের জানলা—

পঞ্চক। আচ্ছা আচ্ছা, সুভদ্রের মতো তোদের অমন সাহস আছে ?

তৃতীয় বালক। আমাদের আয়তনের উত্তর দিকটা যে একজটা দেবীর।

তৃতীয় বালক। সেদিক থেকে আমাদের আয়তনে যদি একটুও হাওয়া ঢোকে তাহলে যে সে—

পঞ্চক। তাহলে কী।

তৃতীয় বালক। সে যে ভয়ানক।

পঞ্চক। কী ভয়ানক শুনিই না।

তৃতীয় বালক। জানিনে, কিন্তু সে ভয়ানক।

স্বভদ্র। পঞ্চকদাদা, আমি আর কখনো খুলব না পঞ্চকদাদা।
আমার কী হবে।

পঞ্চক। শোন্ বলি স্বভদ্র, কিসে কী হয় আমি ভাই কিছুই জানিনে—কিন্তু যাই হ'ক না, আমি তাতে একটুও ভয় করিনে।

স্বভদ্র। ভয় কর না?

সকলে ছেলে। ভয় কর না?

পঞ্চক। না। আমি তো বলি, দেখিই না কী হয়।

সকলে। (কাছে ঘেঁষিয়া) আচ্ছা দাদা, তুমি বুঝি অনেক দেখেছ।

পঞ্চক। দেখেছি বই কি। ওমাসে শনিবারে যেদিন মহাময়ূরী দেবীর পূজা পড়ল সেদিন আমি কাঁসার থালায় ইচ্ছুরের গতের মাটি রেখে তার উপর পাঁচটা শেঁয়াল-কাটার পাতা আর তিনটে মাষকলাই সাজিয়ে নিজে আঠারো বার ফুঁ দিয়েছি।

সকলে। অ্যা। কী ভয়ানক। আঠারো বার!

স্বভদ্র। পঞ্চকদাদা, তোমার কী হল।

পঞ্চক। তিনদিনের দিনে যে সাপটা এসে আমাকে নিশ্চয় কামড়াবে কথা ছিল সে আজ পর্যন্ত আমাকে খুঁজে বের করতে পারেনি।

প্রথম বালক। কিন্তু ভয়ানক পাপ করেছ তুমি।

দ্বিতীয় বালক। মহাময়ূরী দেবী ভয়ানক রাগ করেছেন।

পঞ্চক। তাঁর রাগটা কী রকম সেইটে দেখবার জন্যেই তো এ-কাজ করেছি।

স্বভদ্র। কিন্তু পঞ্চকদাদা, যদি তোমাকে সাপে কামড়াত।

পঞ্চক। তাহলে এ সমস্কে মাথা থেকে পা পর্যন্ত কোথাও কোনো সন্দেহ থাকত না।

প্রথম বালক। কিন্তু পঞ্চকদাদা, আমাদের উত্তর দিকের জানলাটা—

পঞ্চক। সেটাও আমাকে একবার খুলে দেখতে হবে স্থির করেছি।

স্বভদ্র। তুমিও খুলে দেখবে?

পঞ্চক। ইঁ ভাই স্বভদ্র, তাহলে তুই তোর দলের একজন পাবি।

প্রথম বালক। না পঞ্চকদাদা, পায়ে পড়ি পঞ্চকদাদা, তুমি—

পঞ্চক। কেন রে, তোদের তাতে ভয় কী।

দ্বিতীয় বালক। সে যে ভয়ানক।

পঞ্চক। ভয়ানক না হলে মজা কিসের।

তৃতীয় বালক। সে যে ভয়ানক পাপ।

প্রথম বালক। মহাপঞ্চকদাদা আমাদের বলে দিয়েছেন, ওতে মাতৃহত্যার পাপ হয়। কেননা, উত্তর দিকটা যে একজটা দেবীর।

পঞ্চক। মাতৃহত্যা করলুম না অথচ মাতৃহত্যার পাপটা করলুম সেই মজাটা কী রকম, দেখতে আমার ভয়ানক কৌতুহল।

প্রথম বালক। তোমার ভয় করবে না?

পঞ্চক। কিছু না। ভাই স্বভদ্র তুই কী দেখলি বল দেখ।

দ্বিতীয় বালক। না, না, বলিসনে।

তৃতীয় বালক। না, সে আমরা শুনতে পারব না—কী ভয়ানক।
 প্রথম বালক। আচ্ছা, একটু, খুব একটুখানি বল্ ভাই।
 স্বভদ্র। আমি দেখলুম সেখানে পাহাড়, গোরু চরছে—
 বালকগণ। (কানে আঙুল দিয়া) ও বাবা, না না, আর
 শুনব না। আর ব'লো না স্বভদ্র। ওই যে উপাধ্যায়মশায় আসছেন।
 চল্ চল্—আর না।

পঞ্চক। কেন। এখন তোমাদের কৌ।

প্রথম বালক। বেশ, তাও জান না বুবি। আজ যে পূর্বফাস্তুনী নক্ষত্র—
 পঞ্চক। তাতে কৌ।

দ্বিতীয় বালক। আজ কাকিনী সরোবরের নৈঝ'ত কোণে
 টেঁড়িসাপের খোলস খুঁজতে হবে না ?

পঞ্চক। কেন রে।

প্রথম বালক। তুমি কিছু জান না পঞ্চকদাদা ! সেই খোলস কালো
 রঙের ঘোড়ার'লেজের সাতগাছি চুল দিয়ে বেঁধে পুড়িয়ে ধোঁয়া করতে
 হবে যে।

দ্বিতীয় বালক। আজ যে পিতৃপুরুষেরা সেই ধোঁয়া প্রাণ করতে
 আসবেন।

পঞ্চক। তাতে তাদের কষ্ট হবে না ?

প্রথম বালক। পুণ্য হবে যে, ভয়ানক পুণ্য।

বালকগণের প্রস্থান

উপাধ্যায়ের প্রবেশ

উপাধ্যায়। পঞ্চককে শিশুদের দলেই প্রায় দেখতে পাই।

পঞ্চক। এই আয়তনে গুদের সঙ্গেই আমার বুদ্ধির একটু মিল হয়।

ওরা একটু বড়ো হলেই আর তখন—

উপাধ্যায়। কিন্তু তোমার সংসর্গে যে ওরা অসংহত হয়ে উঠছে। সেদিন পটুবর্ম আমার কাছে এসে নালিশ করেছে শুক্রবারের প্রথম প্রহরেই উপত্তিজ্ঞ তার গায়ের উপর হাই তুলে দিয়েছে।

পঞ্চক। তা দিয়েছে বটে, আমি স্বয়ং সেখানে উপস্থিত ছিলুম।

উপাধ্যায়। সে আমি অহুমানেই বুঝেছি নইলে এতবড়ো আযুক্ষয়কর অনিয়মটা ঘটবে কেন। শুনেছি তুমি নাকি সকলের সাহস বাড়িয়ে দেবার জন্য পটুবর্মকে ডেকে তোমার গায়ের উপর এক-শ বার হাই তুলতে বলেছিলে ?

পঞ্চক। আপনি ভুল শুনেছেন।

উপাধ্যায়। ভুল শুনেছি ?

পঞ্চক। একলা পটুবর্মকে নয় সেখানে যত ছেলে ছিল প্রত্যেককেই আমার গায়ের উপর অন্তত দশটা করে হাই তুলে যাবার জন্যে ডেকেছিলুম—পক্ষপাত করিনি।

উপাধ্যায়। প্রত্যেককেই ডেকেছিলে ?

পঞ্চক। প্রত্যেককেই। আপনি বরঞ্জ জিজ্ঞাসা করে জানবেন। কেউ সাহস করে এগোল না। তারা হিসাব করে দেখলে পনেরো জ্বন ছেলেতে মিলে দেড়-শ হাই তুললে তাতে আমার সমস্ত আয়ু ক্ষয় হয়ে গিয়েও আরও অনেকটা বাকি থাকে, সেই উভ্রূটাকে নিয়ে যে কৌ হবে তাই স্থির করতে না পেরে তারা মহাপঞ্চকদাদাকে প্রশ্ন জিজ্ঞাসা করতে গেল, তাতেই তো আমি ধরা পড়ে গেছি।

উপাধ্যায়। দেখো, তুমি মহাপঞ্চকের ভাই বলে এতদিন অনেক সহ করেছি কিন্তু আর চলবে না। আমাদের গুরু আসছেন শুনেছ ?

পঞ্চক। গুরু আসছেন ? নিশ্চয় সংবাদ পেয়েছেন ?

উপাধ্যায়। হঁ। কিন্তু এতে তোমার উৎসাহের তো কোনো কারণ নেই।

পঞ্চক। আমারই তো গুরুর দরকার বেশি, আমার যে কিছুই শেখা হয়নি।

সুভদ্রের প্রবেশ

সুভদ্র। উপাধ্যায়মশায়।

পঞ্চক। আরে পালা পালা। উপাধ্যায়মশায়ের কাছ থেকে একটু পরমার্থতত্ত্ব শুনছি এখন বিরক্ত করিসনে, একেবারে দৌড়ে পালা।

উপাধ্যায়। কৌ সুভদ্র, তোমার বক্তব্য কৌ শীঘ্র বলে যাও।

সুভদ্র। আমি ভয়ানক পাপ করেছি।

পঞ্চক। ভারি পঞ্জিত কিনা। পাপ করেছি! পালা বলছি।

উপাধ্যায়। (উৎসাহিত হইয়া) ওকে তাড়া দিছ কেন। সুভদ্র শুনে যাও।

পঞ্চক। আর রক্ষা নেই, পাপের একটুকু গন্ধ পেলে একেবারে মাছির মতো ছোটে।

উপাধ্যায়। কৌ বলছিলে।

সুভদ্র। আমি পাপ করেছি।

উপাধ্যায়। পাপ করেছ? আচ্ছা বেশ। তাহলে বসো। শোনা যাক।

সুভদ্র। আমি আয়তনের উত্তর দিকের—

উপাধ্যায়। বলো, বলো, উত্তর দিকের দেওয়ালে আঁক কেটেছ?

সুভদ্র। না, আমি উত্তর দিকের জানলায়—

উপাধ্যায়। বুঝেছি, কুমুই ঠেকিয়েছ। তাহলে তো সেদিকে আমাদের যতগুলি যজ্ঞের পাত্র আছে সমস্তই ফেলা যাবে। সাত মাসের বাচুরকে দিয়ে ওই জানলা না চাটাতে পারলে শোধন হবে না।

পঞ্চক। এটা আপনি ভুল বলছেন। ক্রিয়াসংগ্রহে আছে ভূমি-কুশাগ্রের বোটা দিয়ে একবার—

উপাধ্যায়। তোমার তো স্পর্ধা কম দেখিনে। কুলদত্তের ক্রিয়াসংগ্রহের অষ্টাদশ অধ্যায়টি কি কোনোদিন খুলে দেখা হয়েছে।

পঞ্চক। (জনান্তিকে) স্বভদ্র যাও তুমি।—কিন্তু কুলদত্তকে তো আমি—

উপাধ্যায়। কুলদত্তকে মান না? আচ্ছা, ভরবাজ মিশ্রের প্রয়োগ-প্রজ্ঞপ্তি তো মানতেই হবে—তাতে—

স্বভদ্র। উপাধ্যায়মশায় আমি ভয়ানক পাপ করেছি।

পঞ্চক। আবার। সেই কথাই তো হচ্ছে। তুই চুপ করু।

উপাধ্যায়। স্বভদ্র, উত্তরের দেয়ালে যে আঁক কেটেছ সে চতুর্কোণ, না গোলাকার?

স্বভদ্র। আঁক কাটিনি। আমি জানলা খুলে বাইরে চেয়েছিলুম।

উপাধ্যায়। (বসিয়া পড়িয়া) আঃ সর্বনাশ। করেছিস কী। আজ তিন-শ পঁয়তালিশ বছর শুই জানলা কেউ খোলেনি তা জানিস?

স্বভদ্র। আমার কী হবে।

পঞ্চক। (স্বভদ্রকে আলিঙ্গন করিয়া) তোমার জয়জয়কার হবে স্বভদ্র। তিন-শ পঁয়তালিশ বছরের আগল তুমি ঘুচিয়েছ। তোমার এই অসামান্য সাহস দেখে উপাধ্যায়মশায়ের মুখে আর কথা নেই।

স্বভদ্রকে টানিয়া লইয়া প্রস্থান

উপাধ্যায়। জানিনে কী সর্বনাশ হবে। উত্তরের অধিষ্ঠাত্রী যে একজটা দেবী। বালকের দুই চক্ষু মুহূর্তেই পাথর হয়ে গেল না কেন তাই ভাবছি। যাই আচার্যদেবকে জানাই গে।

প্রস্থান

আচার্য ও উপাচার্যের প্রবেশ

আচার্য। এতকাল পরে আমাদের গুরু আসছেন।

উপাচার্য। তিনি প্রসন্ন হয়েছেন।

আচার্য। প্রসন্ন হয়েছেন? তা হবে। হয়তো প্রসন্নই হয়েছেন।

কিন্তু কেমন করে জ্ঞানব।

উপাচার্য। নইলে তিনি আসবেন কেন।

আচার্য। এক-এক সময়ে মনে ভয় হয় যে, হয়তো অপরাধের মাত্রা পূর্ণ হয়েছে বলেই তিনি আসছেন।

উপাচার্য। না, আচার্যদেব, এমন কথা বলবেন না। আমরা কঠোর নিয়ম সমস্তই নিঃশেষে পালন করেছি—কোনো ক্রটি ঘটেনি।

আচার্য। কঠোর নিয়ম? হ্যাঁ, সমস্তই পালিত হয়েছে।

উপাচার্য। বজ্রশুক্রিত্রি আমাদের আয়তনে এইবার নিয়ে ঠিক সাতাত্ত্ব বার পূর্ণ হয়েছে। আর কোনো আয়তনে এ কি সন্তুষ্পর হয়।

আচার্য। না আর কোথাও হতে পারে না।

উপাচার্য। কিন্তু তবু আপনার মনে এমন দ্বিধা হচ্ছে কেন।

আচার্য। দ্বিধা? তা দ্বিধা হচ্ছে সে-কথা স্বীকার করি। (কিছু-ক্ষণ নীরব থাকিয়া) দেখো সূতসোম, অনেক দিন থেকে মনের মধ্যে বেদনা জেগে উঠছে, কাউকে বলতে পারছিনে। আমি এই আয়তনের আচার্য; আমার মনকে যখন কোনো সংশয় বিদ্ধ করতে থাকে তখন একলা চুপ করে বহন করতে হয়। এতদিন তাই বহন করে এসেছি। কিন্তু ঘেদিন পত্র পেয়েছি গুরু আসছেন সেই দিন থেকে মনকে আর যেন চুপ করিয়ে রাখতে পারছিনে। সে কেবলই আমাদের প্রতিদিনের সকল কাজেই বলে বলে উঠছে—বৃথা, বৃথা, সুমস্তই বৃথা!

উপাচার্য। আচার্যদেব, বলেন কৌ। বৃথা, সমস্তই বৃথা?

আচার্য। সূতসোম, আমরা এখানে কতদিন হল এসেছি মনে পড়ে কি। কত বছর হবে?

উপাচার্য। সময় ঠিক করে বলা বড়ে কঠিন। এখানে মনের পক্ষে প্রাচীন হয়ে উঠতে বয়সের দরকার হয় না। আমার তো মনে হয় আমি জন্মের বহু পূর্ব হতেই এখানে স্থির হয়ে বসে আছি।

আচার্য। দেখো, সূতসোম, প্রথম যখন এখানে সাধনা আরম্ভ করেছিলুম তখন নবীন বয়স, তখন আশা ছিল সাধনার শেষে একটা-কিছু পাওয়া যাবে। সেইজন্তে সাধনা যতই কঠিন হচ্ছিল উৎসাহ আরও বেড়ে উঠছিল। তার পরে সেই সাধনার চক্রে ঘুরতে ঘুরতে একে-বারেই তুলে বসেছিলুম যে সিদ্ধি বলে কিছু একটা আছে। আজ গুরু আসবেন শুনে হঠাত মনটা থমকে দাঢ়াল—আজ নিজেকে জিজ্ঞাসা করলুম, ওরে পঙ্গিত, তোর সব শাস্ত্রই তো পড়া হল, সব ব্রতই তো পালন করলি, এখন বল মূর্খ কী পেয়েছিস। কিছু না, কিছু না, সূতসোম। আজ দেখছি—এই অতিদীর্ঘকালের সাধনা কেবল আপনাকেই আপনি প্রদক্ষিণ করেছে—কেবল প্রতিদিনের অন্তহীন পুনরাবৃত্তি রাশীকৃত হয়ে জমে উঠেছে।

উপাচার্য। ব'লো না, ব'লো না, এমন কথা ব'লো না। আচার্যদেব, আজ কেন হঠাত তোমার মন এত উদ্ভ্রান্ত হল।

আচার্য। সূতসোম, তোমার মনে কি তুমি শাস্তি পেয়েছে।

উপাচার্য। আমার তো একমুহূর্তের জন্যে অশাস্তি নেই।

আচার্য। অশাস্তি নেই?

উপাচার্য। কিছুমাত্র না। আমার অহোরাত্র একেবারে নিয়মে বাঁধা। সে হাজার বছরের বাঁধন। ক্রমেই সে পাথরের মতো বজ্রে

মতো শক্ত হয়ে জমে গেছে। এক মুহূর্তের জন্মেও কিছুই ভাবতে হয় না। এর চেয়ে আর শান্তি কী হতে পাবে।

আচার্য। না না, তবে আমি ভুল করছিলুম স্ফূর্তসোম, ভুল করছিলুম। যা আছে, এই ঠিক এইই ঠিক। যে করেই হ'ক এর মধ্যে শান্তি পেতেই হবে।

উপাচার্য। সেইজন্মেই তো অচলায়তন ছেড়ে আমাদের কোথাও বেরোনো নিষেধ। তাতে যে মনের বিক্ষেপ ঘটে—শান্তি চলে যায়।

আচার্য। ঠিক, ঠিক,—ঠিক বলেছ স্ফূর্তসোম। অচেনার মধ্যে গিয়ে কোথায় তার অন্ত পাব। এখানে সমস্তই জানা, সমস্তই অভ্যন্ত—এখানকার সমস্ত প্রশ্নের উত্তর এখনকারই সমস্ত শাস্ত্রের ভিতর থেকে পাওয়া যায়—তার জন্মে একটুও বাইরে যাবার দরকার হয় না। এই তো নিশ্চল শান্তি। গুরু, তুমি যখন আসবে, কিছু সরিয়ো না, কিছু আঘাত ক'রো না—চারিদিকেই আমাদের শান্তি, সেই বুঝে পা ফেলো। দয়া ক'রো, দয়া ক'রো আমাদের। আমাদের পা আড়ষ্ট হয়ে গেছে, আমাদের আর চলবার শক্তি নেই। . অনেক বৎসর অনেক যুগ যে এমনি করেই কেটে গেল—প্রাচীন, প্রাচীন, সমস্ত প্রাচীন হয়ে গেছে—আজ হঠাৎ ব'লো না যে নৃতনকে চাই—আমাদের আর সময় নেই।

উপাচার্য। আচার্যদেব, তোমাকে এমন বিচলিত হতে কখনো দেখিনি।

আচার্য। কী জানি, আমার কেমন মনে হচ্ছে কেবল একলা আমিই না, চারিদিকে সমস্তই বিচলিত হয়ে উঠেছে। আমার মনে হচ্ছে আমাদের এখানকার দেয়ালের প্রত্যেক পাথরটা পর্যন্ত বিচলিত। তুমি এটা অঙ্গুভব করতে পারছ না স্ফূর্তসোম?

উপাচার্য। কিছুমাত্র না। এখানকার অটল স্ফুর্ততার লেশমাত্র

বিচ্যুতি দেখতে পাচ্ছিনে। আমাদের তো বিচলিত হবার কথাও না। আমাদের সমস্ত শিক্ষা কোন্ কালে সমাধা হয়ে গেছে। আমাদের সমস্ত লাভ সমাপ্ত, সমস্ত সঞ্চয় পর্যাপ্ত।

আচার্য। আজ আমার একটু একটু মনে পড়ছে বহুপূর্বে সবপ্রথমে ; সেই ভোরের বেলা অঙ্ককার থাকতে থাকতে ফাঁর কাছে শিক্ষা আরম্ভ করেছিলুম তিনি গুরুই—তিনি পুঁথি নন, শাস্ত্র নন, বৃত্তি নন, তিনি গুরু। তিনি যা ধরিয়ে দিলেন তাই নিয়ে আরম্ভ করলুম—এতদিন মনে করে নিশ্চিন্ত ছিলুম সেইটেই বুঝি আছে, ঠিক চলছে—কিন্তু—

উপাচার্য। ঠিক আছে, ঠিক চলছে, আচার্যদেব, ভয় নেই। প্রভু, আমাদের এখানে সেই প্রথম উষার বিশুদ্ধ অঙ্ককারকে হাজার বছরেও নষ্ট হতে দিইনি। তারই পবিত্র অস্পষ্ট ছায়ার মধ্যে আমরা আচার্য এবং ছাত্র, প্রবীণ এবং নবীন, সুকলেই স্থির হয়ে বসে আছি। তুমি কি বলতে চাও এতদিন পরে 'কেউ এসে সেই আমাদের ছায়া নাড়িয়ে দিয়ে যাবে। সর্বনাশ। সেই ছায়া !

আচার্য। সর্বনাশই তো।

উপাচার্য। তাহলে হবে কী। এতদিন যারা স্তুত হয়ে আছে তাদের কি আবার উঠতে হবে।

আচার্য। আমি তো তাই সামনে দেখছি। সে কি আমার স্বপ্ন। অথচ আমার তো মনে হচ্ছে এই সমস্তই স্বপ্ন, এই পাথরের প্রাচীর, এই বন্ধ দরজা, এই সব নানা রেখার গতি, এই স্তুপাকার পুঁথি, এই অহোরাত্র মন্ত্রপাঠের গুঞ্জনধ্বনি—সমস্তই স্বপ্ন।

উপাচার্য। ওই যে পঞ্চক আসছে। পাথরের মধ্যে কি ঘাস বেরোয়। এমন ছেলে আমাদের আয়তনে কী করে সন্তুষ্ট হল। শিশুকাল থেকেই ওর ভিতর এমন একটা প্রবল অনিয়ম আছে, তাকে কিছুতেই

দমন করা গেল না । ওই বালককে আমার ভয় হয় । ওই আমাদের দুর্ক্ষণ । এই আয়তনের মধ্যে ও কেবল তোমাকেই মানে । তুমি ওকে একটু ভৎসনা করে দিয়ো ।

আচার্য । আচ্ছা তুমি যাও । আমি ওর সঙ্গে একটু নিভৃতে কথা কয়ে দেখি ।

উপাচার্যের প্রস্থান

পঞ্চকের প্রবেশ

আচার্য । (পঞ্চকের গায়ে হাত দিয়া) বৎস, পঞ্চক ।

পঞ্চক । করলেন কী । আমাকে ছুঁলেন ?

আচার্য । কেন, বাধা কী আছে ।

পঞ্চক । আমি যে আচার রক্ষা করতে পারিনি ।

আচার্য । কেন পারিনি বৎস ।

পঞ্চক । প্রভু, কেন, তা আমি বলতে পারিনে । আমার পারবার উপায় নেই ।

আচার্য । সৌম্য, তুমি তো জান, এখানকার যে নিয়ম সেই নিয়মকে আশ্রয় করে হাজার বছর হাজার হাজার লোক নিশ্চিন্ত আছে । আমরা যে খুশি তাকে কি ভাঙ্গতে পারি ।

পঞ্চক । আচার্যদেব, যে-নিয়ম সত্য তাকে ভাঙ্গতে না দিলে তার যে পরীক্ষা হয় না ।

আচার্য । নিয়মের জন্য ভয় নয়, কিন্তু যে-লোক ভাঙ্গতে যাবে তারই বা দুর্গতি ঘটতে দেব কেন ।

পঞ্চক । আমি কোনো তর্ক করব না । আপনি নিজমুখে যদি আদেশ করেন যে, আমাকে সমস্ত নিয়ম পালন করতেই হবে তাহলে পালন করব । আমি আচার-অনুষ্ঠান কিছুই জানিনে, আমি আপনাকেই জানি ।

আচার্য। আদেশ করব—তোমাকে? সে আর আমার হাঁড়া হয়ে উঠবে না।

পঞ্চক। কেন আদেশ করবেন না প্রতু।

আচার্য। কেন। বলব বৎস? তোমাকে যখন দেখি আমি মুক্তিকে যেন চোখে দেখতে পাই। এত চাপেও যখন দেখলুম তোমার মধ্যে প্রাণ কিছুতেই মরতে চায় না তখনই আমি প্রথম বুঝতে পারলুম মানুষের মন মন্ত্রের চেয়ে সত্য, হাজার বছরের অতিপ্রাচীন আচারের চেয়ে সত্য। যাও বৎস, তোমার পথে তুমি যাও। আমাকে কোনো কথা জিজ্ঞাসা ক'রো না।

পঞ্চক। আচার্যদেব, আপনি জানেন না কিন্তু আপনিই আমাকে নিয়মের চাকার নিচে থেকে টেনে নিয়েছেন।

আচার্য। কেমন করে বৎস।

পঞ্চক। তা জানিনে, কিন্তু আপনি আমাকে এমন একটা-কিছু দিয়েছেন যা আচারের চেয়ে নিয়মের চেয়ে অনেক বেশি।

আচার্য। তুমি কী কর না কর আমি কোনোদিন জিজ্ঞাসা করিনে, কিন্তু আজ একটি কথা জিজ্ঞাসা করব। তুমি অচলায়তনের বাইরে গিয়ে শোণপাংশু জাতির সঙ্গে মেশ।

পঞ্চক। আপনি কি এর উত্তর শুনতে চান।

আচার্য। না না, থাক, ব'লো না। কিন্তু শোণপাংশুরা যে অত্যন্ত শ্লেষ্ণ। তাদের সহবাস কি—

পঞ্চক। তাদের স্থানে আপনার কি কোনো বিশেষ আদেশ আছে।

আচার্য। না না, আদেশ আমার কিছুই নেই। যদি ভুল করতে হয় তবে ভুল করো গে—তুমি ভুল করো গে—আমাদের কথা শুনো না। আমাদের গুরু আসছেন পঞ্চক—তাঁর কাছে তোমার মতো বালক হয়ে

যদি বসতে পারি—তিনি যদি আমার জরার বন্ধন খুলে দেন, তিনি যদি অভয় দিয়ে বলেন আজ থেকে ভুল করে করে সত্য জানবার অধিকার তোমাকে দিলুম, আমার মনের উপর থেকে হাজার দু-হাজার বছরের পুরাতন ভার যদি তিনি নামিয়ে দেন !

পঞ্চক । ওই উপাচার্য আসছেন—বোধ করি কাজের কথা আছে—
বিদায় হই ।

প্রস্থান

উপাধ্যায় ও উপাচার্যের প্রবেশ

উপাচার্য । (উপাধ্যায়ের প্রতি) আচার্যদেবকে তো বলতেই হবে ।
উনি নিতান্ত উদ্বিগ্ন হবেন—কিন্তু দায়িত্ব যে গুরই ।

আচার্য । উপাধ্যায়, কোনো সংবাদ আছে নাকি ।

উপাধ্যায় । অত্যন্ত মন্দ সংবাদ ।

আচার্য । অতএব সেটা সত্ত্বে বলা উচিত ।

উপাচার্য । উপাধ্যায় কথাটা বলে ফেলো । এদিকে প্রতিকারের সময় উত্তীর্ণ হয়ে যাচ্ছে । আমাদের গ্রহাচার্য বলছেন আজ তিনি প্রহর সাড়ে তিনি দণ্ডের মধ্যে দ্ব্যাতুকচরাংশলগ্নে ষা-কিছু করবার সময়—সেটা অতিক্রম করলেই গোপরিক্রমণ আরম্ভ হবে, তখন প্রায়শিক্তের কেবল এক পাদ হবে বিশ্র, অধ'পাদ বৈশ্শ, বাকি সমস্তটাই শুন্দু ।

উপাধ্যায় । আচার্যদেব, স্বভদ্র আমাদের আয়তনের উত্তর দিকের জানলা খুলে বাইরে দৃষ্টিপাত করেছে ।

আচার্য । উত্তর দিকটা তো একজটা দেবীর ।

উপাধ্যায় । সেই তো ভাবনা । আমাদের আয়তনের মন্ত্রঃপূত রুদ্ধ বাতাসকে সেখানকার হাওয়া কতটা দূর পর্যন্ত আক্রমণ করেছে বলা তো যায় না ।

উপাচার্য । এখন কথা হচ্ছে এ পাপের প্রায়শিত্ত কী ।

আচার্য । আমার তো স্বরূণ হয় না । উপাধ্যায় বোধ করি—

উপাধ্যায় । না, আমিও তো মনে আনতে পারিনে । আজ
তিনি-শ বছর এ প্রায়শিত্তটার প্রয়োজন হয়নি—সবাই ভুলেই গেছে ।
ওই যে মহাপঞ্চক আসছে—ঘদি কারও জানা থাকে তো সে ওর ।

উপাধ্যায় । মহাপঞ্চক, সব শুনেছ বোধ করি ।

মহাপঞ্চক । সেই জগ্নেই তো এলুম ; আমরা এখন সকলেই অঙ্গচি,
বাহিরের হাওয়া আমাদের আয়তনে প্রবেশ করেছে ।

উপাচার্য । এর প্রায়শিত্ত কী, আমাদের কারও স্বরূণ নেই—
তুমিই বলতে পার ।

মহাপঞ্চক । ক্রিয়াকল্পতরুতে এর কোনো উল্লেখ পাওয়া যায় না—
একমাত্র ভগবান জলনানস্তুত আধিকর্মিক বর্ষায়ণে লিখে অপরাধীকে
ছয় মাস মহাতামস সাধন করতে হবে ।

উপাচার্য । মহাতামস ?

মহাপঞ্চক । হা, আলোকের এক রশ্মিমাত্র সে দেখতে পাবে না ।
কেননা আলোকের দ্বারা যে-অপরাধ অঙ্ককারের দ্বারাই তার ক্ষালন ।

উপাচার্য । তাহলে, মহাপঞ্চক, সমস্ত তার তোমার উপর রইল ।

উপাধ্যায় । চলো আমিও তোমার সঙ্গে যাই । ততক্ষণ স্ফুরণকে
হিঙ্গদর্কুণ্ডে স্নান করিয়ে আনি গে ।

সকলের গমনোদ্ধম

আচার্য । শোনো, প্রয়োজন নেই ।

উপাধ্যায় । কিসের প্রয়োজন নেই ।

আচার্য । প্রায়শিত্তের ।

মহাপঞ্চক । প্রয়োজন নেই বলছেন ! আধিকর্মিক বর্ষায়ণ খুলে আমি
এখনই দেখিয়ে দিচ্ছি—

আচার্য। দরকার নেই—স্বভদ্রকে কোনো প্রায়শিত্ত করতে হবে না,
আমি আশীর্বাদ করে তার—

মহাপঞ্চক। এও কি কখনো সন্তুষ্ট হয়। যা কোনো শাস্ত্রে নেই
আপনি কি তাই—

আচার্য। না, হতে দেব না, যদি কোনো অপরাধ ঘটে সে আমার।
তোমাদের ভয় নেই।

উপাধ্যায়। এ-রকম দুর্বলতা তো আপনার কোনোদিন দেখিনি।
এই তো সেবার অষ্টাঙ্গশূলি উপবাসে তৃতীয় রাত্রে বালক কুশলশীল জল
জল করে পিপাসায় প্রাণত্যাগ করলে কিন্তু তবু তার মুখে ধখন এক বিন্দু
জল দেওয়া গেল না তখন তো আপনি নীরব হয়ে ছিলেন। তুচ্ছ
মানুষের প্রাণ আজ আছে কাল নেই, কিন্তু সনাতন ধর্মবিধি তো
চিরকালের।

স্বভদ্রকে লইয়া পঞ্চকের প্রবেশ

পঞ্চক। ভয় নেই স্বভদ্র, তোর কোনো ভয় নেই—এই শিশুটিকে
অভয় দাও প্রভু।

আচার্য। বৎস, তুমি কোনো পাপ করনি বৎস, যারা বিনা অপরাধে
তোমাকে হাজার হাজার বৎসর ধরে মুখ বিকৃত করে ভয় দেখাচ্ছে পাপ
তাদেরই। এসো পঞ্চক।

স্বভদ্রকে কোলে লইয়া পঞ্চকের সঙ্গে প্রস্থান
উপাধ্যায়। এ কৌ হল উপাচার্যমশায়।

মহাপঞ্চক। আমরা অশুচি হয়ে রইলুম, আমাদের যাগ্যজ্ঞ ব্রত-
উপবাস সমস্তই পও হতে থাকল, এ তো সহ করা শক্ত।

উপাধ্যায়। এ সহু করা চলবেই না। আচার্য কি শেষে আমাদের
মেছের সঙ্গে সমান করে দিতে চান।

মহাপঞ্জক। উনি আজ স্বভদ্রকে বাঁচাতে গিয়ে সনাতনধর্মকে
বিনাশ করবেন! এ কী রুক্ম বৃক্ষিকার ওঁর ঘটল। এ অবস্থায় ওঁকে
আচার্য বলে গণ্য করাই চলবে না।

উপাচার্য। সে কি হয়। যিনি একবার আচার্য হয়েছেন তাঁকে কি
আমাদের ইচ্ছামতো—

মহাপঞ্জক। উপাচার্যমশায়, আপনাকেও আমাদের সঙ্গে যোগ দিতে
হবে।

উপাচার্য। নৃতন কিছুতে যোগ দেবার বয়স আমার নয়।

উপাধ্যায়। আজ বিপদের সময় বয়স-বিচার!

উপাচার্য। ধর্মকে বাঁচাবার জন্তে যা করবার করো। আমাকে
দাঢ়াতে হবে আচার্যদেবের পাশে। আমরা একসঙ্গে এসেছিলুম, যদি
বিদ্যায় হ্বার দিন এসে থাকে তবে একসঙ্গেই বাহির হয়ে যাব।

মহাপঞ্জক। কিন্তু একটা কথা চিন্তা করে দেখবেন। আচার্যদেবের
অভাবে আপনারই আচার্য হ্বার অধিকার।

উপাচার্য। মহাপঞ্জক, সেই প্রলোভনে আমি আচার্যদেবের বিরুক্তে
দাঢ়াব? এ-কথা বলবার জন্তে তুমি যে মুখ খুলেছ সে কি এখানকার
উভয় দ্বিতীয়ের জানলা খোলার চেয়ে কম পাপ।

প্রস্থান

মহাপঞ্জক।' চলো উপাধ্যায়, আর বিলম্ব নয়। আচার্য আদীনপুণ্য
যতক্ষণ এ আয়তনে থাকবেন ততক্ষণ ক্রিয়াকর্ম সমস্ত বন্ধ, ততক্ষণ
আমাদের অশৌচ।

পাহাড় মাঠ

পঞ্চকের গান

এ-পথ গেছে কোন্ খানে গো কোনখানে—

তা কে জানে তা কে জানে।

কোন্ পাহাড়ের পারে, কোন্ সাগরের ধারে,

কোন্ দুরাশাৱ দিকপানে—

তা কে জানে তা কে জানে।

এ পথ দিয়ে কে আসে যায় কোনখানে

তা কে জানে তা কে জানে।

কেমন যে তার বাণী কেমন হাসিখানি,

যায় সে কাহার সন্ধানে

তা কে জানে তা কে জানে।

পশ্চাতে আসিয়া শোণপাংশুদলেৱ নৃত্য

পঞ্চক। ও কী রে। তোৱা কখন পিছনে এসে নাচতে লেগেছিস।

প্ৰথম শোণপাংশু। আমৱা নাচবাৱ স্বযোগ পেলেই নাচি, পা
ছটোকে স্থিৱ রাখতে পাৱিনে।

দ্বিতীয় শোণপাংশু। আঘ ভাই ওকে সুন্দৰ কাঁধে কৱে নিয়ে একবাৱ
নাচি।

পঞ্চক। আৱে না না, আমাকে ছুঁসনে রে ছুঁসনে।

তৃতীয় শোণপাংশু। ওই রে। ওকে অচলায়তনেৱ ভূতে পেয়েছে।
শোণপাংশুকে ও ছোঁবে না।

পঞ্চক । জানিস, আমাদের গুরু আসবেন ?

প্রথম শোণপাংশু । সত্যি নাকি । তিনি মানুষটি কী রকম । তাঁর
মধ্যে নতুন কিছু আছে ।

পঞ্চক । নতুনও আছে পুরোনোও আছে ।

দ্বিতীয় শোণপাংশু । আচ্ছা এলে খবর দিয়ো—একবার দেখব তাঁকে ।

পঞ্চক । তোরা দেখবি কী রে । সর্বনাশ । তিনি তো
শোণপাংশুদের গুরু নন । তাঁর কথা তোদের কানে পাছে এক অক্ষরও
ঘায় সেজগ্নে তোদের দিকের প্রাচীরের বাইরে সাত সার রাজার সৈন্য
পাহারা দেবে । তোদেরও তো গুরু আছে—তাঁকে নিয়েই—

তৃতীয় শোণপাংশু । গুরু ! আমাদের আবার গুরু কোথায় ।
আমরা তো হলুম দাদাঠাকুরের দল । এ-পর্যন্ত আমরা তো কোনো
গুরুকে মানিনি ।

প্রথম শোণপাংশু । সেইজগ্নেই তো ও-জিনিসটা কী রকম দেখতে
ইচ্ছা করে ।

দ্বিতীয় শোণপাংশু । আমাদের মধ্যে একজন, তাৱ নাম চঙ্ক—তাৱ
কী জানি ভারি লোভ হয়েছে ; সে ভেবেছে তোমাদের কোনো গুরুৰ
কাছে মন্ত্র নিয়ে আশ্চর্য কী একটা ফল পাবে—তাই সে লুকিয়ে চলে
গেছে ।

তৃতীয় শোণপাংশু । কিন্তু শোণপাংশু বলে কেউ তাঁকে মন্ত্র দিতে
চায় না । সেও ছাড়বাৱ ছেলে নয় সে লেগেই রয়েছে । তোমরা মন্ত্র
দাও না বলেই মন্ত্র আদায় কৱিবাৱ জগ্নে তাৱ এত জেদ ।

প্রথম শোণপাংশু । কিন্তু পঞ্চকদাদা, আমাদের ছুঁলে কি তোমাৱ
গুরু রাগ কৱিবেন ।

পঞ্চক । বলতে পাৱিনে—কী জানি যদি আপৱাধ নেন । ওৱে,

তোরা যে সবাই সব রকম কাজই করিস—সেইটে যে বড়ো দোষ।
তোরা চাষ করিস তো।

প্রথম শোণপাংশু। চাষ করি বই কি, খুব করি। পৃথিবীতে
জন্মেছি পৃথিবীকে সেটা খুব কষে বুঝিয়ে দিয়ে তবে ছাড়ি।

গান

আমরা চাষ করি আনন্দে।

মাঠে মাঠে বেলা কাটে সকাল হতে সন্ধ্য।

রৌদ্র ওঠে, বৃষ্টি পড়ে, বাঁশের বনে পাতা নড়ে,

বাতাস ওঠে ভরে ভরে চষা মাটির গন্ধে।

সবুজ প্রাণের গানের লেখা। রেখায় রেখায় দেয় রে দেখা,

মাতে রে কোন্ তরুণ কবি নৃত্যদোহুল ছন্দে।

ধানের শিষে পুলক ছোটে, সকল ধরা হেসে ওঠে,

অঞ্চনেরি সোনাৰ রোদে পূর্ণিমাৰি চন্দে।

পঞ্চক। আচ্ছা, না হয় তোরা চাষই করিস সেও কোনোমতে সহ
হয়—কিন্তু কে বলছিল তোরা কাকুড়ের চাষ করিস।

প্রথম শোণপাংশু। করি বই কি।

পঞ্চক। কাকুড় ! ছি ছি। খেসারিডালেরও চাষ করিস বুঝি।

তৃতীয় শোণপাংশু। কেন করব না। এখান থেকেই তো কাকুড়
খেসারিডাল তোমাদের বাজারে যায়।

পঞ্চক। তা তো যায় কিন্তু জানিসনে কাকুড় আৱ খেসারিডাল
যাবা চাষ কৱে তাদেৱ আমরা ঘৰে চুক্তে দিইনে।

প্রথম শোণপাংশু। কেন ?

পঞ্চক । কেন কী রে । ওটা যে নিষেধ ।

প্রথম শোণপাংশু । কেন নিষেধ ।

পঞ্চক । শোনো একবার । নিষেধ, তার আবার কেন । সাধে
তোদের মুখদর্শন পাপ ! এই সহজ কথাটা বুঝিসনে যে কাকুড় আর
খেসারিডালের চাষটা ভয়ানক থারাপ ।

দ্বিতীয় শোণপাংশু । কেন । ওটা কি তোমরা খাও না ।

পঞ্চক । খাই বই কি, খুব আদর করে খাই—কিন্তু ওটা যারা চাষ
করে তাদের ছায়া মাড়াইনে ।

দ্বিতীয় শোণপাংশু । কেন ।

পঞ্চক । ফের কেন । তোরা যে এতবড়ো নিরেট মূর্খতা জানতুম
না । আমাদের পিতামহ বিকল্পী কাকুড়ের মধ্যে জন্মগ্রহণ করেছিলেন
সে-থবর রাখিসনে বুঝি ।

দ্বিতীয় শোণপাংশু । কাকুড়ের মধ্যে কেন ।

পঞ্চক । আবার কেন ? তোরা যে ওই এক কেনর জালায় আমাকে
অতিষ্ঠ করে তুললি ।

তৃতীয় শোণপাংশু । আর, খেসারির ডাল ?

পঞ্চক । একবার কোন্ যুগে একটা খেসারিডালের গুঁড়ো
উপবাসের দিন কোন্ এক মন্ত্র বুড়োর ঠিক গোফের উপর উড়ে পড়েছিল ;
তাতে তার উপবাসের পুণ্যফল থেকে ষষ্ঠিসহস্র ভাগের এক ভাগ কম পড়ে
গিয়েছিল ; তাই তখনই সেইখানে দাঢ়িয়ে উঠে তিনি জগতের সমস্ত
খেসারিডালের খেতের উপর অভিশাপ দিয়ে গেছেন । এত-বড়ো তেজ ।
তোরা হলে কী করতিস বল্ দেখি ।

প্রথম শোণপাংশু । আমাদের কথা বল কেন । উপবাসের দিনে

থেঁসারিডাল যদি গোফের উপর পর্যন্ত এগিয়ে আসে তাহলে তাকে
আরও একটু এগিয়ে নিই ।

পঞ্চক । আচ্ছা, একটা কথা জিজ্ঞাসা করি, সত্য করে বলিস—তোরা
কি লোহার কাজ করে থাকিস ।

প্রথম শোণপাংশু । লোহার কাজ করি বই কি, খুব করি ।

পঞ্চক । রাম রাম ! আমরা সনাতন কাল থেকে কেবল তামা-
পিতলের কাজ করে আসছি । লোহা গলাতে পারি কিন্তু সব দিন নয় ।
ষষ্ঠীর দিনে যদি মঙ্গলবার পড়ে তবেই স্নান করে আমরা হাপর ছুঁতে পারি
কিন্তু তাই বলে লোহা পিটোনো সে তো হতেই পারে না ।

তৃতীয় শোণপাংশু । আমরা লোহার কাজ করি তাই লোহাও
আমাদের কাজ করে ।

গান

কঠিন লোহা কঠিন ঘুমে ছিল অচেতন

ও তার ঘুম ভাঙাইনু রে ।

লক্ষ্যুগের অঙ্ককারে ছিল সংগোপন

ওগো তায় জাগাইনু রে ।

পোষ মেনেছে হাতের তলে

যা বলাই সে তেমনি বলে,

দীর্ঘ দিনের মৌন তাহার আজ ভাগাইনু রে ।

অচল ছিল সচল হয়ে

ছুটেছে এ জগৎজয়ে,

নির্তয়ে আজ দুই হাতে তার রাশ বাগাইনু রে ।

পঞ্চক । সেদিন উপাধ্যায়মশায় একঘর ছাত্রের সামনে বললেন
শোণপাংশু জাতটা এমনই বিশ্রী যে তারা নিজের হাতে লোহার কাজ করে ।

আমি তাকে বললুম, ও বেচারারা পড়াশুনো কিছুই করেনি সে আমি জানি—এমন কি, এই পৃথিবীটা যে ত্রিশিরা রাক্ষসীর মাথামুড়োনো চুলের জটা দিয়ে তৈরি তাও ওই মূর্খেরা জানে না, আবার সে-কথা বলতে গেলে মারতে আসে,—তাই ব'লে ভালোমন্দর জ্ঞান কি ওদের এতটুকুও নেই যে লোহার কাজ' নিজের হাতে করবে। আজ তো স্পষ্টই দেখতে পাচ্ছি যার যে-বংশে জন্ম তার সেইরকম বুদ্ধি হয়।

প্রথম শোণপাংশু। কেন, লোহা কী অপরাধটা করেছে।

পঞ্চক। আরে ওটা যে লোহা সে তো তোকে মানতেই হবে।

প্রথম শোণপাংশু। তা তো হবে।

পঞ্চক। তবে আর কী—এই বুঝে নে না।

দ্বিতীয় শোণপাংশু। তবু একটা তো কারণ আছে।

পঞ্চক। কারণ নিশ্চয়ই আছে কিন্তু কেবল সেটা পুঁথির মধ্যে। সুতরাং মহাপঞ্চকদাদা ছাড়া আর অতি অল্প লোকেরই জানবার সন্তান। আছে। সাধে মহাপঞ্চকদাদাকে ওখানকার ছাত্রেরা একেবারে পূজা করে। যা হ'ক ভাই তোরা যে আমাকে ক্রমেই আশ্চর্য করে দিলি রে। তোরা তো খেসারিডাল চাষ করছিস আবার লোহাও পিটোচ্ছিস, এখনও তোরা কোনো দিক থেকে কোনো পাঁচ-চোখ কিংবা সাত-মাথাওআলার কোপে পড়িসনি?

প্রথম শোণপাংশু। যদি পড়ি তবে আমাদেরও লোহা আছে তারও কোপ বড়ো কম নয়।

পঞ্চক। আচ্ছা, তোদের মন্ত্র কেউ পড়ায়নি?

দ্বিতীয় শোণপাংশু। মন্ত্র! কিসের মন্ত্র।

পঞ্চক। এই মনে কর যেমন বজ্রবিদ্বারণ মন্ত্র—তট তট তোতয়—

তৃতীয় শোণপাংশু । ওর মানে কী ।
 পঞ্চক । আবাৰ ! মানে ! তোৱ আস্পধাৰ্তা তো কুম নয় । সব
 কথাতেই মানে ! কেয়ুৰী মন্ত্ৰটা জানিস ?

প্রথম শোণপাংশু । না ।

পঞ্চক । মৱীচি ?

প্রথম শোণপাংশু । না ।

পঞ্চক । মহাশীতবতী ?

প্রথম শোণপাংশু । না ।

পঞ্চক । উষ্ণীষবিজয় ?

প্রথম শোণপাংশু । না ।

পঞ্চক । নাপিত ক্ষৈৰ কৱতে কৱতে যেদিন তোদেৱ বাঁ গালে রক্ত
 পাড়িয়ে দেয় সেদিন কৱিস কী ।

তৃতীয় শোণপাংশু । সেদিন নাপিতেৱ দুই গালে চড় কষিয়ে দিই ।

পঞ্চক । না রে না, আমি বলছি সেদিন নদী পার হবাৰ দৱকাৱ
 হলে তোৱা খেয়া-নৌকোয় উঠতে পাৱিস ?

তৃতীয় শোণপাংশু । খুব পাৱি ।

পঞ্চক । ওৱে, তোৱা আমাকে মাটি কৱলি রে । আমি আৱ থাকতে
 পাৱছিনে । তোদেৱ প্ৰশ্ন জিজ্ঞাসা কৱতে আৱ সাহস হচ্ছে না । এমন
 জবাৰ যদি আৱ-একটা শুনতে পাই তাহলে তোদেৱ বুকে কৱে পাগলেৱ
 মতো নাচব, আমাৱ জাতমান কিছু থাকবে না । ভাই, তোৱা সব কাজই
 কৱতে পাস ? তোদেৱ দাদাঠাকুৱ কিছুতেই তোদেৱ মানা কৱে না ?

শোণপাংশুগণের গান

সব কাজে হাত লাগাই মোরা সব কাজেই ।
 বাধাবাধন নেই গো নেই ।
 দেখি, খুঁজি, বুঝি,
 কেবল ভাঙ্গি, গড়ি, যুঝি,
 মোরা সব দেশেতেই বেড়াই ঘুরে সব সাজেই ।
 পারি, নাই বা পারি,
 না হয় জিতি কিংবা হারি,
 যদি অমনিতে হাল ছাড়ি, মরি সেই লাজেই ।
 আপন হাতের জোরে
 আমরা তুলি স্থজন করে,
 আমরা প্রাণ দিয়ে ঘর বাঁধি, থাকি তার মাঝেই ।

পঞ্চক । সর্বনাশ করলে রে—আমার সর্বনাশ করলে । আমার আর
 ভদ্রতা রাখলে না ! এদের তালে তালে আমারও পা ছুটে নেচে
 উঠছে । আমাকে স্বন্দ এরা টানবে দেখছি । কোন্দিন আমিও লোহা
 পিটব রে লোহা পিটব—কিন্তু খেসারির ডাল—না না, পালা ভাই, পালা-
 তোরা । দেখছিসনে পড়ব ব'লে পুঁথি সংগ্রহ করে এনেছি ।

দ্বিতীয় শোণপাংশু । ও কী পুঁথি দাদা । ওতে কী আছে ।

পঞ্চক । এ আমাদের দিক্ষচক্রচন্দ্রিকা—এতে বিস্তর কাজের কথা
 আছে রে ।

প্রথম শোণপাংশু । কী রকম ।

পঞ্চক । দশটা দিকের দশ রকম রং গন্ধ আর স্বাদ আছে কিনা এতে
 তার সমস্ত খোলসা করে লিখেছে । দক্ষিণ দিকের রংটা হচ্ছে ঝইমাছের

পেটের মতো, ওর গুৰ্কটা দধির গুৰ্ক, স্বাদটা ইষৎ মিষ্টি ; পুবদিকের রংটা হচ্ছে সবুজ, গুৰ্কটা মদমত হাতির মতো, স্বাদটা বকুলের ফলের মতো কষা,—নৈঞ্চনিক কোণের—

দ্বিতীয় শোণপাংশু । আর বলতে হবে না দাদা । কিন্তু দশদিকে তো আমরা এ-সব রং গুৰ্ক দেখতে পাইনে ।

পঞ্চক । দেখতে পেলে তো দেখাই যেতা । যে ঘোর মুখ্য সেও দেখত । এ-সব কেবল পুঁথিতে পড়তে পাওয়া যায় জগতে কোথাও দেখবার জো নেই ।

প্রথম শোণপাংশু । তাহলে দাদা তুমি পুঁথিই পড়ো, আমরা চললুম ।

দ্বিতীয় শোণপাংশু । এদের মতো চোখকান বুজে যদি আমাদের বসে বসে ভাবতে হত তাহলে তো আমরা পাগল হয়ে যেতুম ।

তৃতীয় শোণপাংশু । চল্ তাই ঘুরে আসি, শিকারের সন্ধান পেয়েছি । নদীর ধারে গঙ্গারের পায়ের চিহ্ন দেখা গেছে ।

প্রস্তান

পঞ্চক । এই শোণপাংশুগুলো বাইরে থাকে বটে কিন্তু দিনরাত্রি এমনি পাক খেয়ে বেড়ায় যে, বাহিরটাকে দেখতেই পায় না । এরা যেখানে থাকে সেখানে একেবারে অস্থিরতাৰ চোটে চতুর্দিক ঘুলিয়ে যায় । এৱা একটু থেমেছে অমনি সমস্ত আকাশটা যেন গান গেয়ে উঠেছে । এই শোণপাংশুদের দেখছি ওৱা চুপ কৱলেই আর কিছু শুনতে পায় না— ওৱা নিজের গোলমালটা শোনে সেইজন্তে এত গোল কৱতে ভালোবাসে । কিন্তু এই আলোতে ভৱা নীল আকাশটা আমাৰ রক্তেৰ ভিতৱ্বে গিয়ে কথা কচ্ছে আমাৰ সমস্ত শৰীৱটা গুন গুন কৱে বেড়াচ্ছে ।

গান

যরেতে ভ্রম এল গুণগুণিয়ে ।
 আমারে কার কথা সে যায় শুনিয়ে ।
 আলোতে কোন্ গগনে
 মাধবী জাগল বনে,
 এল সেই ফুল জাগানোর খবর নিয়ে ।
 সারাদিন সেই কথা সে যায় শুনিয়ে ।
 কেমনে রহি ঘরে,
 মন যে কেমন করে,
 কেমনে কাটে যে দিন দিন গুণিয়ে ।
 কী মায়া দেয় বুলায়ে ;
 দিল সব কাজ ভুলায়ে,
 বেলা যায় গানের স্তরে জাল বুনিয়ে ।
 আমারে কার কথা সে যায় শুনিয়ে ।

শোণপাংশুদলের পুনঃপ্রবেশ

প্রথম শোণপাংশু । ও ভাই পঞ্চক, দাদাঠাকুর আসছে ।
 দ্বিতীয় শোণপাংশু । এখন রাখো তোমার পুঁথি রাখো—দাদাঠাকুর
 আসছে ।

দাদাঠাকুরের প্রবেশ

প্রথম শোণপাংশু । দাদাঠাকুর ।
 দাদাঠাকুর । কী রে ।
 দ্বিতীয় শোণপাংশু । দাদাঠাকুর ।

দাদাঠাকুর। কৌ চাই রে।

তৃতীয় শোণপাংশু। কিন্তু চাইনে—একবার তোমাকে ডেকে নিছি।

পঞ্চক। দাদাঠাকুর।

দাদাঠাকুর। কৌ ভাই, পঞ্চক যে।

পঞ্চক। ওরা সবাই তোমায় ডাকছে, আমারও কেমন ডাকতে
ইচ্ছে হল। যতই ভাবছি ওদের দলে মিশব না ততই আরও জড়িয়ে
পড়ছি।

প্রথম শোণপাংশু। আমাদের দাদাঠাকুরকে নিয়ে আবার দল
কিসের। উনি আমাদের সব দলের শতদল পদ্ম।

গান

এই একলা মোদের হাজার মানুষ

দাদাঠাকুর।

এই আমাদের মজার মানুষ

দাদাঠাকুর।

এই তো নানা কাজে

এই তো নানা সাজে,

এই আমাদের খেলার মানুষ

দাদাঠাকুর।

সব মিলনে মেলার মানুষ

দাদাঠাকুর।

এই তো হাসির দলে,

এই তো চোখের জলে,

এই তো সকল ক্ষণের মানুষ

দাদাঠাকুর।

এই তো ঘরে ঘরে,
এই তো বাহির করে,
এই আমাদের কোণের মানুষ
দাদাঠাকুর ।

এই আমাদের মনের মানুষ
দাদাঠাকুর ।

পঞ্চক । ও ভাই, তোদের দাদাঠাকুরকে নিয়ে তোরা তো দিনরাত
মাতামাতি করছিস একবার আমাকে ছেড়ে দে, আমি একটু নিরালায়
বসে কথা কই । তব নেই তেকে আমাদের অচলায়তনে নিয়ে গিয়ে
কপাট দিয়ে রাখব না ।

প্রথম শোণপাংশু। নিয়ে যাও না। সে তো ভালোই হয়। তাহলে
কপাটের বাপের সাধ্য নেই বন্ধ থাকে। উনি গেলে তোমাদের
অচলায়তনের পাথরগুলো সুন্দর নাচতে আরস্ত করবে, পুঁথিগুলোর মধ্যে
বাঁশি বাজবে।

দ্বিতীয় শোণপাংশু। আচ্ছা আয় ভাই আমাদের কাজগুলো সেরে
আসি। দাদাঠাকুরকে নিয়ে পঞ্চকদাদা একটু বন্ধুক।

পঞ্চক । ওই শোণপাংশুগুলো গেছে, এইবার তোমার পায়ের ধুলো
নিই দাদাঠাকুর । ওরা দেখলে হেসে অস্থির হত তাই ওদের সামনে
করিনে ।

দাদঠাকুর। দরকার কী ভাই পায়ের ধুলোয়।

পঞ্চক । নিতে ইচ্ছে করে । বুকের ভিতৰটা যখন ভৱে ওঠে, তখন
বুঝি তার ভাবে মাথা নিচু হয়ে পড়ে—ভক্তি না করে যে বাঁচিনে ।

দাদাঠাকুর । ভাই, আমিও থাকতে পারিনে । স্বেহ যখন আমার
হৃদয়ে ধরে না, তখন সেই স্বেহই আমার ভক্তি ।

পঞ্চক । অচলায়তনে প্রণাম করে করে ঘাড়ে ব্যথা হয়ে গেছে । তাতে নিজেকেই কেবল ছোটো করেছি, বড়োকে পাইনি ।

দাদাঠাকুর । এই আমার সবার বাড়া বড়োর মধ্যে এসে যখন বসি তখন যা করি তাই প্রণাম হয়ে ওঠে । এই যে খোলা আকাশের নিচে দাঙিয়ে তোমার মুখের দিকে তাকিয়ে আমার মন তোমাকে আশীর্বাদ করছে এও আমার প্রণাম ।

পঞ্চক । দাদাঠাকুর, তোমার দুই চোখ দিয়ে এই যে তুমি কেবল সেই বড়োকে দেখছ, তোমাকে যখন দেখি তখন তোমার সেই দেখাটিকেও আমি যেন পাই । তখন পশ্চপাথি গাছপালা আমার কাছে আর কিছুই ছোটো থাকে না । এমন কি, তখন ওই শোণপাংশুদের সঙ্গে মাতামাতি করতেও আমার আর বাধে না ।

দাদাঠাকুর । আমিও যে শুদ্ধের সঙ্গে খেলে বেড়াই সে-খেলা আমার কাছে মন্ত খেলা । আমার মনে হয় আমি ঝরনার ধারার সঙ্গে খেলছি, সমুদ্রের টেউয়ের সঙ্গে খেলছি ।

পঞ্চক । তোমার কাছে সবই বড়ো হয়ে গিয়েছে ।

দাদাঠাকুর । না ভাই, বড়ো হয়নি, সত্য হয়ে উঠেছে—সত্য যে বড়োই, ছোটোই তো মিথ্যা ।

পঞ্চক । তোমার বাধা কেটে গেছে দাদাঠাকুর, সব বাধা কেটে গেছে । এমন হাসতে খেলতে মিলতে মিশতে কাজ করতে কাজ ছাড়তে কে পারে । তোমার ওই ভাব দেখে আমার মনটা ছটফট করতে থাকে । ওই যে কী একটা আছে—চৰম, না পৱম, না কী তা কে বলবে—তাৰ জন্তে দিনবাত যেন আমার মন কেমন করে । থেকে থেকে এক-একবার চমকে উঠি, আৰ ভাৰি এইবাৰ বুঝি হল, বুঝি পাওয়া গেল । দাদাঠাকুর, শুনছি আমাদেৱ গুৰু আসবেন ।

দাদাঠাকুর। গুৰু! কী বিপদ। ভাৱি উৎপাত কৱবে তাহলে তো।
পঞ্চক। একটু উৎপাত হলে যে বাঁচি। চুপচাপ থেকে প্ৰাণ ইঁপিয়ে
উঠছে।

দাদাঠাকুর। তোমাৰ যে শিক্ষা কাঁচা রয়েছে, মনে ভয় হচ্ছে না?
পঞ্চক। আমাৰ ভয় সব-চেয়ে কম—আমাৰ একটি ভুলও হবে না।
দাদাঠাকুর। হবে না?
পঞ্চক। একেবাৰে কিছুই জানিনে, ভুল কৱবাৰ জায়গাই নেই।
নিৰ্ভয়ে চুপ কৱে থাকব।

দাদাঠাকুর। আছা বেশ, তোমাৰ গুৰু এলে তাকে দেখে নেওয়া
যাবে। এখন তুমি আছ কেমন বলো তো।

পঞ্চক। ভয়ানক টানাটানিৰ মধ্যে আছি ঠাকুৰ। মনে মনে প্ৰাৰ্থনা
কৱছি গুৰু এসে যেদিকে হ'ক একদিকে আমাকে ঠিক কৱে রাখুন—হয়
এখানকাৰ খোলা হাওয়াৰ মধ্যে অভয় দিয়ে ছাড়া দিন, নয়তো খুব কষে
পুঁথি চাপা দিয়ে রাখুন; মাথা থেকে পা পৰ্যন্ত আগাগোড়া একেবাৰে
সমান চ্যাপটা হয়ে যাই।

দাদাঠাকুৰ। তা, তোমাৰ গুৰু তোমাৰ উপৰ যত পুঁথিৰ চাপই
চাপান না কেন তাৰ নিচেৰ থেকে তোমাকে আস্ত টেনে বেৱ কৱে
আনতে পাৱব।

পঞ্চক। তা তুমি পাৱব সে আমি জানি। কিন্তু দেখো ঠাকুৰ
একটা কথা তোমাকে বলি—অচলায়তনেৰ মধ্যে ওই যে আমাৰ দৱজা
বদ্ধ কৱে আছি, দিবিয় আছি। ওখানে আমাদেৱ সমস্ত বোৰাপড়া
একেবাৰে শেষ হয়ে গেছে। ওখানকাৰ মানুষ সেইজন্তে বড়ো নিশ্চিন্ত।
কিছুতে কাৰও একটু সন্দেহ হবাৰ জো নেই। যদি দৈবাং কাৰও মনে
, এমন প্ৰশ্ন ওঠে যে, আছা ওই যে, চন্দ্ৰগ্ৰহণেৰ দিনে শোবাৰ ঘৱেৱ

দেওয়ালে তিনবার সাদা ছাগলের দাঢ়ি বুলিয়ে দিয়ে আওড়াতে হয় “হ্যন
হ্যন তিষ্ঠ তিষ্ঠ বন্ধ বন্ধ অমৃতে হঁফট স্বাহা” এর কারণটা কী—তাহলে
কেবলমাত্র চারটে শ্লপুরি আর এক মাষা সোনা হাতে করে যাও তখনই
মহাপঞ্চকদাদাৰ কাছে, এমনি উত্তরটি পাবে যে আৱ কথা সৱবে না।
হয় সেটা মানো, নয় কানমলা খেয়ে বেরিয়ে যাও, মাৰো অন্ত রাস্তা নেই।
তাই সমস্তই চমৎকাৰ সহজ হয়ে গেছে। কিন্তু ঠাকুৰ সেখান থেকে
বেৱ করে তুমি আমাকে এই যে-জায়গাটাতে এনেছ এখানে কোনো
মহাপঞ্চকদাদাৰ ‘টিকি দেখবাৰ জো নেই—বাঁধা জবাব পাই কাৰ কাছে।
সব কথারই বাবো আনা বাকি থেকে যায়। তুমি এমন করে মন্টাকে
উতলা করে দিলে—তাৰ পৱ ?

দাদাঠাকুৰ। তাৰ পৱে ?

গান

যা হৰাৰ তা হবে।

যে আমাকে কাঁদায় সে কি অমনি ছেড়ে রবে।

পথ হতে যে ভুলিয়ে আনে, পথ যে কোথায় সেই তা জানে,

ঘৰ যে ছাড়ায় হাত সে বাড়ায় সেই তো ঘৰে লবে।

পঞ্চক। এতবড়ো ভৱসা তুমি কেমন করে দিচ্ছ ঠাকুৰ। তুমি
কোনো ভয় কোনো ভাবনাই রাখতে দেবে না অথচ জন্মাবধি আমাদেৱ
ভয়েৱ অন্ত নেই। মৃত্যু-ভয়েৱ জন্মে অমিতায়ুধীরিণী মন্ত্ৰ পড়ছি,
শক্রভয়েৱ জন্মে মহাসাহস্রপ্রমদিনী, ঘৰেৱ ভয়েৱ জন্মে গৃহমাতৃকা, বাইৱেৱ
ভয়েৱ জন্মে অভয়ংকৰী ; সাপেৱ ভয়েৱ জন্মে মহাময়ূৰী, বজ্রভয়েৱ জন্মে

বজ্রগান্ধারী, ভূতের ভয়ের জন্যে চণ্ডিত্টারিকা, চোরের ভয়ের জন্যে
হৃষাহরহস্যদ্য। এমন আর কত নাম করব।

দাদাঠাকুর। আমার বন্ধু এমন মন্ত্র আমাকে পড়িয়েছেন যে তাতে
. চিরদিনের জন্য ভয়ের বিষদ্বাত ভেঙে দায়।

পঞ্চক। তোমাকে দেখে তা বোঝা যায়। কিন্তু সেই বন্ধুকে পেলে
কোথা ঠাকুর।

দাদাঠাকুর। পাবই বলে সাহস করে বুক বাঁড়িয়ে দিলুম, তাই
পেলুম। কোথাও যেতে হয়নি।

পঞ্চক। সে কী রকম।

দাদাঠাকুর। যে ছেলের ভরসা নেই সে অঙ্গকারে বিছানায় মাকে
না দেখতে পেলেই কাদে, আর যার ভরসা আছে সে হাত বাড়ালেই
মাকে তখনই বুক ভরে পায়। তখন ভয়ের অঙ্গকারটাই আরো নিবিড়
মিষ্টি হয়ে ওঠে। মা তখন যদি জিজ্ঞাসা করে, আলো চাই, ছেলে বলে
তুমি থাকলে আমার আলোও যেমন অঙ্গকারও তেমনি।

পঞ্চক। দাদাঠাকুর, আমার অচলায়তন ছেড়ে অনেক সাহস করে
তোমার কাছ অবধি এসেছি কিন্তু তোমার ওই বন্ধু পর্যন্ত যেতে সাহস
করতে পারছিনে।

দাদাঠাকুর। কেন, তোমার ভয় কিসের।

পঞ্চক। খাঁচায় যে পাখিটার জন্ম, সে আকাশকেই সব-চেয়ে ডরায়।
সে লোহার শলাগুলোর মধ্যে দুঃখ পায় তবু দুরজাটা খুলে দিলে তার বুক
ছুর ছুর করে, ভাবে, বন্ধ না থাকলে খাঁচব কী করে। আপনাকে যে
নির্ভয়ে ছেড়ে দিতে শিখিনি। এইটেই আমাদের চিরকালের
অভ্যাস।

দাদাঠাকুর। তোমরা অনেকগুলো তালা লাগিয়ে সিন্দুক বন্ধ করে

রাখাকেই মন্ত লাভ মনে কর—কিন্ত সিন্দুকে যে আছে কী তার খেঁজ
রাখ না।

পঞ্চক। আমাৰ দাদা বলে, জগতে যা-কিছু আছে সমস্ত'ক দূৰ
কৱে ফেলতে পাৱলে তবেই আসল জিনিসটিকে পাওয়া যায়।
সেইজন্তেই দিনৱাত্ৰি আমৱা কেবল দূৰই কৰছি—আমাদেৱ কতটা গেল
সেই হিসাবটাই আমাদেৱ হিসাব—সে হিসাবেৱ অন্তও পাওয়া যাচ্ছে
না।

দাদাঠাকুৱ। তোমাৰ দাদা তো ওই বলে, কিন্ত আমাৰ দাদা বলে,
যখন সমস্ত পাই তথনই আস্ল জিনিসকে পাই। সেইজন্তে ঘৰে আমি
দৱজা দিতে পাৱিনে—দিনৱাত্ৰি সব খুলে রেখে দিই। আছা পঞ্চক,
তুমি যে তোমাদেৱ আয়তন থেকে বেৱিয়ে আস কেউ তা জানে না ?

পঞ্চক। আমি জানি যে আমাদেৱ আচাৰ্য জানেন। কোনোদিন
তাৰ সঙ্গে এ নিয়ে কোনো কথা হয়নি—তিনিও জিজ্ঞাসা কৱেন না
আমিও বলিনে। কিন্ত আমি যখন বাইৱে থেকে ফিৰে যাই তিনি
আমাকে দেখলেই বুঝতে পাৱেন। আমাকে তথন কাছে নিয়ে বসেন,
তাৰ চোখেৱ ঘেন একটা কী ক্ষুধা তিনি আমাকে দেখে মেটান। \ ঘেন
বাইৱেৱ আকাশটাকে তিনি আমাৰ মুখেৱ মধ্যে দেখে নেন। ঠাকুৱ,
যেদিন তোমাৰ সঙ্গে আচাৰ্যদেৱকে মিলিয়ে দিতে পাৱব সেদিন আমাৰ
অচলায়তনেৱ সব দুঃখ ঘূঢ়বে।

দাদাঠাকুৱ। সেদিন আমাৰও শুভদিন হবে।

পঞ্চক। ঠাকুৱ, আমাকে কিন্ত তুমি বড়ো অস্থিৱ কৱে তুলেছ।
এক-একসময় ভয় হয় বুৰি কোনোদিন আৱৰ্মন শান্ত হবে না।

দাদাঠাকুৱ। আমিই কি স্থিৱ আছি ভাই। আমাৰ মধ্যে টেউ
উঠেছে বলেই তোমাৰও মধ্যে টেউ তুলছি।

পঞ্চক। কিন্তু তবে যে তোমার ওই শোণপাংশুরা বলে তোমার
কাছে তারা খুব শান্তি পায়, কই শান্তি কোথায়। আমি তো দেখিনে।

দাদাঠাকুর। ওদের যে শান্তি চাই। নইলে কেবলই কাজের
ঘর্ষণে ওদের কাজের মধ্যেই দাবানল লেগে যেত, ওদের পাশে কেউ
দাঢ়াতে পারত না।

পঞ্চক। তোমাকে দেখে ওরা শান্তি পায় ?

দাদাঠাকুর। এই পাগল যে পাগলও হয়েছে শান্তিও পেয়েছে।
তাই সে কাউকে খ্যাপায় কাউকে বাঁধে। পূর্ণিমার চাঁদ সাগরকে
উতলা করে যে-মন্ত্রে, সেই মন্ত্রেই পৃথিবীকে ঘুম পাড়িয়ে রাখে।

পঞ্চক। টেউ তোলো ঠাকুর, টেউ তোলো, কুল ছাপিয়ে যেতে
চাই। আমি তোমায় সত্যি বলছি আমার মন খেপেছে, কেবল জোর
পাছিনে—তাই দাদাঠাকুর মন কেবল তোমার কাছে আসতে চায়—
তুমি জোর দাও—তুমি জোর দাও—তুমি আর দাঢ়াতে দিয়ো না।

গান

আমি কারে ডাকি গো

আমার বাঁধন দাও গো টুটে।

আমি হাত বাড়িয়ে আছি

আমায় লও কেড়ে লও লুটে।

তুমি ডাকো। এমনি ডাকে

যেন লজ্জা ভয় না থাকে,

বেন সব ফেলে যাই, সব ঠেলে যাই,

যাই ধেয়ে যাই ছুটে।

আমি	স্বপন দিয়ে বাধা,
কেবল	ঘুমের ঘোরের বাধা,
সে যে	জড়িয়ে আছে প্রাণের কাছে মুদিয়ে আঁখিপুঁটে ;
ওগো	দিনের পরে দিন
আমার	কোথায় হল লীন,
কেবল	ভাষাহারা অশ্রদ্ধারায় পরান কেঁদে উঠে ।

আচ্ছা দাদাঠাকুর, তোমাকে আর কাদতে হয় না ? তুমি যার কথা বল
তিনি তোমার চোখের জল মুছিয়েছেন ?

দাদাঠাকুর । তিনি চোখের জল মোছান কিন্তু চোখের জল ঘোচান
না ।

পঞ্চক । কিন্তু দাদা, আমি তোমার ওই শোণপাংশুদের দেখি
আর মনে ভাবি ওরা চোখের জল ফেলতে শেখেনি । ওদের
কি তুমি' একেবারেই কাদাতে চাও না ।

দাদাঠাকুর । যেখানে আকাশ থেকে বৃষ্টি পড়ে না সেখানে ধাল
কেটে জল আনতে হয় । ওদের ও রসের দরকার হবে তখন দূর থেকে বয়ে
আনবে । কিন্তু দেখছি ওরা বর্ষণ চায় না, তাতে ওদের কাজ কামাই
যায়, সে ওরা কিছুতেই সহ্য করতে পারে না, ওই রকমই ওদের স্বভাব ।

পঞ্চক । ঠাকুর, আমি তো সেই বর্ষণের জন্যে তাকিয়ে আছি ।
যতদূর শুকোবার তা শুকিয়েছে, কোথাও একটু সবুজ আর কিছু বাকি
নেই, এইবার তো সময় হয়েছে—মনে হচ্ছে যেন দূর থেকে গুরু গুরু
ডাক শুনতে পাচ্ছি । বুঝি এবার ঘন নীল মেঘে তপ্ত আকাশ জুড়িয়ে
যাবে ভরে যাবে ।

গান

দাদাঠাকুর । বুঝি এল, বুঝি এল, ওরে প্রাণ ।
 এবার ধৰু দেখি তোর গান ।
 ঘাসে ঘাসে খবর ছোটে
 ধৰা বুঝি শিউরে ওঠে,
 দিগন্তে ওই স্তৰ আকাশ পেতে আছে কান ।

পঞ্চক । ঠাকুর, আমার বুকের মধ্যে কৌ আনন্দ যে লাগছে সে
 · আমি বলে উঠতে পারিনে । এই মাটিকে জড়িয়ে ধরতে ইচ্ছা করে ।
 ডাকে ডাকে, তোমার একটা ডাক দিয়ে এই আকাশ ছেয়ে ফেলো ।

গান

আজ যেমন করে গাইছে আকাশ
 তেমনি করে গাও গো ।
 যেমন করে চাইছে আকাশ
 তেমনি করে চাও গো ।

আজ হাওয়া যেমন পাতায় পাতায়
 মর্মরিয়া বনকে কাদায়,
 তেমনি আমার বুকের মাঝে
 কাদিয়া কাদাও গো ।

শুনছ দাদা, ওই কাসর বাজছে ।

দাদাঠাকুর । ঈ বাজছে ।

পঞ্চক । আমার আর থাকবার জো নেই ।

দাদাঠাকুর । কেন ।

পঞ্চক । আজ আমাদের দীপকেতন পূজা ।

দাদাঠাকুর । কী করতে হবে ।

পঞ্চক । আজ ডুমুরতলা থেকে মাটি এনে সেইটে পঞ্চগব্য দিয়ে
মেখে বিরোচন মন্ত্র পড়তে হবে । তার পরে সেই মাটিতে ছোটো
ছোটো মন্দির গড়ে তার উপরে ধূজা বসিয়ে দিতে হবে । এমন
হাজারটা গড়ে তবে সূর্যাস্তের পরে জলগ্রহণ ।

দাদাঠাকুর । ফল কী হবে ।

পঞ্চক । প্রেতলোকে পিতামহদের ঘর তৈরি হয়ে যাবে ।

দাদাঠাকুর । যারা ইহলোকে আছে তাদের জন্যে—

পঞ্চক । তাদের জন্যে ঘর এত সহজে তৈরি হয় না । চললুম
ঠাকুর, আবার কবে দেখা হবে জানিনে । তোমার এই হাতের স্পর্শ
নিয়ে চললুম—এই আমার সঙ্গে সঙ্গে যাবে—এই আমার নাগপাশ-
ধান্ধন আলগা করে দেবে । ওই আসছে শোণপাংশুর দল—আমরা
এখানে বসে আছি দেখে ওদের ভালো লাগছে না, ওরা ছটফট করছে ।
তোমাকে নিয়ে ওরা ছটোপাটি করতে চায়—করুক, ওরাই ধন্ত, ওরা
দিনরাত তোমাকে কাছে পায় ।

দাদাঠাকুর । ছটোপাটি করলেই কি কাছে পাওয়া যায় । কাছে
আসবার রাস্তাটা কাছের লোকের চোখেই পড়ে না ।

শোণপাংশুদলের প্রবেশ

প্রথম শোণপাংশু । ও কী ভাই পঞ্চক, যাও কোথায় ।

পঞ্চক । আমার সময় হয়ে গেছে, আমাকে যেতেই হবে ।

দ্বিতীয় শোণপাংশু । বাঃ সে কি হয় । আজ আমাদের বনভোজন,
আজ তোমাকে ছাড়ছিনে ।

পঞ্চক । না ভাই, সে হবে না—ওই কাসর বাজছে ।

তৃতীয় শোণপাংশু । কিসের কাসর বাজছে ।

পঞ্চক । তোরা বুঝবিনে । আজ দীপকেতন পূজা—আজ
ছেলেমাছুষি.না । আমি চললুম । (কিছুদুর গিয়া হঠাতে ছুটিয়া ফিরিয়া
আসিয়া)

গান

হারে রে রে রে—
আমায় ছেড়ে দে রে দে রে ।
যেমন ছাড়া বনের পাথি
মনের আনন্দে রে ।

ঘন শ্রাবণধারা
যেমন বাঁধনহারা
বাদল বাতাস যেমন ডাকাত
আকাশ লুটে ফেরে ।

হারে রে রে রে
আমায় বাথবে ধরে কে রে ।
দাবানলের নাচন যেমন
সকল কানন ঘেরে ।

বজ্র যেমন বেগে
গর্জে ঝড়ের মেঘে
অটুহাস্তে সকল বিষ্ণবাধাৰ বক্ষ চেরে ।

প্রথম শোণপাংশু । বেশ বেশ পঞ্চকদানা, তাহলে চলো আমাদের
বনভোজনে ।

পঞ্চক । বেশ, চলো । (একটু থামিয়া দ্বিধা করিয়া) কিন্তু ভাই
ওই বন পর্যন্তই যাব ভোজন পর্যন্ত নয় ।

বিতীয় শোণপাংশু । সে কি হয় । সকলে মিলে ভোজন না করলে
আনন্দ কিসের ।

পঞ্চক । না রে, তোদের সঙ্গে ওই জায়গাটাতে আনন্দ চলবে না ।

বিতীয় শোণপাংশু । কেন চলবে না । চালালেই চলবে ।

পঞ্চক । চালালেই চলে এমন কোনো জিনিস আমাদের ত্রিসৌমানায়
আসতে পারে না তা জানিস । মারলে চলে না, ঠেললে চলে না, দশটা
হাতি জুড়ে দিলে চলে না, আর তুই বলিস কিনা চালালেই চলবে ।

তৃতীয় শোণপাংশু । আচ্ছা ভাই, কাজ কী । তুমি বনেই চলো,
আমাদের সঙ্গে খেতে বসতে হবে না ।

পঞ্চক । খুব হবে রে খুব হবে । আজ খেতে বসবই, থাবই,—
আজ সকলের সঙ্গে বসেই খাব—আনন্দে আজ ক্রিয়াকল্পতরুর ডালে
ডালে আগুন লাগিয়ে দেব—পুড়িয়ে সব ছাই করে ফেলব । দাদাঠাকুর,
তুমি ওদের সঙ্গে থাবে না ?

দাদাঠাকুর । আমি বোজই থাই ।

পঞ্চক । তবে তুমি আমাকে খেতে বলছ না কেন ।

দাদাঠাকুর । আমি কাউকে বলিনে ভাই, নিজে বসে যাই ।

পঞ্চক । না দাদা, আমার সঙ্গে অমন করলে চলবে না । আমাকে
তুমি হকুম করো তাহলে আমি বেঁচে যাই । আমি নিজের সঙ্গে কেবলই
তর্ক করে মরতে পারিনে ।

দাদাঠাকুর । অত সহজে তোমাকে বেঁচে যেতে দেব না পঞ্চক ।
যেদিন তোমার আপনার মধ্যে হকুম উঠবে সেইদিন **আমি** হকুম করব ।

একদল শোণপাংশুর প্রবেশ

দাদাঠাকুর। কৌ রে, এত ব্যস্ত হয়ে ছুটে এলি কেন।

প্রথম শোণপাংশু। চগুককে মেরে ফেলেছে।

দাদাঠাকুর। কে মেরেছে।

দ্বিতীয় শোণপাংশু। স্থবিরপত্ননের রাজা।

পঞ্চক। আমাদের রাজা? কেন, মারতে গেল কেন।

দ্বিতীয় শোণপাংশু। স্থবিরক হয়ে ওঠবার জন্যে চগুক বনের মধ্যে এক প'ড়ো মন্দিরে তপস্তা করছিল। ওদের রাজা মন্ত্রগুপ্ত সেই খবর পেয়ে তাকে কেটে ফেলেছে।

তৃতীয় শোণপাংশু। আগে ওদের দেশের প্রাচীর পঁয়ত্রিশ হাত উঁচ ছিল, এবার আশি হাত উঁচ করবার জন্যে লোক লাগিয়ে দিয়েছে, পাছে পৃথিবীর সব লোক লাফ দিয়ে গিয়ে হঠাৎ স্থবিরক হয়ে ওঠে।

চতুর্থ শোণপাংশু। আমাদের দেশ থেকে দশজন শোণপাংশু ধরে নিয়ে গেছে, হয়তো ওদের কালকণ্ঠি দেবীর কাছে বলি দেবে।

দাদাঠাকুর। চলো তবে।

প্রথম শোণপাংশু। কোথায়।

দাদাঠাকুর। স্থবিরপত্ননে।

দ্বিতীয় শোণপাংশু। এখনই?

দাদাঠাকুর। হ্যাঁ, এখনই।

সকলে। ওরে চল্ রে চল্।

দাদাঠাকুর। আমাদের রাজার আদেশ আছে ওদের পাপ ধখন প্রাচীরের আকার ধরে আকাশের জ্যোতি আচ্ছন্ন করতে উঠবে তখন সেই প্রাচীর ধুলোয় লুটিয়ে দিতে হবে।

প্রথম শোণপাংশু । দেব ধুলোয় লুটিয়ে ।
 সকলে । দেব লুটিয়ে ।
 দাদাঠাকুর । ওদের সেই ভাঙা প্রাচীরের উপর দিয়ে রাজপথ তৈরি
 করে দেব ।

সকলে । হা, রাজপথ তৈরি করে দেব ।
 দাদাঠাকুর । আমাদের রাজাৰ বিজয়বথ তাৰ উপর দিয়ে চলবে ।
 সকলে । হা, চলবে, চলবে ।
 পঞ্চক । দাদাঠাকুর, এ কী ব্যাপার ।
 দাদাঠাকুর । এই আমাদেৱ বনভোজন ।
 প্রথম শোণপাংশু । চলো পঞ্চক, তুমি চলো ।
 দাদাঠাকুর । না না, পঞ্চক না । যাও ভাই তুমি তোমার
 অচলায়তনে ফিরে যাও । যখন সময় হবে দেখা হবে ।

পঞ্চক । কী জানি ঠাকুৱ যদিও আমি কোনো কৰ্মেৱই না, তবু ইচ্ছে
 কৰছে তোমাদেৱ সঙ্গে ছুটে বেৱিয়ে পড়ি ।

দাদাঠাকুর । না পঞ্চক, তোমার গুৰু আসবেন, তুমি অপেক্ষা কৰো
 গে ।

পঞ্চক । তবে ফিরে যাই । কিন্তু ঠাকুৱ যতবাৰ বাইৱে এসে
 তোমার সঙ্গে দেখা হয় ততবাৰ ফিরে গিয়ে অচলায়তনে আমাকে ঘেন
 আৱ ধৰে না । হয় ওটাকে বড়ো কৰে দাও, নয় আমাকে আৱ বাড়তে
 দিয়ো না ।

দাদাঠাকুর । আয় রে, তবে যান্তা কৰি ।

অচলায়তন

মহাপঞ্জক, উপাধ্যায়, সঞ্জীব, বিশ্বস্তর, জয়োত্তম

বিশ্বস্তর। আচার্য অদীনপুণ্য যদি স্বেচ্ছায় পদত্যাগ না করেন তবে তিনি যেমন আছেন থাকুন কিন্তু আমরা তার কোনো অনুশাসন মানব না।

জয়োত্তম। তিনি বলেন তার গুরু তাকে যে-আসনে বসিয়েছেন তার গুরুই তাকে সেই আসন থেকে নামিয়ে দেবেন সেইজন্তে তিনি অপেক্ষা করছেন।

একটি ছাত্রের প্রবেশ

মহাপঞ্জক। কৌ হে তৃণাঞ্জন।

তৃণাঞ্জন। আজ দ্বাদশী, আজ আমার লোকেশ্বর ব্রতের পারণের দিন। কিন্তু কৌ করব, আমাদের আচার্য যে কে তার তো কোনো ঠিক হল না—আমাদের যে সমস্ত ক্রিয়াকাণ্ড পও হতে বসল এর কী করা যায়।

মহাপঞ্জক। সে তো আমি তোমাদের বলে রেখেছি—এখন আশ্রমে যা-কিছু কাজ হচ্ছে সমস্তই নিষ্ফল হচ্ছে।

উপাধ্যায়। শুধু নিষ্ফল হচ্ছে তা নয়, আমাদের অপরাধ ক্রমেই জমে উঠছে।

সঞ্জীব। এ যে বড়ো সর্বনেশে কথা।

জয়োত্তম। কিন্তু আমাদের গুরু আসবার তো দেরি নেই, এর মধ্যে আর কত অনিষ্টই বা হবে।

সঞ্জীব । আরে রাখো তোমার তর্ক । অনিষ্ট হতে সময় লাগে না ।
মরার পক্ষে এক মুহূর্তই যথেষ্ট ।

অধ্যোতার প্রবেশ

উপাধ্যায় । কৌ গো অধ্যেতা, ব্যাপার কৌ ।

অধ্যেতা । তোমরা তো আমাকে বলে এলে স্বভদ্রকে মহাতামসে
বসাতে—কিন্তু বসায় করি সাধ্য ।

মহাপঞ্চক । কেন কৌ বিঘ্ন ঘটেছে ।

অধ্যেতা । মৃতিমান বিঘ্ন রয়েছে তোমার ভাই !

মহাপঞ্চক । পঞ্চক ?

অধ্যেতা । হ্যাঁ । আমি স্বভদ্রকে হিঙ্গুমর্দন কুণ্ডে স্নান করিয়ে সবে
উঠেছি এমন সময় পঞ্চক এসে তাকে কেড়ে নিয়ে গেল ।

মহাপঞ্চক । না, এই নরাধমকে নিয়ে আর চলল না । অনেক সহ
করেছি । এবার ওকে নির্বাসন দেওয়াই স্থির । কিন্তু অধ্যেতা, তুমি
এটা সহ করলে ?

অধ্যেতা । আমি কি তোমার পঞ্চককে ভয় করি ! স্বয়ং আচার্য
অদীনপুণ্য এসে তাকে আদেশ করলেন তাই তো সে সাহস পেলে ।

তৃণাঙ্গন । আচার্য অদীনপুণ্য !

সঞ্জীব । স্বয়ং আমাদের আচার্য !

বিশ্বস্তর । ক্রমে এ-সব হচ্ছে কৌ । এতদিন এই আয়তনে আছি
কখনো তো এমন অনাচারের কথা শুনিনি । যে স্নাত তাকে তার ব্রত
থেকে ছিন্ন করে আনা ! আর স্বয়ং আমাদের আচার্যের এই কীর্তি !

জয়োত্তম । তাকে একবার জিজ্ঞাসা করেই দেখা যাক না ।

বিশ্বস্তর । না না, আচার্যকে আমরা—

মহাপঞ্চক । কৌ করবে আচার্যকে, বলেই ফেলো ।

বিশ্বস্তর । তাই তো ভাবছি কৌ করা যায় । তাকে না হয়—
আপনি বলে দিন না কৌ করতে হবে ।

মহাপঞ্চক । আমি বলছি তাকে সংযত করে রাখতে হবে ।

সঞ্জীব । কেমন করে ।

মহাপঞ্চক । কেমন করে আবার কৌ ? মত হস্তীকে ঘেমন করে
সংযত করতে হয় তেমনি করে ।

জয়োত্তম । আমাদের আচার্যদেবকে কি তাহলে—

মহাপঞ্চক । হ্যাঁ, তাকে বন্ধ করে রাখতে হবে । চুপ করে রাখলে
যে ! পারবে না ?

তৃণাঙ্গন । কেন পারব না । আপনি ধনি আদেশ করেন তাহলেই—

জয়োত্তম । কিন্তু শাস্ত্রে কি এর—

মহাপঞ্চক । শাস্ত্রে বিধি আছে ।

তৃণাঙ্গন । তবে আর ভাবনা কৌ ।

উপাধ্যায় । মহাপঞ্চক, তোমার কিছুই বাধে না, আমার কিন্তু ডয়
হচ্ছে ।

আচার্যের প্রবেশ

আচার্য । বৎস, এতদিন তোমরা আমাকে আচায বলে মেনেছ
আজ তোমাদের সামনে আমার বিচারের দিন এসেছে । আমি স্বীকার
করছি অপরাধের অন্ত নেই, অন্ত নেই, তাৰ প্রায়শিত্ত আমাকেই করতে
হবে ।

তৃণাঙ্গন । তবে আর দেরি করেন কেন । এদিকে যে আমাদের
সর্বনাশ হয় ।

জয়োত্তম। দেখো তৃণাঞ্জন, আস্তাকুঁড়ের ছাই দিয়ে তোমার এই
মুখের গর্তটা ভরিয়ে দিতে হবে। একটু থামো না।

আচার্য। গুরু চলে গেলেন, আমরা ঠাব জাঘগায় পুঁথি নিয়ে
বসলুম; তার শুকনো পাতায় ক্ষুধা যতই মেটে না ততই পুঁথি কেবল
বাড়াতে থাকি। খাটের মধ্যে প্রাণ যতই কমে তার পরিমাণ ততই
বেশি হয়। সেই জীর্ণ পুঁথির ভাওরে প্রতিদিন তোমরা দলে দলে
আমার কাছে তোমাদের তরুণ হৃদয়টি মেলে ধরে কী চাইতে এসেছিলে।
অমৃতবাণী? কিন্তু আমার তালু যে শুকিয়ে কাঠ হয়ে গেছে। রসনায়
যে রসের লেশমাত্র নেই। এবার নিয়ে এসো সেই বাণী, গুরু, নিয়ে
এসো হৃদয়ের বাণী। প্রাণকে প্রাণ দিয়ে জাগিয়ে দিয়ে যাও।

পঞ্চক। (ছুটিয়া প্রবেশ করিয়া) তোমার নববর্ষার সজল হাওয়ায়
উড়ে যাক সব শুকনো পাতা—আয় রে নবীন কিশলয়—তোরা ছুটে আয়,
তোরা ফুটে বেরো। ভাই জয়োত্তম, শুনছ না, আকাশের ঘন নীল
মেঘের মধ্যে মুক্তির ডাক উঠেছে—আজ নৃত্য করু রে নৃত্য করু।

গান

ওরে ওরে ওরে আমার মন মেতেছে

তারে আজ, থামায় কে রে।

সে যে আকাশ পানে হাত পেতেছে

তার আজ নামায় কে রে।

প্রথমে জয়োত্তমের, পরে বিশ্বস্তরের,

পরে সঞ্জীবের নৃত্যগীতে যোগ

মহাপঞ্চক। পঞ্চক, নির্জন বানর কোথাকার, থাম্ বলছি থাম্!

গান

পঞ্চক ।

ওরে আমাৰ মন মেতেছে

আমাৰে থামায় কে রে ।

মহাপঞ্চক । উপাধ্যায়, আমি তোমাকে বলিনি একজটা দেবীৰ শাপ
আৱস্তু হয়েছে ? দেখছ, কৌ কৰে তিনি আমাদেৱ সকলেৱ বুদ্ধিকে
বিচলিত কৰে তুলছেন—ক্রমে দেখবে অচলায়তনেৱ একটি পাথৰও আৱ
থাকবে না ।

পঞ্চক । না, থাকবে না, থাকবে না, পাথৰগুলো সব পাগল হয়ে
যাবে ; তাৱা কে কোথায় ছুটে বেৱিয়ে পড়বে, তাৱা গান ধৰবে—

ওৱে ভাই, নাচ রে ও ভাই নাচ, রে—

আজ ছাড়া পেয়ে বাচ, রে,—

লাজ ভয় ঘূচিয়ে দে রে ।

তোৱে আজ থামায় কে রে ।

মহাপঞ্চক । উপাধ্যায়, হা কৰে দাঢ়িয়ে দেখছ কৌ । সৰ্বনাশ শুন
হয়েছে, বুৰাতে পাৱছ না ! ওৱে সব ছন্মতি মূৰ্খ, অভিশপ্ত বৰ্বৱ, আজ
তোদেৱ নাচবাৱ দিন ?

পঞ্চক । সৰ্বনাশেৱ বাজনা বাজলেই নাচ শুন হয় দাদা ।

মহাপঞ্চক । চুপ কৰ লক্ষ্মীছাড়া । ছাত্ৰগণ তোমৱা আত্মবিশ্঵ত
হ'য়ো না । ঘোৱ বিপদ আসন্ন সে-কথা স্মৱণ রেখো ।

বিশ্বস্তৱ । আচাৰ্যদেৱ পায়ে ধৱি, স্বভদ্রকে আমাদেৱ হাতে দিন,
তাকে তাৱ প্ৰায়শিত্ব থেকে নিৱস্তু কৱবেন না ।

আচাৰ্য । না বংস, এমন অনুৱোধ ক'রো না ।

সঙ্গীব । ভেবে দেখুন, স্বভদ্রেৱ কতবড়ো ভাগ্য । মহাতামস
কজন লোকে পাৱে । ও যে ধৱাতলে দেবতা লাভ কৱবে ।

আচার্য। গায়ের জোরে দেবতা গড়বার পাপে আমাকে লিপ্ত ক'রো না। সে মাহুষ, সে শিশু, সেইজন্তেই সে দেবতাদের প্রিয়।

তৃণাঙ্গন। দেখুন আপনি আমাদের আচার্য, আমাদের প্রণম্য, কিন্তু যে-অন্ত্যায় আজ করছেন, তাতে আমরা বলপ্রয়োগ করতে বাধ্য হব।

আচার্য। করো, বলপ্রয়োগ করো, আমাকে মেনো না, আমাকে মারো, আমি অপমানেরই যোগ্য, তো মাদের হাত দিয়ে আমার যে-শাস্তি আরম্ভ হল তাতেই বুঝতে পারছি গুরুর আবির্ভাব হয়েছে। কিন্তু সেই-জন্তেই বলছি শাস্তির কারণ আর বাঢ়তে দেব না। স্বভদ্রকে তোমাদের হাতে দিতে পারব না।

তৃণাঙ্গন। পারবেন না?

আচার্য। না।

মহাপঞ্চক। তাহলে আর দ্বিধা করা নয়। তৃণাঙ্গন, এখন তোমাদের উচিত ওঁকে জোর করে ধরে নিয়ে ঘরে বন্ধ করা। ভীরু, কেউ সাহস করছ না? আমাকেই তবে এ কাজ করতে হবে?

জয়োত্তম। খবরদার—আচার্যদেবের গায়ে হাত দিতে পারবে না।

বিশ্বস্তব। না না, মহাপঞ্চক, ওঁকে অপমান করলে আমরা সইতে পারব না।

সংজীব। আমরা সকলে মিলে পায়ে ধরে ওঁকে রাজি করাব। একা স্বভদ্রের প্রতি দয়া করে উনি কি আমাদের সকলের অমঙ্গল ঘটাবেন?

তৃণাঙ্গন। এই অচলায়তনের এমন কত শিশু উপবাসে প্রাণত্যাগ করেছে—তাতে ক্ষতি কী হয়েছে।

স্বভদ্রের প্রবেশ

স্বভদ্র। আমাকে মহাতামস ব্রত করাও!

পঞ্চক। সর্বনাশ করলে! ঘুমিয়ে পড়েছে দেখে আমি এখানে

এসেছিলুম কখন জেগে উঠে চলে এসেছে ।

আচার্য । বৎস স্বভদ্র, এসো আমাৰ কোলে । যাকে পাপ বলে ভয়
কৰছ সে পাপ আমাৰ—আমি প্ৰায়শিত্ত কৰব ।

তৃণাঞ্জন । না না, আয় রে আয় স্বভদ্র, তুই মাহুষ না, তুই দেবতা ।

সঞ্জীব । তুই ধন্ত ।

বিশ্বন্তু । তোৱ বয়সে মহাতামস কৱা আৱ-কাৱও ভাগ্য ঘটেনি ।
সাৰ্থক তোৱ মা তোকে গৰ্তে ধাৱণ কৱেছিল ।

উপাধ্যায় । আহা স্বভদ্র, তুই আমাদেৱ অচলায়তনেৱই বালক
বটে ।

মহাপঞ্চক । আচার্য, এখনও কি তুমি জোৱ কৱে এই বালককে
এই মহাপুণ্য থেকে বঞ্চিত কৱতে চাচ্ছ ?

আচার্য । হায় হায়, এই দেখেই তো আমাৰ হৃদয় বিদীৰ্ণ হয়ে
যাচ্ছে । তোমোৱা যদি ওকে কাদিয়ে আমাৰ হাত থেকে ছিঁড়ে কেড়ে
নিয়ে যেতে তাহলেও আমাৰ এত বেদনা হত না । কিন্তু দেখছি হাজাৰ
বছৱেৱ নিষ্ঠুৱ বাহু অতটুকু শিশুৱ মনকেও পাথৱেৱ মুঠোয় চেপে ধৰেছে
একেবাৱে পাঁচ আঙুলোৱ দাগ বসিয়ে দিয়েছে রে । কখন সময় পেল
সে ? সে কি গৰ্তেৱ মধ্যেও কাজ কৱে ?

পঞ্চক । স্বভদ্র, আয় ভাই, প্ৰায়শিত্ত কৱতে যাই—আমিও যাৰ
তোৱ সঙ্গে ।

আচার্য । বৎস, আমিও যাৰ ।

স্বভদ্র । না না, আমাকে যে একলা থাকতে হ'বে—লোক থাকলে
যে পাপ হ'বে !

মহাপঞ্চক । ধন্ত শিশু, তুমি তোমোৱ ওই প্ৰাচীন আচার্যকে আজ
শিক্ষা দিলে । এসো তুমি আমাৰ সঙ্গে ।

আচার্য। না, আমি যতক্ষণ তোমাদের আচার্য আছি ততক্ষণ আমার আদেশ ব্যতীত কোনো ব্রত আবস্থা বা শেষ হতেই পারে না। আমি নিষেধ করছি। স্বভদ্র, আচার্যের কথা অমাঞ্চ ক'রো না—এসো পঞ্চক ওকে কোলে করে নিয়ে এসো।

স্বভদ্রকে লইয়া পঞ্চকের ও আচার্যের এবং উপাধ্যায়ের প্রস্থান মহাপঞ্চক। ধিক। তোমাদের মতো ভৌরুদের দুর্গতি হতে রক্ষা করে এমন সাধ্য কারও নেই। তোমরা নিজেও মরবে অন্ত সকলকেও মরবে। তোমাদের উপাধ্যায়টিও তেমনি হয়েছেন—তারও আর দেখা নেই।

পদাতিকের প্রবেশ

পদাতিক। রাজা আসছেন।

মহাপঞ্চক। ব্যাপারখানা কৌ। এ যে আমাদের রাজা মন্ত্রগুপ্ত।

রাজার প্রবেশ

রাজা। নরদেবগণ, তোমাদের সকলকে নমস্কার।

সকলে। জয়োস্ত্র রাজন্ম।

মহাপঞ্চক। কুশল তো ?

রাজা। অত্যন্ত মন্দ সংবাদ। প্রত্যন্তদেশের দৃতেরা এসে খবর দিল যে দাদাঠাকুরের দল এসে আমাদের রাজ্যসীমার প্রাচীর ভাঙ্গতে আবস্থা করেছে।

মহাপঞ্চক। দাদাঠাকুরের দল কারা ?

রাজা। ওই যে শোণপাংশুরা।

মহাপঞ্চক। শোণপাংশুরা যদি আমাদের প্রাচীর ভাঙ্গে তাহলে যে সমস্ত লঙ্ঘণ করে দেবে।

রাজা । সেইজগ্নেই তো ছুটে এলুম । তোমাদের কাছে আমার
প্রশ্ন এই যে আমাদের প্রাচীর ভাঙ্গল কেন ?

মহাপঞ্চক । শিখাসচ্ছন্দ মহাঈরব তো আমাদের প্রাচীর বক্ষা
করছেন ।

রাজা । তিনি অনাচারী শোণপাংশুদের কাছে আপন শিখা নত
করলেন ! নিশ্চয়ই তোমাদের মন্ত্র-উচ্চারণ অশুল্ক হচ্ছে, তোমাদের
ক্রিয়াপদ্ধতিতে স্থলন হচ্ছে নইলে এ যে স্বপ্নের অতৌত ।

মহাপঞ্চক । আপনি সত্যই অহুমান করেছেন মহারাজ ।

সঞ্চীব । একজটা দেবীর শাপ তো আর ব্যর্থ হতে পারে না ।

রাজা । একজটা দেবীর শাপ ! সর্বনাশ । কেন তাঁর শাপ ?

মহাপঞ্চক । যে উত্তরদিকে তাঁর অধিষ্ঠান এখানে একদিন সেই-
দিককার জানলা খোলা হয়েছে ।

রাজা । (বসিয়া পড়িয়া) তবে তো আর আশা নেই ।

মহাপঞ্চক । আচার্য অদীনপুণ্য এ-পাপের প্রায়শিক্ত করতে
দিচ্ছেন না ।

তৃণাঞ্জন । তিনি জোর করে আমাদের ঠেকিয়ে রেখেছেন ।

রাজা । তবে তো মিথ্যা আমি সৈন্য জড়ে করতে বলে এলুম
দাও, দাও, অদীনপুণ্যকে এখনই নির্বাসিত করে দাও ।

মহাপঞ্চক । আগামী অমাবস্যায়—

রাজা । না, না, এখন তিথিনক্ষত্র দেখবার সময় নেই । বিপাক
আসন্ন । সংকটের সময় আমি আমার রাজ-অধিকার খাটাতে পারি-
শান্তে তার বিধান আছে ।

মহাপঞ্চক । ইঁ আছে । কিন্তু আচার্য কে হবে ?

রাজা । তুমি, তুমি । এখনই আমি তোমাকে আচার্যের পদে

প্রতিষ্ঠিত করে দিলুম। দিক্পালগণ সাক্ষী রইলেন, এই ব্রহ্মচারীরা সাক্ষী রইলেন।

মহাপঞ্চক। অদীনপুণ্যকে কোথায় নির্বাসিত করতে চান ?

রাজা। আয়তনের বাহিরে নয়—কী জানি যদি শক্রপক্ষের সঙ্গে যোগ দেন। আমার পরামর্শ এই যে, আয়তনের প্রান্তে যে দর্তকদের পাড়া আছে এ-কয়দিন সেইখানে তাঁকে বন্ধ করে রেখো।

জয়েত্তম। আচার্য অদীনপুণ্যকে দর্তকদের পাড়ায়! তারা যে অন্ত্যজ পতিত জাতি।

মহাপঞ্চক। যিনি স্পর্ধাপূর্বক আচার লজ্যন করেন অনাচারীদের মধ্যে বাস করলেই তবে তাঁর চোখ ফুটবে। মনে ক'রো না আমার ভাইঁবলে পঞ্চককে ক্ষমা করব—তাঁরও সেইখানে গতি।

রাজা। দেখো মহাপঞ্চক, তোমার উপরই নির্ভর, যুদ্ধে জেতা চাই। আমার হার যদি হয় তবে সে তোমাদের অচলায়তনেরই অক্ষয় কলঙ্ক।

মহাপঞ্চক। কোনো ভয় করবেন না।

8

দর্তকপল্লী

পঞ্চক । নির্বাসন, আমাৰ নির্বাসন রে ! বেঁচে গেছি, বেঁচে গেছি ।
কিন্তু এখনও মনটাকে তাৰ খোলসেৱ ভিতৰ থেকে টেনে বেৱ কৰতে
পাৱছিনে কেন ?

গান

এই	মৌমাছিদেৱ ঘৱছাড়া কে কৱেছে রে ।
	তোৱা আমায় বলে দে ভাই বলে দে রে ।
	ফুলেৱ গোপন পৱানমাঝে
	নীৱব স্বৰে বাঁশি বাজে—
ওদেৱ	সেই মধুতে কেমনে মন ভৱেছে রে ।
	যে মধুটি লুকিয়ে আছে
	দেয় না ধৱা কাৰো কাছে
ওদেৱ	সেই মধুতে কেমনে মন ভৱেছে রে ।

দর্তকদলেৱ প্ৰবেশ

প্ৰথম দর্তক । দাদাঠাকুৱ ।

পঞ্চক । ও কী ও । দাদাঠাকুৱ বলছিস কাকে ? আমাৰ গায়ে
দাদাঠাকুৱ নাম লেখা হয়ে গেছে নাকি ?

প্ৰথম দর্তক । তোমাদেৱ কী খেতে দেব ঠাকুৱ ?

পঞ্চক । তোদেৱ যা আছে তাই আমৱা থাব ।

দ্বিতীয় দর্তক । আমাদেৱ থাবাৱ ? সে কি হয় ? সে যে সব
ছেঁওয়া হয়ে গেছে ।

পঞ্চক । সেজগে ভাবিসনে ভাই । পেটের খিদে যে আগুন, সে কারও ছোওয়া মানে না, সবই পবিত্র করে । ওরে তোরা সকালবেলায় করিস কী বল্ তো । ষড়ক্ষরিত দিয়ে একবার ঘটশুন্ধি করে নিবিনে ?

তৃতীয় দর্তক । ঠাকুর, আমরা নাচ দর্তকজাত—আমরা ওসব কিছুই জানিনে । আজ কত পুরুষ ধরে এখানে বাস করে আসছি কোনোদিন তো তোমাদের পায়ের ধুলা পড়েনি । আজ তোমাদের মন্ত্র পড়ে । আমাদের বাপ পিতামহকে উদ্বার করে দাও ঠাকুর ।

পঞ্চক । সর্বনাশ । বলিস কী । এখানেও মন্ত্র পড়তে হবে ! তাহলে নির্বাসনের দরকার কী ছিল । তা, সকালবেলা তোরা কী করিস বল্ তো ।

প্রথম দর্তক । আমরা শাস্ত্র জানিনে, আমরা নামগান করি ।

পঞ্চক । সে কী রকম ব্যাপার ? শোনা দেখি একটা ।

দ্বিতীয় দর্তক । ঠাকুর, সে তুমি শুনে হাসবে ।

পঞ্চক । আমিই তো ভাই এতদিন লোক হাসিয়ে আসছি—তোরা আমাকেও হাসাবি—শুনেও মন খুশি হয় । আমি যে কী মূল্যের মানুষ সে তোরা খবর পাসনি বলে এখনও আমার হাসিকে ভয় করিস । কিছু । ভাবিসনে—নির্ভয়ে শুনিয়ে দে ।

প্রথম দর্তক । আচ্ছা ভাই আয় তবে—গান ধর ।

গান

ও অকূলের কূল, ও অগতির গতি,

ও অনাথের নাথ, ও পতিতের পতি ।

ও নয়নের আলো, ও রসনার মধু,

ও রতনের হার, ও পরানের বঁধু ।

ও অপরূপ রূপ, ও মনোহর কথা
 ও চরমের স্বীকৃতি, ও মরমের ব্যথা ।
 ও ভিথারির ধন, ও অবোলার বোল—
 ও জনমের দোলা, ও মরণের কোল ।

পঞ্চক । দে ভাই, আমার মন্ত্রতন্ত্র সব ভুলিয়ে দে, আমার বিদ্যাসাধ্য
 সব কেড়ে নে, দে আমাকে তোদের ওই গান শিখিয়ে দে ।

প্রথম দর্তক । আমাদের গান ?

পঞ্চক । হা রে, হা ওই অধমের গান, অক্ষমের কান্না । তোদের
 এই মূর্ধের বিদ্যা এই কাঙালের সম্মল খুঁজেই তো আমার পড়াশুনা কিছু
 হল না, আমার ক্রিয়াকর্ম সমস্ত নিষ্ফল হয়ে গেল ! ও ভাই, আর-একটা
 শোনা—অনেক দিনকার তৃষ্ণা অল্লে মেটে না ।

দর্তকদলের গান

আমরা তারেই জানি তারেই জানি সাথের সাথি ।
 তারেই করি টানাটানি দিবারাতি ।

সঙ্গে তারি চরাই ধেনু,
 বাজাই বেণু,
 তারি লাগি বটের ছায়ায় আসন পাতি ।

তারে হালের মাঝি করি
 চালাই তরী,

বড়ের বেলায় টেউয়ের খেলায় মাতামাতি ।

সারাদিনের কাজ ফুরালে
 সন্ধ্যাকালে

তাহারি পথ চেয়ে ঘরে জালাই বাতি ।

আচার্যের প্রবেশ

আচার্য। সার্থক হল আমার নির্বাসন।

প্রথম দর্তক। বাবাঠাকুর আমাদের সমস্ত পাড়া আজ ত্রাণ পেয়ে
গেল। এতদিন তোমার চরণধূলো তো এখানে পড়েনি।

আচার্য। সে আমার অভাগ্য, সে আমারই অভাগ্য।

দ্বিতীয় দর্তক। বাবা, তোমার স্নানের জল কাকে দিয়ে তোলাব ?

এখানে তো—

আচার্য। বাবা, তোরাই তুলে আনবি।

প্রথম দর্তক। আমরা তুলে আনব—সে কি হয়!

আচার্য। হঁ বাবা, তোদের তোলা জলে আজ আমার অভিষেক
হবে।

দ্বিতীয় দর্তক। ওরে চল্ তবে ভাই চল্। আমাদের পাটলা
নদী থেকে জল আনি গে।

প্রস্থান

আচার্য। দেখো পঞ্চক, কাল এখানে এসে আমার ভারি মানি
বোধ হচ্ছিল।

পঞ্চক। আমি তো কাল রাত্রে ঘরের বাইরে শুয়েই কাটিয়ে
দিয়েছি।

আচার্য। যখন এইরকম অত্যন্ত কৃষ্টিত হয়ে আপনাকে আঢ়োপান্ত
পাপলিপ্ত মনে করে বসে আছি এমন সময় ওরা সন্ধ্যাবেলায় ওদের কাজ
থেকে ফিরে এসে সকলে মিলে গান ধরলে—

পারের কাণ্ডারী গো, এবার ঘাট কি দেখা যায় ?

নামবে কি সব বোঝা এবার ঘুচবে কি সব দায় ?

শুনতে শুনতে মনে হল আমার যেন একট। পাথরের দেহ গলে গেল।

দিনের পর দিন কী ভাব বয়েই বেড়িয়েছি। কিন্তু কতই সহজ, সরল
প্রাণ নিয়ে সেই পারের কাঞ্চারীর খেয়ায় চড়ে বসা।

পঞ্চক। আমি দেখছি দুর্ক জাতের একটা গুণ—ওরা একেবারে
স্পষ্ট করে নাম নিতে জানে। আর তট তট তোতয় তোতয় করতে
করতে আমার জিবের এমনি দশা হয়েছে যে, সহজ কথাটা কিছুতেই
মুখ দিয়ে বেরোতে চায় না। আচার্যদেব, কেবল ভালো করে না
ডাকতে পেরেই আমাদের বুকের ভিতরটা এমন শুকিয়ে এসেছে,
একবার খুব করে গলা ছেড়ে ডাকতে ইঙ্গী করছে। কিন্তু গলা
খোলে না যে—রাজ্যের পুঁথি পড়ে পড়ে গলা বুজে গিয়েছে প্রভু।
এমন হয়েছে আজ কান্না এলেও বেধে যায়।

আচার্য। সেইজন্তেই তো ভাবছি আমাদের গুরু আসবেন কবে।
জঙ্গাল সব ঠেলে ফেলে দিয়ে আমাদের প্রাণটাকে একেবারে সরল করে
দিন—হাতে করে ধরে সকলের সঙ্গে মিল করিয়ে দিন।

পঞ্চক। মনে হচ্ছে যেন ভিজে মাটির গন্ধ পাছি, কোথায় যেন
বর্ষা নেমেছে।

আচার্য। ওই পঞ্চক শুনতে পাচ্ছ কি?

পঞ্চক। কী বলুন দেখি?

আচার্য। আমার মনে হচ্ছে যেন স্বভদ্র কাঁদছে।

পঞ্চক। এখান থেকে কি শোনা যাবে? এ বোধ হয় আর-কোনো
শব্দ।

আচার্য। তা হবে পঞ্চক, আমি তার কান্না আমার বুকের মধ্যে
করে এনেছি। তার কান্নাটা এমন করে আমাকে বেজেছে
কেন জান? সে যে কান্না রাখতে পারে না তবু কিছুতে মানতে চায় না
সে কাঁদছে।

পঞ্চক । এতক্ষণে ওরা তাকে মহাতামসে বসিয়েছে—আর সকলে, মিলে থুব দুরে থেকে বাহবা দিয়ে বলছে স্বভদ্র দেবশিশু । আর কিছু না, আমি যদি রাজা হতুম তাহলে ওদের সবাইকে কানে ধরে দেবতা করে দিতুম—কিছুতে ছাড়তুম না ।

আচার্য । ওরা ওদের দেবতাকে কানাছে পঞ্চক । সেই দেবতারই কানায় এ রাজ্যের সকল আকাশ আকুল হয়ে উঠেছে । তবু ওদের পায়ানের বেড়া এখনও শতধা বিদৌর্ণ হয়ে গেল না ।

পঞ্চক । প্রতু, আমরা তাকে সকলে মিলে কত কানালুম তবু তাড়াতে পারলুম না । তাকে ঘে-ঘরে বসালুম সে-ঘরের আলো সব নিবিয়ে দিলুম—তাকে আর দেখতে পাইনে—তবু তিনি সেখানে বসে আছেন ।

গান

সকল জনম ভ'রে
ও মোর দরদিয়া ।

কাদি কানাই তোরে
ও মোর দরদিয়া ।

আছ হৃদয়মাঝে,

সেথা কতই ব্যর্থা বাজে
ওগো এ কি তোমায় সাজে
ও মোর দরদিয়া ।

এই দুয়ার-দেওয়া ঘরে
কভু আঁধার নাহি সরে
তবু আছ তারি 'পরে
ও মোর দরদিয়া ।

উপাচার্যের প্রবেশ

আচার্য। একি শৃতসোম। আমাৱ কৈ শৌভাগ্য। কিন্তু তুমি
এখানে এলে যে।

উপাচার্য। আৱ কোথা যাব বলো? তুমি চলে আসামাত্ৰ
অচলায়তন যে কী কঠিন হয়ে উঠল, কী শুকিয়ে গেল সে আমি বলতে
পাৰিনে। এখন এসো একবাৰ কোলাকুলি কৰি।

আচার্য। আমাকে ছুঁয়ো না—কাল থেকে ঘটগুলি ভূতগুলি কিছুই করিনি।

উপাচার্য ! সেইজন্যেই চলে এলুম । গুরু আসছেন, তুমি নেই !
আর মহাপঞ্জক এসে গুরুকে বরণ করে নেবে—এও দাঢ়িয়ে থেকে
দেখতে হবে । ওই শাস্ত্রের কীটটা গুরুকে আস্থান করে আনবার যোগ্য

এমন কথা যদি স্বয়ং মহামহির্জি জলধরগ়জিতঘোষ সুস্বরনক্ষত্রশঙ্কুশুমিত
এসেও বলেন তবু আমি মানতে পারব না।

পঞ্চক। আঃ দেখতে দেখতে কী মেষ করে এল। শুনছ
আচার্যদেব, বজ্রের পর বজ্র ! আকাশকে একেবারে দিকে দিকে দফ্ত
করে দিলে যে।

আচার্য। ওই যে নেমে এল বৃষ্টি—পৃথিবীর কতদিনের পথ-চাওয়া
বৃষ্টি—অরণ্যের কত রাতের স্বপ্ন-দেখা বৃষ্টি।

পঞ্চক। মিটল এবার মাটির তৃষ্ণা—এই যে কালো মাটি—এই যে
সকলের পায়ের নিচেকার মাটি।

ডালিতে কেয়াফুল কদম্বফুল লইয়া বাঢ়সহ দর্ভকদলের প্রবেশ

আচার্য। বাবা, তোমাদের এ কী সমারোহ। আজ এ কী কাণ্ড।

প্রথম দর্তক। বাবাঠাকুর, আজ তোমাদের নিয়েই সমারোহ।
কখনো পাইনে আজ পেয়েছি।

দ্বিতীয় দর্তক। আমরা তো শাস্তি কিছুই জানিনে—তোমাদের
দেবতা আমাদের ঘরে আসে না।

তৃতীয় দর্তক। কিন্তু আজ দেবতা কী মনে করে অতিথি হয়ে এই
অধমদের ঘরে এসেছেন।

প্রথম দর্তক। তাই আমাদের যা আছে তাই দিয়ে তোমাদের সেবা
করে নেব।

দ্বিতীয় দর্তক। আমাদের মন্ত্র নেই বলে আমরা শুধু কেবল গান
গাই।

মাদল বাজাইয়া নৃত্যগীত

উতল ধারা বাদল ঝরে,
 সকল বেলা একা ঘরে ।

 সজল হাওয়া বহে বেগে,
 পাগল নদী উঠে জেগে,
 আকাশ ঘেরে কাজল মেঘে,
 তমালবনে আধার করে ।

 ওগো বঁধু দিনের শেষে
 এলে তুমি কেমন বেশে ।

 আঁচল দিয়ে শুকাব জল
 মুছাব পা আকুল কেশে ।

 নিবিড় হবে তিমির রাতি,
 জেলে দেব প্রেমের বাতি,
 পরানখানি দিব পাতি
 চরণ রেখো তাহার 'পরে ।

আঁচার্য । পঞ্চক, আমাদেরও এমনি করে ডাকতে হবে—বজ্রবে
 যিনি দুরজ্ঞায় ঘা দিয়েছেন তাকে ঘরে দেকে নাও—আর দেরি ক'রো
 না ।

ভুলে গিয়ে জীবন মরণ
 লব তোমায় করে বরণ,
 করিব জয় শরমত্বাসে
 দাঢ়াব আজ তোমার পাশে

বাঁধন বাধা যাবে জলে,
 স্থথদুঃখ দেব দলে,
 ঝড়ের রাতে তোমার সাথে
 বাহির হব অভয় ভরে ।
 সকলে । উতল ধারা বাদল ঝরে—
 দুয়ার খুলে এলে ঘরে ।
 চোখে আমার ঝলক লাগে,
 সকল মনে পুলক জাগে,
 চাহিতে চাই মুখের বাগে
 নয়ন মেলে কাপি ডরে ।
 পঞ্চক । ওই আবার বজ্জ ।
 আচার্য । দ্বিগুণ বেগে বৃষ্টি এল ।
 উপাচার্য । আজ সমস্ত রাত এমনি করেই কাটবে ।

অচলায়তন

মহাপঞ্চক, তৃণাঞ্জন, সঞ্জীব, বিশ্বস্তর, জয়োত্তম

মহাপঞ্চক। তোমরা অত ব্যস্ত হয়ে শড়ছ কেন। কোনো ভয় নেই।
তৃণাঞ্জন। তুমি তো বলছ ভয় নেই, এই যে থবর এল শক্রসৈন্য
অচলায়তনের প্রাচীর ফুটো করে দিয়েছে।

মহাপঞ্চক। এ-কথা বিশ্বাসযোগ্য নয়। শিলা জলে ভাসে!
ঝেছুরা অচলায়তনের প্রাচীর ফুটো করে দেবে! পাগল হয়েছ!

সঞ্জীব। কে যে বললে দেখে এসেছে!

মহাপঞ্চক। সে স্বপ্ন দেখেছে।

জয়োত্তম। আজই তো আমাদের গুরুর আসবার কথা।

মহাপঞ্চক। তাঁর জগ্নে সমস্ত আয়োজন ঠিক হয়ে গেছে; কেবল
যে-ছেলের মাবাপ ভাইবোন কেউ মরেনি এমন নবম গর্ভের সন্তান
এখনও জুটিয়ে আনতে পারলে না—হারে দাঁড়িয়ে কে যে মহারক্ষা পড়বে
ঠিক করতে পারছিনে।

সঞ্জীব। গুরু এলে তাঁকে চিনে নেবে কে। আচার্য অদীনপুণ্য
তাঁকে জানতেন। আমরা তো কেউ তাঁকে দেখিনি।

মহাপঞ্চক। আমাদের আয়তনে যে শাঁক বাজায় সেই বৃন্দ তাঁকে
দেখেছে। আমাদের পূজার ফুল যে জোগায় সেও তাঁকে জানে।

বিশ্বস্তর। ওই যে উপাধ্যায় ব্যস্ত হয়ে ছুটে আসছেন।

মহাপঞ্চক। নিশ্চয় গুরু আসবার সংবাদ পেয়েছেন। কিন্তু মহারক্ষা
পাঠের কী করা যায়। ঠিক লক্ষণসম্পর্ক ছেলে তো পাওয়া গেল না।

উপাধ্যায়ের প্রবেশ

মহাপঞ্চক । কতদূর ।

উপাধ্যায় । কতদূর কী । এসে পড়েছে যে ।

মহাপঞ্চক । কই দ্বারে তো এখন ও শাঁক বাজালে না ।

উপাধ্যায় । বিশেষ দরকার দেখিনে—কারণ দ্বারের চিহ্ন দেখতে পাচ্ছিনে—ভেঙে চুরমাৰ হয়ে গেছে ।

মহাপঞ্চক । বল কী । দ্বার ভেঙেছে ?

উপাধ্যায় । শুধু দ্বার নয়, প্রাচীরগুলোকে এমনি সমান করে শুইয়ে দিয়েছে যে তাদের সম্বন্ধে আর কোনো চিন্তা করবার দরকার নেই ।

মহাপঞ্চক । কিন্তু আমাদের দৈবজ্ঞ যে গণনা করে স্পষ্ট দেখিয়ে দিয়ে গেল যে—

উপাধ্যায় । তার চেয়ে তের স্পষ্ট দেখা যাচ্ছে শক্রসৈন্যদের রক্তবর্ণ টুপিগুলো ।

ছাত্রগণ । কী সর্বনাশ ।

সঞ্জীব । কিসের মন্ত্র তোমার মহাপঞ্চক ।

তৃণাঞ্জন । আমি তো তখনই বলেছিলুম এ-সব কাজ এই কাঁচা-বয়সের পুঁথিপড়া অকালপক্ষদের দিয়ে হবার নয় ।

বিশ্বন্তর । কিন্তু এখন করা যায় কী ।

তৃণাঞ্জন । আমাদের আচার্যদেবকে এখনই ফিরিয়ে আনি গে । তিনি থাকলে এ বিপত্তি ঘটতেই পারত না । হাজার হ'ক লোকটা পাকা ।

সঞ্জীব । কিন্তু দেখো মহাপঞ্চক আমাদের আয়তনের যদি কোনো বিপত্তি ঘটে তাহলে তোমাকে টুকরো টুকরো করে ছিঁড়ে ফেলব ।

উপাধ্যায় । সে-পরিশ্রমটা তোমাদের করতে হবে না, উপযুক্ত লোক
আসছে ।

মহাপঞ্চক । তোমরা মিথ্যা বিচলিত হচ্ছ । বাইরের প্রাচীর
ভাঙতে পারে, কিন্তু ভিতরের লোহার দরজা বন্ধ আছে । সে যখন
ভাঙবে তখন চন্দ্রমূর্ধ নিবে যাবে । আমি অভয় দিচ্ছি তোমরা স্থির হয়ে
দাঢ়িয়ে অচলায়তনের রক্ষক-দেবতার আশ্চর্য শক্তি দেখে নাও ।

উপাধ্যায় । তার চেয়ে দেখি কোন্দিক দিয়ে বেরোবার রাস্তা ।

তৃণাঞ্জন । আমাদেরও তো সেই ইচ্ছা । কিন্তু এখান থেকে বেরোবার
পথ যে জানিইনে । কোনোদিন বেরোতে হবে বলে স্বপ্নেও মনে
করিনি ।

সঞ্জীব । শুনছ—ওই শুনছ, ভেঙে পড়ল সব ।

ছাত্রগণ । কী হবে আমাদের । নিশ্চয় দরজা ভেঙেছে ।

তৃণাঞ্জন । ধরো মহাপঞ্চককে । বাঁধো ওকে । একজটা দেবীর
কাছে ওকে বলি দেবে চলো ।

মহাপঞ্চক । সেই কথাই ভালো । দেবীর কাছে আমাকে বলি
দেবে চলো । তাঁর রোষ শান্তি হবে । এমন নিষ্পাপ বলি তিনি আর
পাবেন কোথায় ।

বালকদলের প্রবেশ

উপাধ্যায় । কী রে তোরা সব নৃত্য করছিস কেন ।

প্রথম বালক । আজ একী মজা হল ।

উপাধ্যায় । মজাটা কী রকম শুনি ।

দ্বিতীয় বালক । আজ চারিদিক থেকেই আলো আসছে—সব যেন
ফাঁক হয়ে গেছে ।

তৃতীয় বালক। এত আলো তো আমরা কোনোদিন দেখিনি।

প্রথম বালক। কোথাকার পাথির ডাক এখান থেকেই শোনা যাচ্ছে।

দ্বিতীয় বালক। এ-সব পাথির ডাক আমরা তো কোনোদিন শুনিনি। এ তো আমাদের খাঁচার ময়নার মতো একেবারেই নয়।

প্রথম বালক। আজ আমাদের খুব ছুটতে ইচ্ছে করছে। তাতে কি দোষ হবে মহাপঞ্চকদাদা।

মহাপঞ্চক। আজকের কথা ঠিক বলতে পারছিনে। আজ কোনো নিয়ম বঙ্গা করা চলবে বলে বোধ হচ্ছে না।

প্রথম বালক। আজ তাহলে আমাদের ষড়াসন বঙ্গ ?

মহাপঞ্চক। হঁ। বঙ্গ।

সকলে। ওরে কৌ মজা রে মজা।

দ্বিতীয় বালক। আজ পংক্তিধোতির দরকার নেই ?

মহাপঞ্চক। না।

সকলে। ও রে কৌ মজা। আঃ আজ চারিদিকে কৌ আলো।

জয়েত্তম। আমারও মনটা নেচে উঠছে বিশ্বস্তর। এ কি ভয়, না আনন্দ, কিছুই বুঝতে পারছিনে।

বিশ্বস্তর। আজ একটা অদ্ভুত কাণ্ড হচ্ছে জয়েত্তম।

সঞ্জীব। কিন্তু ব্যাপারটা যে কৌ ভেবে উঠতে পারছিনে। ওরে ছেলেগুলো, তোরা হঠাত এত খুশি হয়ে উঠলি কেন বল দেখি।

প্রথম বালক। দেখছ না সমস্ত আকাশটা যেন ঘরের মধ্যে দৌড়ে এসেছে।

দ্বিতীয় বালক। মনে হচ্ছে ছুটি—আমাদের ছুটি।

তৃতীয় বালক। সকাল থেকে পঞ্চকদাদাৰ সেই গানটা কেবলই আমরা গেয়ে বেড়াচ্ছি।

জয়োত্তম । কোন্ গান ।

প্রথম বালক । সেই যে—

আলো, আমাৰ আলো, ওগো

আলো ভুবনভৱা ।

আলো নয়ন-ধোওয়া আমাৰ

আলো হৃদয়হৱা ।

নাচে আলো নাচে—ও ভাই

আমাৰ প্রাণেৰ কাছে,

বাজে আলো বাজে—ও ভাই

হৃদয়-বীণাৰ মাঝে ;

জাগে আকাশ ছোটে বাতাস

হাসে সকল ধৱা ।

আলো, আমাৰ আলো, ওগো

আলো ভুবনভৱা ।

আলোৰ শ্রোতে পাল তুলেছে

হাজাৰ প্ৰজাপতি ।

আলোৰ তেউয়ে উঠল নেচে

মল্লিকা মালতী ।

মেঘে মেঘে সোনা—ও ভাই

যায় না মানিক গোনা,

পাতায় পাতায় হাসি—ও ভাই

পুলক রাশি রাশি,

সুরনদীৰ কূল ডুবেছে

সুধা-নিৰার-ঝৱা ।

আলো, আমার আলো, ওগো
আলো ভুবনভরা।

বালকদের প্রস্থান

জয়োতিম। দেখো মহাপঞ্চকদাদা, আমার মনে হচ্ছে ভয় কিছুই
নেই—নইলে ছেলেদের মন এমন অকারণে খুশি হয়ে উঠল কেন।
মহাপঞ্চক। ভয় নেই সে তো আমি বরাবর বলে আসছি।

শঙ্খবাদক ও মালীর প্রবেশ

উভয়ে। গুরু আসছেন।
সকলে। গুরু ?
মহাপঞ্চক। শুনলে তো। আগি নিশ্চয় জানতুম তোমার আশঙ্কা
বুথ।
সকলে। ভয় নেই আর ভয় নেই।
তৃণাঙ্গন। মহাপঞ্চক যখন আছেন তখন কি আমাদের ভয় থাকতে
পারে।
সকলে। জয় আচার্য মহাপঞ্চকের।

যোদ্ধা বেশে দাদাঠাকুরের প্রবেশ

শঙ্খবাদক ও মালী। (প্রশাম করিয়া) জয় গুরুজির জয়।
(সকলে স্তুতি)

মহাপঞ্চক। উপাধ্যায়, এই কি গুরু।
উপাধ্যায়। তাই তো শুনছি।
মহাপঞ্চক। তুমি কি আমাদের গুরু।

দাদাঠাকুর। হঁ। তুমি আমাকে চিনবে না কিন্তু আমিই তোমাদের গুরু।

মহাপঞ্চক। তুমি গুরু? তুমি আমাদের সমস্ত নিয়ম লজ্যন করে এ কোন্ পথ দিয়ে এলে। তোমাকে কে মানবে।

দাদাঠাকুর। আমাকে মানবে না জানি, কিন্তু আমিই তোমাদের গুরু।

মহাপঞ্চক। তুমি গুরু? তবে এই শক্রবেশে কেন।

দাদাঠাকুর। এই তো আমার গুরুর বেশ। তুমি যে আমার সঙ্গে লড়াই করবে—সেই লড়াই আমার গুরুর অভ্যর্থনা।

মহাপঞ্চক। কেন তুমি আমাদের প্রাচীর ভেঙে দিয়ে এলে।

দাদাঠাকুর। তুমি কোথাও তোমার গুরুর প্রবেশের পথ রাখনি।

মহাপঞ্চক। তুমি কি মনে করেছ তুমি অস্ত্র হাতে করে এসেছ বলে আমি তোমার কাছে হার মানব।

দাদাঠাকুর। না, এখনই না। কিন্তু দিনে দিনে হার মান্ত হবে, পদে পদে।

মহাপঞ্চক। আমাকে নিরস্ত্র দেখে ভাবছ আমি তোমাকে আঘাত করতে পারিনে?

দাদাঠাকুর। আঘাত করতে পার কিন্তু আহত করতে পার না—আমি যে তোমার গুরু।

মহাপঞ্চক। উপাধ্যায়, তোমরা একে প্রণাম করবে নাকি।

উপাধ্যায়। দয়া করে উনি যদি আমাদের প্রণাম গ্রহণ করেন তাহলে প্রণাম করব বই কি—তা নইলে যে—

মহাপঞ্চক। না, আমি তোমাকে প্রণাম করব না।

দাদাঠাকুর। আমি তোমার প্রণাম গ্রহণ করব না—আমি তোমাকে প্রণত করব।

মহাপঞ্চক । তুমি আমাদের পূজা নিতে আসনি ?

দাদাঠাকুর । আমি তোমাদের পূজা নিতে আসিনি, অপয়ান নিতে
এসেছি ।

মহাপঞ্চক । তোমার পশ্চাতে অস্ত্রধারী এ কারা ।

দাদাঠাকুর । এরা আমার অনুবর্তী—এরা শোণপাংশু ।
সকলে । শোণপাংশু !

মহাপঞ্চক । এরাই তোমার অনুবর্তী ?

দাদাঠাকুর । হ্যাঁ ।

মহাপঞ্চক । এই মন্ত্রহীন কর্মকাণ্ডীন স্লেছদল !

দাদাঠাকুর । এসো তো, তোমাদের মন্ত্র এদের শুনিয়ে দাও ।
এদের কর্মকাণ্ড কী রকম তাও ক্রমে দেখতে পাবে ।

শোণপাংশুদের গান

যিনি সকল কাজের কাজি মোরা

তাঁরি কাজের সঙ্গী ।

ঝার নানারঙের রঙ, মোরা

তাঁরি রসের রঙী ।

তাঁরি বিপুল ছন্দে ছন্দে

মোরা যাই চলে আনন্দে,

তিনি যেমনি বাজান ভেরী, মোদের

তেমনি নাচের ভঙ্গি ।

এই জন্মরণ-থেলায়

মোরা মিলি তাঁরি মেলায়

এই দুঃখস্থথের জীবন মোদের
তাঁরি খেলার অঙ্গী ।
ওরে ডাকেন তিনি যবে
তাঁর জলদমন্ত্র রবে,
ছুটি পথের কাঁটা পায়ে দলে
সাগরগিরি লজ্জি ।

মহাপঞ্চক । আমি এই আয়তনের আচার্য—আমি তোমাকে আদেশ করছি তুমি এখন ওই শ্লেষ্ঠদলকে সঙ্গে নিয়ে বাহির হয়ে যাও ।

দাদাঠাকুর । আমি যাকে আচার্য নিযুক্ত করব সেই আচার্য ; আমি যা আদেশ করব সেই আদেশ ।

মহাপঞ্চক । উপাধ্যায়, আমরা এমন করে দাঁড়িয়ে থাকলে চলবে না । এসো আমরা এদের এখান থেকে বাহির করে দিয়ে আমাদের আয়তনের সমস্ত দরজাগুলো আবার একবার দ্বিগুণ দৃঢ় করে বন্ধ করি ।

উপাধ্যায় । এরাই আমাদের বাহির করে দেবে, সেই সন্তাবনাটাই প্রবল বলে বোধ হচ্ছে ।

প্রথম শোণপাংশু । অচলায়তনের দরজার কথা বলছ—সে আমরা আকাশের সঙ্গে দিব্যি সমান করে দিয়েছি ।

উপাধ্যায় । বেশ করেছ ভাই । আমাদের ভারি অস্তুবিধি হচ্ছিল । এত তালা-চাবির ভাবনাও ভাবতে হত ।

মহাপঞ্চক । পাথরের প্রাচীর তোমরা ভাঙতে পার, লোহার দরজা তোমরা খুলতে পার, কিন্তু আমি আমার ইঙ্গিয়ের সমস্ত দ্বার রোধ করে এই বস্তু—যদি প্রায়োপবেশনে মরি তব তোমাদের হাওয়া তোমাদের আলো লেশমাত্র আমাকে স্পর্শ করতে দেব না ।

প্রথম শোণপাংশু। এ পাগলটা কোথাকার রে। এই তলোয়ারের ডগা দিয়ে ওর মাথার খুলিটা একটু ফাক করে দিলে ওর বুদ্ধিতে একটু হাওয়া লাগতে পারে।

মহাপঞ্চক। কিসের ভয় দেখাও আমায়। তোমরা মেরে ফেলতে পার, তার বেশি ক্ষমতা তোমাদের নেই।

প্রথম শোণপাংশু। ঠাকুর, এই লোকটাকে বন্দী করে নিয়ে যাই— আমাদের দেশের লোকের ভারি মজা লাগবে।

দাদাঠাকুর। ওকে বন্দী করবে তোমরা? এমন কী বন্ধন তোমাদের হাতে আছে।

দ্বিতীয় শোণপাংশু। ওকে কি কোনো শাস্তি দেব না।

দাদাঠাকুর। শাস্তি দেবে! ওকে স্পর্শ করতেও পারবে না। ও আজ যেখানে বসেছে সেখানে তোমাদের তলোয়ার পৌছয় না।

বালকদলের প্রবেশ

সকলে। তুমি আমাদের গুরু?

দাদাঠাকুর। হঁ, আমি তোমাদের গুরু।

সকলে। আমরা প্রণাম করি।

দাদাঠাকুর। বৎস, তোমরা মহাজীবন লাভ করো।

গ্রাথম বালক। ঠাকুর, তুমি আমাদের কী করবে।

দাদাঠাকুর। আমি তোমাদের সঙ্গে খেলব।

সকলে। খেলবে?

দাদাঠাকুর। নইলে তোমাদের গুরু হয়ে স্বত্ত্ব কিসের।

সকলে। কোথায় খেলবে।

দাদাঠাকুর। আমার খেলার মস্ত মাঠ আছে।

প্রথম বালক। মন্ত। এই ঘরের মতো মন্ত ?
 দাদাঠাকুর। এর চেয়ে অনেক বড়ো।
 দ্বিতীয় বালক। এর চেয়েও বড়ো। ওই আঙিনাটার মতো ?
 দাদাঠাকুর। তার চেয়ে বড়ো।
 দ্বিতীয় বালক। তার চেয়ে বড়ো। উঃ কী ভয়ানক !
 প্রথম বালক। সেখানে খেলতে গেলে পাপ হবে না ?
 দাদাঠাকুর। কিসের পাপ ?
 দ্বিতীয় বালক। খোলা জায়গায় গেলে পাপ হয় না ?
 দাদাঠাকুর। না বাছা, খোলা জায়গাতেই সব পাপ পালিয়ে যায়।
 সকলে। কখন নিয়ে যাবে ?
 দাদাঠাকুর। এখানকার কাজ শেষ হলেই।
 জয়োতিষ। (প্রণাম করিয়া) প্রভু, আমিও যাব।
 বিশ্বন্তর। সঞ্জীব, আর দ্বিধা করলে কেবল সময় নষ্ট হবে। প্রভু,
 ওই বালকদের সঙ্গে আমাদেরও ডেকে নাও।
 সঞ্জীব। মহাপঞ্চকদাদা, তুমিও এসো না !
 মহাপঞ্চক। না, আমি না।

৬

দর্তকপন্নী

গান

পঞ্চক । আমি যে সব নিতে চাই, সব নিতে ধাই রে ।

আমি আপনাকে ভাই মেলব যে বাইরে ।

পালে আমার লাগল হাওয়া,

হবে আমার সাগর যাওয়া,

ঘাটে ত্ৰী নই বাঁধা নাই রে ।

স্বথে দুখে বুকের মাঝে

পথের বাঁশি কেবল বাজে,

সকল কাজে শুনি যে তাই রে ।

পাগলামি আজ লাগল পাখায

পাখি কি আর থাকবে শাখায ?

দিকে দিকে সাড়া যে পাই বে ।

আচার্যের প্রবেশ

পঞ্চক । দূরে থেকে নানাপ্রকার শব্দ শুনতে পাছি আচার্যদেব ।

অচলায়তনে বোধ হয় খুব সমারোহ চলছে ।

আচার্য । সময় তো হয়েছে । কালই তো তার আসবাব কথা
ছিল । আমার মনটা ব্যাকুল হয়ে উঠেছে । একবার শৃতসোমকে
ওথানে পাঠিয়ে দিই ।

পঞ্চক । তিনি আজ একাদশীর তর্পণ করবেন বলে কোথায় ইন্দ্রজল
পাওয়া যায় সেই খোজে বেরিয়েছেন ।

দৰ্তকদলের প্ৰবেশ

পঞ্চক । কী ভাই, তোৱা এত ব্যস্ত কিসেৱ ?

প্ৰথম দৰ্তক । শুনছি অচলায়তনে কাৱা সব লড়াই কৱতে এসেছে ।

আচার্য । লড়াই কিসেৱ ? আজ তো গুৰু আসবাৱ কথা ।

দ্বিতীয় দৰ্তক । না না, লড়াই হচ্ছে খবৱ পেয়েছি । সমস্ত ভেঙেচুৱে
একাকাৱ কৱে দিলে যে ।

তৃতীয় দৰ্তক । বাৰাঠাকুৱ, তোমৱা যদি হকুম কৱ আমৱা যাই
ঢেকাই গিয়ে ।

আচার্য । ওখানে তো লোক টেৱ আছে তোমাদেৱ ভয় নেই বাবা ।

প্ৰথম দৰ্তক । লোক তো আছে কিন্তু তাৱা লড়াই কৱতে পাৱবে
কেন ?

দ্বিতীয় দৰ্তক । শুনেছি কতৰকম মন্ত্ৰলেখা তাগাতাবিজ দিয়ে তাৱা
হুখানা হাত আগাগোড়া কষে বেঁধে রেখেছে । খোলে না, পাছে কাজ
কৱতে গেলেই তাদেৱ হাতেৱ গুণ নষ্ট হয় ।

পঞ্চক । আচার্যদেৱ, এদেৱ সংবাদটা সত্যই হবে । কাল সমস্ত
ৱাত মনে হচ্ছিল চাৰিদিকে বিশ্বব্ৰহ্মাণ্ড ঘেন ভেঙেচুৱে পড়ছে । ঘুমেৱ
ঘোৱে ভাবছিলুম স্বপ্ন বুঝি ।

আচার্য । তবে কি গুৰু আসেননি ?

পঞ্চক । হয়তো বা দাদা ভুল কৱে আমাৱ গুৰুৱই সঙ্গে লড়াই
বাধিয়ে বুসেছেন ! আটক নেই । বাত্ৰে তাঁকে হঠাত দেখে হয়তো
যমদূত বলে ভুল কৱেছিলেন ।

প্ৰথম দৰ্তক । আমৱা শুনেছি কে বলছিল গুৰুও এসেছেন ।

আচার্য । গুৰুও এসেছেন । সে কী রকম হল ?

পঞ্চক । তবে লড়াই করতে কারা এসেছে বল্ তো ?

প্রথম দর্তক । লোকের মুখে শুনি তাদের নাকি বলে দাদাঠা কুরের দল ।

পঞ্চক । দাদাঠা কুরের দল ! বল্ বল্ শুনি ঠিক বলছিস তো রে ?

দ্বিতীয় দর্তক । হঁ, সকলেই তো বলছে দাদাঠা কুরের দল ।

পঞ্চক । ওরে কী আনন্দ রে কী আনন্দ ।

আচার্য । এ কি পঞ্চক, হঠাত তুমি এ রকম উন্নত হয়ে উঠলে কেন ?

পঞ্চক । প্রভু, আমার মনের একটা বাসনা ছিল কোনো স্বয়োগে যদি আমাদের দাদাঠা কুরের সঙ্গে গুরুর মিলন করিয়ে দিতে পারি, তাহলে দেখে নিই কে হারে কে জেতে !

আচার্য । পঞ্চক, তোমার কথা আমি স্পষ্ট বুঝতে পারছিনে। তুমি দাদাঠা কুর বলছ কাকে ?

পঞ্চক । আচার্যদেব, ওইটে আমার গোপন কথা, অনেকদিন থেকেই মনে রেখে দিয়েছি। এখন তোমাকে বলব না প্রভু, যদি তিনি এসে থাকেন তাহলে একেবারে চোখে চোখে মিলিয়ে দেব ।

প্রথম দর্তক । বাবাঠা কুর, হকুম করো, একবার ওদের সঙ্গে লড়ে আসি—দেখিয়ে দিই এখানে মানুষ আছে ।

পঞ্চক । আয় না ভাই আমিও তোদের সঙ্গে চলব রে ।

দ্বিতীয় দর্তক । তুমিও লড়বে নাকি ঠাকুর ?

পঞ্চক । হঁ, লড়ব ।

আচার্য । কী বলছ পঞ্চক ! তোমাকে লড়তে কে ডাকছে ?

পঞ্চক । আমার প্রাণ ডাকছে। একটা কিসের মায়াতে মন জড়িয়ে রয়েছে প্রভু। ঘেন কেবলই স্বপ্ন দেখছি—আর যতই জোর করছি কিছুতেই জাগতে পারছিনে।' কেবল এমন বসে বসে হবে না দেব ।

একেবারে লড়াইয়ের মাঝখানে গিয়ে পড়তে না পারলে কিছুতেই এ^১
ঘোর কাটবে না ।

গান

আর নহে আর নয় ।

আমি করিনে আর ভয় ।

আমার ঘূচল বাঁধন ফলল সাধন
হল বাঁধন ক্ষয় ।

এ আকাশে এ ডাকে

আমায় আর কে ধরে রাখে ।

আমি সকল দুঃখার খুলেছি আজ
যাব সকলময় ।

ওরা বসে বসে মিছে

শুধু মায়াজাল গাঁথিছে,

ওরা কী যে গোনে ঘরের কোণে
আমায় ডাকে পিছে ।

আমার অস্ত্র হল গড়া,

আমার বর্ম হল পরা,

এবার ছুটবে ঘোড়া পৰনবেগে
করবে ভুবন জয় ।

মালীর প্রবেশ

মালী । আচার্যদেব, আমাদের গুরু আসছেন ।

আচার্য । বলিস কী । গুরু ? তিনি এখানে আসছেন ? আমাকে
আহ্বান করলেই তো আমি যেতুম ।

প্রথম দর্তক। এখানে তোমাদের গুরু এলে তাকে বসাব কোথায় ?
দ্বিতীয় দর্তক। বাবাঠাকুর, তুমি এখানে তার বসবার জায়গাটাকে
একটু শোধন করে না ও—আমরা তফাতে সরে যাই ।

আর একদল দর্তকের প্রবেশ

প্রথম দর্তক। বাবাঠাকুর, এ তোমাদের গুরু নয়—সে এ পাড়ায়
আসবে কেন ? এ যে আমাদের গোসাই !

দ্বিতীয় দর্তক। আমাদের গোসাই ?

প্রথম দর্তক। হারে হারে, আমাদের গোসাই । এমন সাজ তার আর
কখনো দেখিনি । একেবারে চোখ ঝলঝে যায় ।

তৃতীয় দর্তক। ঘরে কী আছে রে ভাই সব বের করু ।

দ্বিতীয় দর্তক। বনের জাম আছে রে ।

চতুর্থ দর্তক। আমার ঘরে খেজুব আছে ।

প্রথম দর্তক। কালো গুরুর দুধ শিগগির দুয়ে আনু দানা ।

দাদাঠাকুরের প্রবেশ

আচার্য। (প্রণাম করিয়া) জয় গুরুজির জয ।

পঞ্চক। এ কী । এ যে দাদাঠাকুর । গুরু কোথায় ।

দর্তকদল। গোসাইঠাকুর। প্রণাম হই । খবর দিয়ে এলে না
কেন । তোমার তোগ যে তৈরি হয়নি ।

দাদাঠাকুর। কেন ভাই, তোদের ঘরে আজ রান্না চড়েনি নাকি ।
তোরাও মন্ত্র নিয়ে উপোস করতে আরম্ভ করেছিস নাকি রে ?

প্রথম দর্তক। আমরা আজ শুধু মাষকলাই আর ভাত চড়িয়েছি ।
ঘরে আর কিছু ছিল না ।

পারব। এবাব তবে তোমার সঙ্গে তোমারই বোৰা মাথায় নিয়ে
বেরিয়ে পড়ি ঠাকুৱ।

দাদাঠাকুৱ। আমি তোমার জায়গা ঠিক কৰে রেখেছি।

পঞ্চক। কোথায় ঠাকুৱ।

দাদাঠাকুৱ। ওই অচলায়তনে।

পঞ্চক। আবাব অচলায়তনে? আমাৰ কাৰাদণ্ডেৰ মেয়াদ
ফুৱোয়নি?

দাদাঠাকুৱ। কাৰাগাৰ যা ছিল সে তো আমি ভেঙে ফেলেছি,
এখন সেই উপকৰণ দিয়ে সেইখানেই তোমাকে মন্দিৰ গেঁথে তুলতে
হবে।

পঞ্চক। ঠাকুৱ, আমি তোমাকে জোড়হাত কৰে বলছি আৱ
আমাকে বসিয়ে রাখাৰ কাজে লাগিয়ো না। তোমার ওই বীৰবেশে
আমাৰ মন ভুলেছে—তোমাকে এমন মনোহৰ আৱ কথনো দেখিনি।

দাদাঠাকুৱ। ভয় নেই পঞ্চক। অচলায়তনে আৱ সেই শান্তি
দেখতে পাৰে না। তাৰ দ্বাৰা ফুটো কৰে দিয়ে আমি তাৰ মধ্যেই
লড়াইয়েৰ ৰ'ড়ো হাওয়া এনে দিয়েছি। নিজেৰ নাসাগ্ৰভাগেৰ দিকে
একদৃষ্টে তাকিয়ে বসে থাকবাৰ দিন এখন চিৰকালেৰ মতো ঘুচিয়ে
দিয়েছি।

পঞ্চক। কিন্তু অচলায়তনেৰ লোকে যে আমাকে আপন বলে গ্ৰহণ
কৰবে না প্ৰভু।

দাদাঠাকুৱ। আমি বলছি তুমি অচলায়তনেৰ লোকেৰ সকলেৰ
চেয়ে আপন।

পঞ্চক। কিন্তু দাদাঠাকুৱ, আমি কেবল একলা, একলা, ওৱা
আমাকে সবাই ঠেলে রেখে দেবে।

দাদাঠাকুর। ওরা তোমাকে গ্রহণ করতে চাচ্ছে না, সেইজগেই
ওখানে তোমার সবচেয়ে দরকার। ওরা তোমাকে টেলে দিচ্ছে বলেই
তুমি ওদের টেলতে পারবে না।

পঞ্চক। আমাকে কী করতে হবে?

দাদাঠাকুর। যে ষেখানে ছড়িয়ে আছে সবাইকে ডাক দিয়ে আনতে
হবে।

পঞ্চক। সবাইকে কি কুলোবে?

দাদাঠাকুর। না যদি কুলোয় তাহলে এমনি করে দেয়াল আবার
আর-একদিন ভাঙতেই হবে সেই বুঝে গেঁথো—আমার আর কাজ
বাড়িয়ো না।

পঞ্চক। শোণপাংশুদের—

দাদাঠাকুর। হা, ওদেরও ডেকে এনে বসাতে হবে, ওরা একটু
বসতে শিখুক।

পঞ্চক। ওদের বসিয়ে রাখা! সর্বনাশ। তার চেয়ে ওদের
ভাঙতে চুরতে দিলে ওরা বেশি ঠাণ্ডা থাকে। ওরা যে কেবল ছটফট
করাকেই মুক্তি মনে করে।

দাদাঠাকুর। ছোটো ছেলেকে পাকা বেল দিলে সে ভারি খুশি
হয়ে মনে করে এটা খেলার গোলা। কেবল সেটাকে গড়িয়ে নিয়ে
বেড়ায়। ওরাও সেইরকম স্বাধীনতাকে বাইরে থেকে ভারি একটী
মজার জিনিস বলে জানে—কিন্তু জানে না স্থির হয়ে বসে তার ভিতর
থেকে সার পদাৰ্থটা বেৱ করে নিতে হয়। কিছুদিনের জন্যে তোমার
মহাপঞ্চকদাদাৰ হাতে ওদের ভার দিলেই খানিকটা ঠাণ্ডা হয়ে ওৱা
নিজেৰ ভিতৱ্বে দিকটাতে পাক ধৰাবাৰ সময় পাবে।

পঞ্চক। তাহলে আমার মহাপঞ্চকদাদাকে কি ওইখানেই—

দাদাঠাকুর। হা ওইখানেই বই কি। তার ওখানে অনেক কাজ। এতদিন ঘর বন্ধ করে অঙ্ককারে ও মনে করছিল চাকাটা খুব চলছে, কিন্তু চাকাটা কেবল এক জায়গায় ঢাকিয়ে ঘুরছিল তা সে দেখতেও পায়নি। এখন আলোতে তার দৃষ্টি খুলে গেছে, সে আর সে-মানুষ নেই। কৌ করে আপনাকে আপনি ছাড়িয়ে উঠতে হয় সেইটে শেখাবার ভার ওর উপর। শুধাত্বণ-লোভভয়-জীবনমৃত্যুর আবরণ বিদীর্ণ করে আপনাকে প্রকাশ করার রহস্য ওর হাতে আছে।

আচার্য। আর এই চির-অপরাধীর কৌ বিধান করলে প্রভু।

দাদাঠাকুর। তোমাকে আর কাজ করতে হবে না আচার্য। তুমি আমার সঙ্গে এসো।

আচার্য। বাঁচালে প্রভু, আমাকে রক্ষা করলে। আমার সমস্ত চিত্ত শুকিয়ে পাথর হয়ে গেছে—আমাকে আমারই এই পাথরের বেড়া থেকে বের করে আনো। আমি কোনো সম্পদ চাইনে—আমাকে একটু বস দাও।

দাদাঠাকুর। ভাবনা নেই আচার্য ভাবনা নেই—আনন্দের বর্ষা নেমে এসেছে—তার ঝর ঝর শব্দে মন নৃত্য করছে আমার। বাইরে বেরিয়ে এলেই দেখতে পাবে চারিদিক ভেসে যাচ্ছে। ঘরে বসে ভয়ে কাপচে কারা। এ ঘনঘোর বর্ষার কালো মেঘে আনন্দ, তৌক্ষ বিদ্যুতে আনন্দ, বজ্রের গর্জনে আনন্দ। আজ মাথার উষ্ণীষ যদি উড়ে যায় তো উড়ে যাক, গায়ের উত্তরীয় যদি ভিজে যায় তো ভিজে যাক—আজ দুর্ঘোগ একে বলে কে। আজ ঘরের ভিত যদি ভেঙে গিয়ে থাকে যাক না—আজ একেবারে বড়ো রাস্তার মাঝখানে হবে মিলন।

স্বভদ্রের প্রবেশ

স্বভদ্র। গুৰু।

দাদাঠাকুর। কৌ বাবা।

স্বভদ্র । আমি যে পাপ করেছি তার তো প্রায়শিত্ত শেষ হল না ।

দাদাঠাকুর । তার আর কিছু বাকি নেই ।

স্বভদ্র । বাকি নেই ?

দাদাঠাকুর । না । আমি সমস্ত চূরমার করে ধুলোয় লুটিয়ে দিয়েছি ।

স্বভদ্র । একজটা দেবী—

দাদাঠাকুর । একজটা দেবী ! উত্তরের দিকের দেয়ালটা ভাঙবা-মাত্রই একজটা দেবীর সঙ্গে আমাদের এমনি মিল হয়ে গেল যে, সে আর কোনোদিন জটা ছলিয়ে কাউকে ভয় দেখাবে না । এখন তাকে দেখলে মনে হবে সে আকাশের আলো—তার সমস্ত জটা আঘাতের নবীন মেঘের মধ্যে জড়িয়ে গিয়েছে ।

স্বভদ্র । এখন আমি কী করব ?

পঞ্চক । এখন তুমি আছ ভাই আর আমি আছি । দুজনে মিলে কেবলই উত্তর দক্ষিণ পুর পশ্চিমের সমস্ত দরজাজানলাগুলো খুলে খুলে বেড়াব ।

উপাচার্য । (প্রবেশ করিয়া) তৃণ পাওয়া গেল না—কোথাও তৃণ পাওয়া গেল না ।

আচার্য । স্মৃতসোম, তুমি বুঝি তৃণ খুঁজেই বেড়াচ্ছিলে ?

উপাচার্য । হ্যাঁ, ইন্দ্রত্ণ, সে তো কোথাও পাওয়া গেল না । হায় হায় । এখন আমি করি কী । এমন জায়গাতেও মানুষ বাস করে !

আচার্য । থাক তোমার তৃণ । এদিকে একবার চেয়ে দেখো ।

উপাচার্য । এ কী । এ যে আমাদের গুরু । এখানে ! এই দর্তকদের পাড়ায় ! এখন উপায় কী । ওঁকে কোথায়—

দর্তকগণের অর্ধ্য লইয়া প্রবেশ

প্রথম দর্তক। গোসাই, এই সব তোমার জন্তে এনেছি। কেতনের
মাসি পরশু পিঠে তৈরি করেছিল তারি কিছু বাকি আছে—

উপাচার্য। আরে, আরে সর্বনাশ করলে রে। করিস কী। উনি
যে আমাদের গুরু।

দ্বিতীয় দর্তক। তোমাদের গুরু আবার কোথায়। এ তো আমাদের
গোসাই।

দাদাঠাকুর। দে ভাই, আর কিছু এনেছিস ?

দ্বিতীয় দর্তক। হঁ জাম এনেছি।

তৃতীয় দর্তক। কিছু দই এনেছি।

দাদাঠাকুর। সব এখানে রাখ। এসো ভাই পঞ্চক, এসো আচার্য
অদীনপুণ্য—নৃতন আচার্য আর পুরাতন আচার্য এসো, এদের ভক্তির
উপহার ভাগ করে নিয়ে আজকের দিনটাকে সার্থক করি।

বালকগণের প্রবেশ

সকলে। গুরু।

দাদাঠাকুর। এসো বাচ্চা, তোমরা এসো।

প্রথম বালক। কখন আমরা বের হব ?

দাদাঠাকুর। আর দেরি নেই—এখনই বের হতে হবে।

দ্বিতীয় বালক। এখন কী করব।

দাদাঠাকুর। এই যে তোমাদের ভোগ তৈরি হয়েছে।

প্রথম বালক। ও ভাই এই যে জাম—কী মজা।

দ্বিতীয় বালক। ওরে ভাই খেজুর—কী মজা।

তৃতীয় বালক। গুরু, এতে কোনো পাপ নেই ?
 দাদাঠাকুর। কিছু না—পুণ্য আছে।
 প্রথম বালক। সকলের সঙ্গে এইখানে বসে থাব ?
 দাদাঠাকুর। হ্যাঁ এইখানেই।

শোণপাংশুদলের প্রবেশ

প্রথম শোণপাংশু। দাদাঠাকুর।
 দ্বিতীয় শোণপাংশু। আর তো পারিনে। দেয়াল তো একটাও
 বাকি রাখিনি। এখন কী করব। বসে বসে পা ধরে গেল যে।
 দাদাঠাকুর। ভয় নেই রে। শুধু শুধু বসিয়ে রাখব না। তোদের
 কাজ দেব।

সকলে। কী কাজ দেবে ?
 দাদাঠাকুর। আমাদের পঞ্চকদাদাৰ সঙ্গে মিলে ভাঙা ভিত্তের উপর
 আবার গাঁথ'ত লেগে'যেতে হবে।

সকলে। বেশ, বেশ, রাজি আছি।
 দাদাঠাকুর। ওই ভিত্তের উপর কাল যুদ্ধের রাত্রে স্বিরকের রক্তের
 সঙ্গে শোণপাংশুর রক্ত মিলে গিয়েছে।

সকলে। হ্যাঁ মিলেছে।
 দাদাঠাকুর। সেই মিলনেই শেষ করলে চলবে না। এবার আর
 লাল নয়, এবার একেবারে শুভ। নৃতন সৌধের সাদা ভিতকে আকাশের
 আলোৱ মধ্যে অভ্রভেদী কৰে দাঢ় কৰাও। মেলো তোমোৱা দুইদলে
 লাগো তোমাদেৱ কাঞ্জে।

সকলে। তাই লাগব। পঞ্চকদাদা, তাহলে তোমাকে উঠতে

হচ্ছে, অমন করে ঠাণ্ডা হয়ে বসে থাকলে চলবে না। তরা করো।
আর দেবি না।

পঞ্জক। প্রস্তুত আছি। গুরু তবে প্রণাম করি। আচার্যদেব
আশীর্বাদ করো।

গ্রন্থপরিচয়

অচলায়তন ১৩১৮ সালে গ্রন্থাকারে 'প্রকাশিত হয়।

অচলায়তন ১৩১৮ সালের আশ্বিন মাসের প্রবাসীতে সম্পূর্ণ মুদ্রিত হইয়াছিল। প্রবাসীতে নাটকটি প্রকাশিত হইলে অধ্যাপক ললিতকুমার বন্দ্যোপাধ্যায় 'আর্য্যাবর্ত' মাসিক পত্রে (কাতিক ১৩১৮) ইহাব একটি সমালোচনা প্রকাশ করেন, ইহাতে নাটকটির প্রশংসন ও তিরঙ্গার দৃষ্টি ছিল। ললিতকুমার বন্দ্যোপাধ্যায়কে লিখিত একটি পত্রে বৌদ্ধনাথ এই সমালোচনার উত্তর দেন, নিম্নে তাহা মুদ্রিত হইল।—

নিজের লেখা সমস্তে কোনোপ্রকার গুরুতি করিতে যাওয়া ভদ্রূতি নহে। সে বৌতি আমি সাধারণত মানিয়া থাকি। কিন্তু আপনার মতো বিচারক ব্যবস্থা আমার কোনো গ্রন্থের সমালোচনা করেন, তখন প্রথার থাতিরে ঔদাসীন্যের ভাব করা আমার দ্বারা হইয়া উঠে ন।

সাহিত্যের দিক দিয়া আপনি অচলায়তনের উপর যে রায় লিখিয়াছেন তাহার বিরুদ্ধে আপনার নিকট আমি কোনো আপিল রঞ্জ করিব ন। আপনি যে ডিক্রী দিয়াছেন সে আমার যথেষ্ট হইয়াছে।

কিন্তু ওই যে একটা উদ্দেশ্যের কথা তুলিয়া আমার উপরে একটা মন্ত্র অপরাধ চাপাইয়াছেন সেটা আমি চুপচাপ করিয়া মানিয়া লইতে পারিব ন। কেবলমাত্র ঘোঁক দিয়া পড়ার দ্বারা বাকের অর্থ দুটি-তিনি-রকম হইতে পারে। কোনো কাব্য বা নাটকের উদ্দেশ্যটা সাহিত্যিক বা অসাহিত্যিক তাহাও কোনো কোনো স্থলে ঘোঁকের দ্বারা সংশয়াপন হইতে পারে। পাখি পিঙ্গরের বাহিরে যাইবার জন্য ব্যাকুল হইতেছে ইহা কাব্যের কথা— কিন্তু পিঙ্গরের নিম্না করিয়া ঝাঁচাওআলার প্রতি ঝোচা দেওয়া হইতেছে এমনভাবে স্থল করিয়াও হয়তো পড়া যাইতে

পারে। মুক্তির জন্য পাথির কাতরতাকে ব্যক্ত করিতে হইলে খাচার কথাটা একেবারেই বাদ দিলে চলে না। পাথির বেদনাকে সত্য করিয়া দেখাইতে হইলে খাচার বন্ধতা ও কঠিনতাকে পরিষ্কৃট করিতেই হয়। জগতের যেখানেই ধর্মকে অভিভূত করিয়া আচার আপনি বড়ো হইয়া উঠে সেখানেই মানুষের চিত্তকে সে রুক্ষ করিয়া দেয়— এটা একটা বিশ্বজনীন সত্য। সেই রুক্ষ চিত্তের বেদনাই কাবোর বিষয়— এবং আনুষঙ্গিক ভাবে শুক্ষ আচারের কদর্যতা স্বতই সেই সঙ্গে ব্যক্ত হইতে থাকে।

ধর্মকে প্রকাশ করিবার জন্য গতি দিবার জন্মই আচারের স্ফটি—
কিন্তু কালে কালে ধর্ম যখন সেইসমস্ত আচারকে নিয়মসংযমকে অতিক্রম করিয়া বড়ো হইয়া উঠে, অথবা ধর্ম যখন সচল নদীর মতো আপনার ধারাকে অন্ত পথে লইয়া যায়, তখন পূর্বতন নিয়মগুলি অচল হইয়া শুক্ষ নদীপথের মতো পড়িয়া থাকে— বস্তুত তখন তাহা তপ্ত মুক্তি, তৃষ্ণাহরা তাপনাশিনী শ্রোতস্বিনীর সম্পূর্ণ বিপরীত। সেই শুক্ষ পথটাকেই সনাতন বলিয়া সম্মান করিয়া নদীর ধারার সম্মান ঘণ্টি একেবারে পরিত্যাগ করা যায় তবে মানবাত্মাকে পিপাসিত করিয়া রাখা হয়। সেই পিপাসিত মানবাত্মার ক্রন্দন কি সাহিত্যে প্রকাশ করা হইবে না, পাছে পুরাতন নদীপথের প্রতি অনাদর দেখানো হয় ?

আপনি যাহা বলিয়াছেন সে কথা সত্য। সকল ধর্মসমাজেই এমন অনেক পুরাতন প্রথা সঞ্চিত হইতে থাকে যাহার ভিতর হইতে প্রাণ সরিয়া গিয়াছে। অথচ চিরকালের অভ্যাসবশত মানুষ তাহাকেই প্রাণের সামগ্রী বলিয়া আঁকড়িয়া থাকে— তাহাতে কেবলমাত্র তাহার অভ্যাস তপ্ত হয় কিন্তু তাহার প্রাণের উপবাস ঘুচে না— এমনি করিয়া অবশেষে এমন একদিন আসে যখন ধর্মের প্রতিই তাহার অশ্রদ্ধা জন্মে—

এ কথা ভুলিয়া যায় যাহাকে সে আশ্রয় করিয়াছিল তাহা ধর্মই নহে, ধর্মের পরিত্যক্ত আবর্জনামাত্র।

এমন অবস্থায় সকল দেশেই সকল কালেই মানুষকে কেহ-না-কেহ শুনাইয়াছে যে, আচারই ধর্ম নহে ; বাহিকতায় অন্তরের ক্ষুধা মেটে না, এবং নির্থক অনুষ্ঠান মুক্তির পথ নহে তাহা বঙ্গন। অভ্যাসের প্রতি আসক্ত মানুষ কোনোদিন এ কথা শুনিয়া খুশি হয় নাই এবং যে এমন কথা বলে তাহাকে পুরস্কৃত করে নাই— কিন্তু ভালো লাগুক আর না লাগুক এ কথা তাহাকে বারংবার শুনিতেই হইবে।

প্রত্যেক মানুষের একটা অহং আছে— সেই অহং-এর আবরণ হইতে মুক্ত হইবার জন্য সাধকমাত্রের একটা ব্যগ্রতা আছে। তাহার কারণ কী ? তাহার কারণ এই, মানুষের নিজের বিশেষজ্ঞ যখন তাহার আপনাকেই ব্যক্ত করিতে থাকে, আপনার চেয়ে বড়োকে নহে, তখন সে আপনার অস্তিত্বের উদ্দেশ্যকেই ব্যর্থ করে। আপনার অহংকার, আপনার স্বার্থ, আপনার সমস্ত রাগবন্ধেষকে ভেদ করিয়া ভক্ত যখন আপনার সমস্ত চিন্তায় ও কর্মে ভগবানের ইচ্ছাকে ও তাহার আনন্দকেই প্রকাশ করিতে থাকেন তখনই তাহার মানবজীবন সার্থক হয়।

ধর্মসমাজেরও সেইরূপ একটা অহং আছে। তাহার অনেক বৌতি-পদ্ধতি নিজেকেই চরমরূপে প্রকাশ করিতে থাকে। চিরস্তনকে আচ্ছন্ন করিয়া নিজের অহংকারকেই সে জয়ী করে। তখন তাহাকে পরাভূত করিতে না পারিলে সত্যধর্ম পীড়িত হয়। সেই পীড়া যে সাধক অনুভব করিয়াছে সে এমন গুরুকে খোঁজে যিনি এই সমস্ত সামাজিক অহংকে অপসারিত করিয়া ধর্মের মুক্ত স্বরূপকে দেখাইয়া দিবেন। মানবসমাজে যখনই কোনো গুরু আসিয়াছেন তিনি এই কাজই করিয়াছেন।

আপনি প্রশ্ন করিয়াছেন, উপায় কী ? ‘শুধু আলো, শুধু প্রীতি’

লইয়াই কি মানুষের পেট ভরিবে? অর্থাৎ আচার-অনুষ্ঠানের বাধা দূর করিলেই কি মানুষ কৃতর্থ হইবে? তাই যদি হইবে তবে ইতিহাসে কোথাও তাহার কোনো দৃষ্টান্ত দেখা যায় না কেন?

কিন্তু একপ প্রশ্ন কি অচলায়তনের লেখককে জিজ্ঞাসা করা ঠিক হইয়াছে? অচলায়তনের গুরু কি ভাঙ্গিবার কথাতেই শেষ করিয়াছেন? গড়িবার কথা বলেন নাই? পঞ্চক যখন তাড়াতাড়ি বন্ধন ছাড়াইয়া উধাও হইয়া যাইতে চাহিয়াছিল তখন তিনি কি বলেন নাই— না, তা যাইতে পারিবে না— যেগানে ভাঙ্গা হউল এইখানেই আবার প্রশস্ত করিয়া গড়িতে হইবে? গুরুর আঘাত, নষ্ট করিবার জন্য নহে, বড়ো করিবাব জন্যট। তাহার উদ্দেশ্য তাগ করা নহে, সার্থক করা। মানুষের স্তল দেহ যখন মানুষের মনকে অভিভৃত করে তখন সেই দেহগত রিপুকে আঘাত নিন্দা করি, কিন্তু তাহা হইতে কি প্রমাণ হয় প্রেতত্ত্বাভাস মানুষের পূর্ণতা? স্তল দেহের প্রয়োজন আছে, কিন্তু সেই দেহ মানুষের উচ্চতর সত্তার বিরোধী হইবে না, তাহার অনুগত হইবে এ কথা বলার দ্বারা দেহকে নষ্ট করিতে বলা হয় না।

অচলায়তনে মন্ত্রমাত্রের প্রতি তৌর শ্লেষ প্রকাশ করা হইয়াছে এ কথা কথনোই সত্য হইতে পারে না— যেহেতু মন্ত্রের সার্থকতা সম্বন্ধে আমার মনে কোনো সন্দেহ নাই। কিন্তু মন্ত্রের যথার্থ উদ্দেশ্য মননে সাহায্য করা। ধ্যানের বিষয়ের প্রতি মনকে অভিনিবিষ্ট করিবার উপায় মন্ত্র। আমাদের দেশে উপাসনার এই-যে আশ্চর্য পন্থা সৃষ্টি হইয়াছে ইহা ভারতবর্ষের বিশেষ মাহাত্ম্যের পরিচয়।

কিন্তু সেই মন্ত্রকে মনন-ব্যাপার হইতে যখন বাহিরে বিক্ষিপ্ত করা হয়, মন্ত্র যখন তাহার উদ্দেশ্যকে অভিভৃত করিয়া নিজেই চরম পদ অধিকার করিতে চায়, তখন তাহার মতো মননের বাধা আর কী হইতে

পারে? কতকগুলি বিশেষ শব্দসমষ্টির মধ্যে কোনো অলৌকিক শক্তি আছে এই বিশ্বাস যখন মানুষের মনকে পাইয়া বসে তখন সে আর সেই শব্দের উপরে উঠিতে চায় না, তখন মনন ঘুচিয়া গিয়া সে উচ্চারণের ফাঁদেই জড়াইয়া পড়ে; তখন, চিন্তকে যাহা মৃক্ত করিবে বলিয়াই রচিত তাহাই চিন্তকে বন্ধ করে। এবং ক্রমে দাঢ়ায় এই, মন্ত্র পড়িয়া দৌর্ঘজীবন লাভ করা, মন্ত্র পড়িয়া শক্ত জয় করা ইত্যাদি নানাপ্রকার নির্বর্থক দুশ্চেষ্টায় মানুষের মৃত মন প্রলুক্ষ হইয়া ঘুরিতে থাকে। এইরূপে মন্ত্রই যখন মননের স্থান অধিকার করিয়া বসে তখন মানুষের পক্ষে তাহা অপেক্ষা শুক্র জিনিস আর কী হইতে পারে? যেখানে মন্ত্রের একপ অষ্টতা সেখানে মানুষের দুর্গতি আছেই। সেই সমস্ত কুত্রিম বন্ধনজাল হইতে মানুষ আপনাকে উদ্ধার করিয়া ভক্তির সঙ্গীবতা ও সরসতা-লাভের জন্য ব্যাকুল হইয়া উঠে— ইতিহাসে বারংবার ইহার প্রমাণ দেখা গিয়াছে। যাগঘজ্জ মন্ত্রতত্ত্ব যখনই অত্যন্ত প্রবল হইয়া মানুষের মনকে চারিদিকে বেষ্টন করিয়া দিবে তখনই তো মানবের শুক্র মানবের হৃদয়ের দাবি মিটাইবার জন্ম দেখা দেন— তিনি বলেন, পাথরের টুকরা দিয়া কুটির টুকরার কাজ চালানো যাব না, বাহু অনুষ্ঠানকে দিয়া অন্তরের শূণ্যতা পূর্ণ করা চলে না। কিন্তু তাহি বলিয়া এ কথা কেহই বলে না যে, মন্ত্র যেখানে মননের সহায়, বাহিরের অনুষ্ঠান যেখানে অন্তরের ভাবস্ফূর্তিব অনুগত, সেখানে তাহা নিন্দনীয়। ভাব তো রূপকে কামনা করে, কিন্তু রূপ যদি ভাবকে মারিয়া একলা রাজত্ব করিতে চায় তবে বিধাতার দণ্ডবিধি অনুসারে তাহার কপালে মৃত্যু আছেই। কেননা সে যতদিনই বাঁচিবে ততদিনই কেবলই মানুষের মনকে মারিতে থাকিবে। ভাবের পক্ষে রূপের প্রয়োজন আছে বলিয়াই রূপের মধ্যে লেশমাত্র অস্তীতি এমন নির্দারণ। যেখানেই সে নিজেকে

প্রবল করিতে চাহিবে সেইগামেই সে নির্জ্জ, সে অকল্যাণের আকর। কেননা, ভাব যে রূপকে টানিয়া আনে সে যে প্রেমের টান, আনন্দের টান— রূপ যখন সেই ভাবকে চাপা দেয় তখন সে সেই প্রেমকে আঘাত করে, আনন্দকে আচ্ছন্ন করে— সেইজন্য যাহারা ভাবের ভক্ত তাহারা রূপের এইরূপ অষ্টাচার একেবারে সহিতে পারে না। কিন্তু রূপে তাহাদের পরমানন্দ যখন ভাবের সঙ্গে তাহার পূর্ণ মিলন দেখে। কিন্তু শুধু রূপের দাস্থত মানুষের সকলের অধম দুর্গতি। যাহারা মহাপুরুষ তাহারা মানুষকে এই দুর্গতি হইতেই উদ্ধার করিতে আসেন। তাই অচলায়তনে এই আশার কথাই বল। হইয়াছে যে, যিনি গুরু তিনি সমস্ত আশ্রয় ভাঙিয়া চুরিয়া দিয়া একটা শৃঙ্খলা বিস্তার করিবার জন্য আসিতেছেন না ; তিনি স্বভাবকে জাগাইবেন, অভাবকে ঘূচাইবেন, বিরুদ্ধকে মিলাইবেন— যেখানে অভ্যাসমাত্র আছে সেখানে লক্ষ্যকে উপস্থিত করিবেন, এবং যেখানে তপ্তবালু-বিছানো থাদ পড়িয়া আছে মাত্র সেখানে প্রাণপরিপূর্ণ ঋসের ধারাকে বহাইয়া দিবেন। এ কথা কেবল যে আমাদেরই দেশের সম্বন্ধে খাটে তাহা নহে— ইহা সকল দেশেই সকল মানুষেরই কথা। অবশ্য এই সার্বজনীন সত্য অচলায়তনে ভারতবর্ষীয় রূপ ধারণ করিয়াছে— তাহা যদি না করিত তবে উহা অপাঠ্য হইত।

মনে করিয়াছিলাম সংক্ষেপে বলিব— কিন্তু ‘নিজের কথা পাঁচ কাহন’ হইয়া পড়ে— বিশেষত শ্রোতা যদি সহস্র ও ক্ষমাপরায়ণ হন। ইতিপূর্বেও আপনার প্রতি জুলুম করিয়া সাহস বাড়িয়া গেছে— এবারেও প্রশ্ন পাইব এ ভরসা মনে আছে। ইতি ওরা অগ্রহায়ণ ১৩১৮, শাস্তিনিকেতন।

আর্যাবর্তের যে সংখ্যাতে ব্রহ্মীন্দ্রনাথের এই প্রত্যুত্তর মুদ্রিত হয় সেই সংখ্যাতেই অক্ষয়চন্দ্র সরকার, ললিতকুমার বন্দ্যোপাধ্যায়ের ‘ফোয়ারু’

গ্রন্থের সমালোচনা-প্রসঙ্গে, পূর্বসংখ্যা আঘাবর্তে প্রকাশিত তাঁহার অচলায়তন আলোচনার ও রবীন্দ্রনাথের বিরূপ সমালোচনা করেন। অক্ষয়চন্দ্রের আলোচনা সম্মতে রবীন্দ্রনাথ লিলিতকুমার বন্দ্যোপাধ্যায়কে একথানি পত্রে লেখেন—

আমার লেখা পড়িয়া অনেকে বিচলিত হইবেন এ কথা আমি নিশ্চিত জানিতাম— আমি শীতল-ভোগের বরাদ্দ আশাও করি নাই। অচলায়তন লেখায় যদি কোনো চঞ্চলতাই না আনে তবে উহা বৃথা লেখা হইয়াছে বলিয়া জানিব। সংস্কারের জড়তাকে আঘাত করিব অথচ তাহা আহত হইবে না, ইহাকেই বলে নিফলতা। অবস্থাবিশেষে ক্রোধের উত্তেজনাই সত্যকে স্বীকার করিবার প্রথম লক্ষণ, এবং বিরোধই সত্যকে গ্রহণ করিবার আরম্ভ। যদি কেহ এমন অঙ্গুত সৃষ্টিছাড়া কথা বলেন ও বিশ্বাস করেন যে, জগতের মধ্যে কেবল আমাদের দেশেই ধর্মে ও সমাজে কোথাও কোনো ক্রত্রিমতা ও বিকৃতি নাই, অথচ বাহিরে দুর্গতি আছে, তবে সত্যের সংঘাত তাঁহার পক্ষে সুখকর হইবে না, তিনি সত্যকে আপনার শক্ত বলিয়া গণ্য করিবেন। তাঁহাদের মন রক্ষা করিয়া যে চলিবে, হয় তাহাকে মৃচ নয় তাহাকে ভৌরু হইতে হইবে। নিজের দেশের আদর্শকে যে ব্যক্তি যে পরিমাণে ভালোবাসিবে সেই তাঁহার বিকারকে সেই পরিমাণেই আঘাত করিবে, ইহাই শ্রেয়স্কর। ভালোমন্দ সমস্তকেই সমান নির্বিচারে সর্বাঙ্গে মাথিয়া নিশ্চল হইয়া বসিয়া থাকাকেই প্রেমের পরিচয় বলিতে পারি না। দেশের মধ্যে এমন অনেক আবজনা স্তুপাকার হইয়া উঠিয়াছে যাহ। আমাদের বুদ্ধিকে শক্তিকে ধর্মকে চারিদিকে আবদ্ধ করিয়াছে— সেই ক্রত্রিম বন্ধন হইতে মুক্তি পাইবার জন্য এ দেশে মানুষের আত্মা অহরহ কাঢ়িতেছে— সেই কান্নাই ক্ষুধার কান্না,

মারীর কান্না, অকালমৃত্তার কান্না, অপমানের কান্না। সেই কান্নাই নানা নাম ধরিয়া আমাদের প্রত্যেকের মধ্যে এমন একটা ব্যাকুলতার সঞ্চার করিয়াছে, সমস্ত দেশকে নিরানন্দ করিয়া রাখিয়াছে এবং বাহিরের সকল আঘাতের সম্বন্ধেই তাহাকে এমন একান্তভাবে অসহায় করিয়া তুলিয়াছে। ইহার বেদনা কি প্রকাশ করিব না? কেবল মিথ্যা কথা বলিব এবং সেই বেদনার কারণকে দিনরাত্রি প্রশ্ন দিতেই থাকিব? অন্তরে যে-সকল মর্মান্তিক বন্ধন আছে বাহিরের শৃঙ্খল তাহারই স্তুল প্রকাশ মাত্র— অন্তরের সেই পাপগুলাকে কেবলই ‘বাপু বাচা’ বলিয়া নাচাইব, আর ধিক্কার দিবার বেলায় ওই বাহিরের শিকলটাই আছে? আমাদের পাপ আছে বলিয়াই শাস্তি আছে— যত লড়াই ওই শাস্তির সঙ্গে আর যত মগতা ঈ পাপের প্রতি? তবে কি এই কথাট সত্য যে, আমাদের কোথাও পাপ নাই, আমরা বিদ্যাতার অন্ত্যায় বহন করিতেছি? যদি তাহা সত্য না হয়, যদি পাপ থাকে, তবে সে পাপের বেদনা আমাদের সাহিত্যে কোথায় প্রকাশ পাইতেছে? আমরা কেবলই আপনাকে ভুলাইতে চেষ্টা করিতেছি যে সমস্ত অপরাধ বাহিরের দিকেই, আপনার মধ্যে যেখানে সকলের চেয়ে বড়ো শক্ত আছে, যেখানে সকলের চেয়ে ভৌষণ লড়াই প্রতীক্ষা করিতেছে, সেদিকে কেবলই আমরা মিথ্যার আডাল দিয়া আপনাকে বাঁচাইবার চেষ্টা করিতেছি। কিন্তু আমি আপনাকে বলিতেছি, আমার পক্ষে প্রতিদিন ইহা অসহ হইয়া উঠিয়াছে। আমাদের সমস্ত দেশব্যাপী এই বন্দিশালাকে একদিন আমিও নানা মিষ্টনাম দিয়া ভালোবাসিতে চেষ্টা করিয়াছি; কিন্তু তাহাতে অন্তরাত্মা তৃপ্তি পায় নাই— এই পাষাণপ্রাচীরের চারিদিকেই তাহার মাথা ঠেকিয়া সে কোনো আশাৰ পথ দেখিতেছে না— বাস্ রে! এমন নৌরঙ্কু বেষ্টন! এমন আশ্র্য পাকা গাথনি! বাহাদুরি আছে বটে, কিন্তু

শ্ৰেষ্ঠ আছে কি ? চাৰিদিকে তাকাইয়া শ্ৰেষ্ঠ কোন্থানে দেখা যাইতেছে জিজ্ঞাসা কৰি ! ঘৰে বাইৱে কোথায় সে আছে ? অচলায়তনে আমাৰ সেই বেদনা প্ৰকাশ পাইয়াছে। শুধু বেদনা নয়, আশাও আছে। ইতিহাসে সৰ্বত্রই কুত্ৰিমতাৰ জাল যথন জটিলতম দৃঢ়তম হইয়াছে তথনই গুৰু আসিয়া তাহা ছেদন কৰিয়াছেন—আমাদেৱেও গুৰু আসিতেছেন— দ্বাৰা রূপ, পথ দুৰ্গম, বেড়া বিস্তৱ, তবু তিনি আসিতেছেন—তাহাকে আমৰা স্বীকাৰ কৰিব না, বাধা দিব, মাৰিব, তবু তিনি আসিতেছেন ইহা নিশ্চিত। দোহাই আপনাদেৱ, মনে কৰিবেন না, অচলায়তনে আমি গালি দিয়াছি বা উপদেশ দিয়াছি—আমি প্ৰাণেৰ ব্যাকুলতায় শিকল নাড়া দিয়াছি—গে শিকল আমাৰ, এবং সে শিকল সকলেৱ। নাড়া দিলে হয়তো পায়ে বাজে— বাজিবে না তো কী ? শিকল যে শিকলই মেষ কথাটা যেমন কৰিয়া হউক জানাইতেই হইবে—যে নিজে অনুভব কৰিতেছে সে অনুভব না কৰাইয়া বাঁচিবে কী কৰিয়া ? ইহাতে মাৰ খাইতে হয় তো মাৰ খাইব। তাই বলিয়া নিৰস্ত হইতে পাৰিব না—গালিকেই আমাৰ চেষ্টাৰ সাৰ্থকতা মনে কৰিয়া আমি মাথায কৰিয়া লইব—আৱ কোনো পুৰুষাব চাই না।

ইতি ২৭শে অগ্ৰহায়ণ ১৩১৮

ললিতকুমাৰ বন্দ্যোপাধ্যায় মহাশয়েৰ পুত্ৰ শ্ৰীযুক্ত গলিলকুমাৰ বন্দ্যোপাধ্যায় মহাশয় রবীন্দ্ৰনাথেৰ পূৰ্বোদ্ধৃত চিঠিপত্ৰ রক্ষা কৰিয়াছিলেন, তিনি অনুগ্ৰহপূৰ্বক এগুলি বিশ্বভাৱতীকে ব্যবহাৰ কৰিতে দিয়াছেন।

অধ্যাপক এডওয়ার্ড টমসন তাহাৰ পুস্তকে লিখিয়াছেন যে, অচলায়তনে কোনো কোনো ইংৰেজি গ্ৰন্থেৰ ছায়া আছে।^{১)} রামানন্দ

^{১)} Its fable was probably suggested by *The Princess and more remotely, The castle of Indolence and The Faerie Queen.*—Edward Thompson in *Rabindranath Tagore : Poet and Dramatist*, p. 225

১১৪

অচলায়তন

চট্টপাধ্যায় মহাশয়কে একটি চিঠিতে রবীন্ননাথ (৩ আষাঢ় ১৩৩৪)
এ সম্বন্ধে লেখেন—

Castle of Indolence এবং Faerie Queen আমি পড়িনি—
Princess-এর সঙ্গে অচলায়তনের স্বদূরতম সাদৃশ্য আছে বলে আমার
বোধ হয় না। আমাদের 'নিজেদের' দেশে মঠ-মন্দিরের অভাব নেই—
আকৃতি ও প্রকৃতিতে অচলায়তনের সঙ্গে তাদেরই মিল আছে।

STATE CENTRAL LIBRARY
WEST BENGAL
CALCUTTA

